


DITÈÈKIIBWA 4

 Mwaneetu Neville, mwoyi wenu awu mu mapingaja emu, to, mu diloolo emu's wè, kùdi balunda beetu bàà mushinga mukole, tudi ne disanka bwa kwikala baalùkile mu ekeleeziya emu diloolo edi. Kùdi ndambu wa luuya, ne pa nanku netuteete bwa kulwijakaja ne lukasa ne mwetu mwònsò, bwa kubwela buludi mu Diyisha.

Dyambedi, tudikù ne ndambu wa mamanyisha a kufila, ne dilomba dya disambila dya—dya pabwàdi. Ndi mupete mikanda yenu mimfundila lwà paanyima pààpa, yìvwà mifidiibwe ayi, ne bwa mwaneetu wa bakaji udi udyùmvwa ne ùdi ne cyùjà cya kansere mu bwongò awu. Ne kùvwa mukwabo mu Louisville; ne mwanaabo ne mwambi mukwabo, tatwëndè ùdi ne dĩaamà dya mwoyi mwimane; ne kùdi babeedi bààbùngì, bààbùngì menemene pa buloba leelu ewu. Bààbùngì bàdi bàbiikila ku telefone ne ncya bushuwa ne twètù tudi tubasambidila ne mwoyi wetu wònsò, bwa Nzambi wàmònakù mwa kutukwacisha.

Pa ciibidilu pamwe ne bya pa lukama makumi citeema ne bitaanu bya mudimu wànyì wà bwambi bitu misangu yònsò anu cyòcì aci, kusambidila kwa babeedi, nudi numona's, kadi ndi—ndi bu mupete—bu mupete mmwenenu mukese wa ne . . . ndi mutungunuke anu ne kusambidila kwa babeedi, mpindyewu, nwavulukaayi aci. Aci cidi citungunuka anu naawu. Kadi, kaa, twìkalapù mwa kufikisha e—ekeleeziya kaaba kàà yèyè mwa kutèèkiibwa bilondèshìle myaba, dìbà adi, ne kubwela mu bulongame mu mushindu wà ne twètù tudikù mwa kuditwa mu mudimu, nudi numona's. Bikèngela twìkalèku badìlongòlòle, nwamonu's, kusangisha byònsò kaaba kamwe.

Cikwabo cintu cyäfumu ku dintuuta ku mwoyi, kwènjì katanci. Piine qpu mpàvwà nkolomù mukese wa kale, dimwe dya ku maboko èndè dyambè kutuuka ku mazaji, mukolo mwambè kutuuka ku mazaji. Yèyè kèna kaaba aka to bwa kunteelejaye mpindyewu mene. Kadi mwànà mulelela wa mfumu awu, dyèndè n'Roy Roberson, ne umwe wa ku balubuludi beetu mu ekeleeziya emu, ne mwena Kilisto wa maalu malenga ne wa bukàlàngà. Yèyè mmulwe anu kaaba aku e kwambaye ne: "Mwaneetu Branham, kwikadi wàpwa mwoyi Mfumu wa ditunga's." Yèyè ne: "Bìvwa bingenze luse be pätùùlukuyè mwaba wàwa," mumumwene ku télévision, "pàvwàye ütùùluka ku ndeke, ne binsonji bimupwekela pa matama, ne mukana mukònyangaja luseke." Nudi bamanye's, yèyè ùvwa anu kuntwaku mene pamwe ne Roy ne bakwabo abu, mu mvita ayi—ayi.

Nansha kùyi upetangana nende pa bidì bitangilà maalu a cidiidi to, yèyè ùdi anu Mfumu wetù wa ditunga. Eyowa's,

mukalenge. Bwànyì mêmè, ncyêna—ncyêna nî n’Démocrate nî n’Républicain to. Mêmè ndi mwena Kilisto. Kadi ndi—ndi nnwambila, mvwa bulelela ngumvwa kaneemu kààbûngì bwa—bwa Mfumu wa ditunga Dwight Eisenhower. Mukalenge, ncyà bushuwa ne yêyè ùvwa muntu munene, mu wanyì pàànyì ngeelèlù wa—wa meeji. Bu yêyè mwa kufila kabidi mpala, ne mêmè ngeelelangana tukanda twa masungulangana, mvwa mwa kumwelela cyakabidi kakanda. Ncyà bushuwa. Nansha bu yêyè mwa kwikala—nansha bu yêyè mwa kwikala ne bidimu lukama, mvwa anu mwa kumwelela kakanda, bwalu ndi mumuswe. Nanku tumuvulukaayiku mu masambila etu diloolo edi.

J. T., ncyà bushuwa ne ndi ngaanyisha disangisha dilenga adi, nwênù bônso, dinùvwa benze wêwè ne Mwaneetu Willard mu lumingu elu adi. Bu ne mvwakù mubwelemu mfumina pambelu, nwênù bônso’s nuvwa nwamba ne: “Eyo, mpindyewu Mwaneetu Branham, udi mumanye’s, *bikampanda-bikansanga*.” Kadi mbitâmbekù bwîmpè bwa kushâàlakù anu mwimanyine pambelu mwikàle nnùtêeleja nwênù, kanwena numona nanku anyi? Eyo. Nanku, bîmpè be.

Ndi ne maekleeziya kampanda adi mangambile ne adi dijinga ne bampaasata, panwikalà nwênù baàswe, panwikalà badilongòlòle bwa kuya kenza bumpaasata mpindyewu, panwikalà bapete dilongeshiibwa. Ne, dyôdi diine, ndi ngeela meeji ne nudi badipete, ne nudi bônso bashîndamija bilenga. Ndi ne umwe mu Oregon, mikwabo mu Washington, mu Californie, ne mu Arizona, mu myaba mishîlèshîlàngâne. Nanku wêwè muswe bwa kwangata ekeleeziya anyì cintu kampanda, mona’s, mwab’ewu mene ki mwaba mwîmpè wà ditwadijila, mwab’ewu mene. Nanku kùdi misuuka munkaci mwa kudila myadi mu myaba yônso, nansha mene too ne mu bitùpà bya malaba bilamina ba-Indiens abi ne kwônso kunùdi baswe kuya aku. Nùtwâmbilaayi anu cyanààna, bwalu mêmè ndi ngiitabuuja ne nwênù balumyana nudi bashindaminemu patùdi twakulangana apa. Ncyà bushuwa. Mêmè ndi munange anu kubamona bënza nanku.

Kùdi Mwaneetu Ruddell mu njila kuntu kwàka. Nényekù bwa kamwenzela disangisha, mu matuku makese aa. Yêyè neênzè disangisha dya ditabuluja, Mwaneetu Ruddell awu. Ne ndi—ndi mvuluka ne kale wàwa bìvwa bikèngela bwa mêmè kwikala nsàka nsongàalùmè awu myaba yônso eku ne eku, nteeta bwa kumusàka bwa kukopokaye mu cikunyi ne kuyiishaye. Ùvwa yêyè anu ùdicîna be. Ùvwa wamba ne: “Ncyêna anu mumanye mwa kwakula to.” S’bìvwa bikèngela bwa nwênù kumuteeleja’s. Amen. Nwamonu anyi? Kwêna umanya cyùdi mwa kwenza to paùdi ulekela Nyuma Mwîmpè ùkupyà. Ncyà bushuwa.

Ne Mwaneetu Graham Snelling mu Utica, ne Mwaneetu Junior Jackson kuntu kwàka. Tudi—tudi tuyibala yônso ayi

bu ekeleeziya myakunyi yetu ya bakaji, miikàle anu mitwe ku cyetu. Tudi bônso pamwe. Katwenaku bapangakane pa bidì bitàngilà malongesha etu a nshindameenu, anyì matekemena etu ne tulumbilà twetu, malongesha etu a nshindameenu to, tudi cintu cimwe. Tudi wa taawu wa maawu, bintu byónso anu pamwe. Tudi ekeleeziya anu umwe. Kadi ncyà bushuwa ne tudi tujinga bwa kwikalabo batangàlàke myaba yónso; tudi naabo mu Afrike, bakwabo mu Inde, ne mu nyungulukilu mwónso, mu ditunga dijimà. Kwòkù aku ki kutùdi tujinga bwa kwikalabo, bàtangalaja Luumù.

Ne ndi mmona nsongààlùmè ya bitende yìdì yènda yibànda eyi, bu mùdì Mwaneetu J. T. Parnell ewu, ne—ne Mwaneetu Willard ne bakwabo, pàdibo bènda bàya apa, nsongààlùmè ya bitende, pàndì mèmè ngenda ngeela bidimu apa. Bu maalaba mwa kwikalaku, bóbò's ki bìikalà balume bàà maalaba abu. Ncyèna musweku bwa Mukenji ewu wùfwe to. KaWena anu mwa kufwaku to. Wùdi ne cya kutungunuka ne kwikala ne mwoyi. Ne mèmè ncyèna ngeela meeji ne tucìdi anu kabidi ne cikondo cyàbùngì bwa kuWutwala to.

Mwànà mukese wa mu diboko uvwabò bàmba ne neafwe awu, s'nyewu mmona wèwè nende mu ekeleeziya dituku dijimà dya leelu ewu, mwaneetu wa bakaji. Abi's mbilenga bya dikema. Tudi twela Mukalenge twasakidila bwa bwalu abu, bwa mùdì Mukalenge mwikàle wa ngàsà, mùle tente ne luse. Tungunuka wèwè anu ne kwitabuujà civwàbo bakwambile kaaba aka mene aci, wamonu's, yèyè neúmuvwè bìmpè.

Mpindyewu, dilongesha dìdì dìnùsànkisha anyì? Nudi banange dilongesha anyì? [Disangisha dìdì dyàmba ne: "Amen."—Muf.] Kaa, ndi—ndi—ndi cya bushuwa ngeela meeji ne dìdì dítwènzela bìmpè. Dìdì dítùpèèshakù ndambu wa diikisha ku disambidila dya babeedi, ne bikeena-kumona, ne dyondopa dya kùdì Nzambi. Mu bushuwa bwa bwalu, mpindyewu, diloolo edi tudi. . . Paanyima pàà disangisha, netusambidile cyakabidi babeedi, diloolo edi. Tutu misangu yónso anu baswe kwenza nanku, kubatiiza muntu kanà yónso pa dìbà kanà dyónso.

Mbanganyì bàdiku bàvùluka pàmvwà kale wàwa ngenda nkòntonona nshinga ya nzembu? Ee, mèmè nkààdi mwendende ngenda nkòntonona nshinga ya nzembu, misangu ne misangu, mwikàle ne cya kwenda kilòmèètà makumi anaayi ne mwandamukulu lwà makàsà mpicila mu cipeela. Mwwa ne kilòmèètà nkama yinaayi ne makumi anaayi ne mwandamukulu ya dyenda lwà makàsà bwa kulonda nshinga ya nzembu. Mwwa ngendela muntwamu, ne muteelu mukwata ku byanza, ne, kaa, mucyoke bibi be, ngenda mpicila mu bisuku ne meetu abi, ne mèbà mabishi byenda bintàpa. Mwwa ntwilangana ne cidime mukulumpe kampanda ne nsòmbela panshi mwinshi mwa mucu ne nyiikilangana nende pa bidì bitàngilà dibatijiibwa mu Dìnà

dya Mukalenge Yesu. Yèyè ùvwa mwa kwamba ne: “Ee, mèmè’s ntu misangu yònsò anu musingèjinge kubatijiibwa.”

Mèmè ne: “Apa kî nkule menemene ne kasulu to.” Ne yèyè uvwa mwa kwamba ne. . .

Nenku nkàadi muyààyaàye ne bààbúngì kuntwaku ne mubabatiize mu Dîna dya Yesu. Ntùuluka anu ku dikunji dya nzembu aku, nya lubilu ne mwànyì mwònsò. Ncya bushuwa. Misangu yàbúngì mwikàle muvwale bilàmbà byànyì bya kale bya mudimu abi, mbàtiiza muntu, mutuuluke buludi ku dikunji dya nzembu. Muzàngàme kuulu ku dikunji aku munkaci mwa kwenza mudimu; mvwa kabidi mulongolodi wa nshinga ya nzembu’s, mèmè, munkaci mwa kwenza mudimu ku dikunji aku, ne muntu kampanda, nyiikilangana nende pa bìdì bitàngilà Mukalenge. Ùvwa mwa kwamba ne: “Mona’s, Billy, dimwe dya ku matuku àdì panshi aa nèndwe ku ekeleeziya webè aku bwa mbatiijiibwe.”

² Mvwa mwa kwamba ne: “Bwa cinyì udi muswe kushààla mwindile too ne dîbà adi? S’nyewu tudi anu pabwîpi ne musulu mene, s’mùdì màyì búngì cyanààna.” Bàbàkùlaayi mpindyewu mene. Ncya bushuwa. Ki dîbà ndyòdì adi. Filìpò wàkamba ne. . .

³ Mutungu wàkambila Filìpò ne: “Mâyì’s ngòwò aa, ncinyanyì cìdì cìtùpangishà?” Ncya bushuwa. Cintu nansha cimwe. Wèwè pawìkalà mudilongolole, s’ki dîbà ndyòdì adi. Kùshìdikù dyabulu pàà kubwelela bwa kufunykaye cintu kampanda muntwamu to. Kulaadikiji bwa maalaba bintu byùdì mufwànyine kwenza leelu to. Mbifwànyine kwenzeka ne maalaba mwine awu kubèngayè kulwa bwebe wèwè. Ndi muvuluke musangu kampanda wùngààkenza cyòci aci, mèmè kuyiila, kumpèeshaci dileesòna. Ngàkalààdikija cintu cìvwà cìkèngelà bwa mèmè kwikala mwenze dituku kampanda, kadi dituku dya pàakacyàbu ki dîbà kwikaladi dimanè kupita.

⁴ Mpindyewu, ncya bushuwa ne ncyèna muswe kunulama dîbà dyònsò edi to. Kadi ndi anu ndwa mwangaciibwe bikole—bikole, nenku, ncyèna mumanye to, ndi ndyumvwa anu bîmpè mu mushindu wà ne ndi ngamba kwikala ncìcìyì mu mèmè to. Ndi ndyumvwa anu bîmpè menemene.

⁵ Mpindyewu twinyikààyaaku mitu yetu anu bwa katanci kakese cyanààna kumpala kwa twètù kulenga Dìyì.

⁶ Taatù wetù wa mu Dyulu, Wèwè ngudi Nzambi udi ne mwoyi, mwikàle ne mwoyi kashidi. Dîbà didì difùma ku dibwela edi, dîbà dimwedimwe adi, Danyèlè wàkaditàngila pàvwàdì dibwela, Yelèmiyà wàkaditàngila dibwela, Adàmà wàkaditàngila dibwela, Yesu wàkaditàngila dibwela. Kadi buloba bùdì anu bwòbù bumwebumwe ebù bùvwàbo basòmbèle ne bèndelapù abu, ne Wèwè ucidì ushààla anu Nzambi umwèumwè awu.

7 Diloolo edi nyewu kùdi malomba àbùngì. Muntu mulume mwikàle ne cyùjà cya kansere mu bwongò, mwaneetu wa bakaji kampana mwikàle ùciina cintu cimwecimwe aci. Wèwè, Mukalenge, ki ditekemena dimwepele didìku bwa cyôci aci. Cyùjà aci cikaadi cilwè kansere kàà lufu, kakùyì cintu nansha cimwe cidi mwa kwimanyikiibwa nansha. Cikaadi cintu cya cipite ngangabuka mutu kule ne kule. Kadi diloolo edi nyewu tuya ne ndundu wetù mukese wa nyuunyi, twenda tulonda mwànà wa mukooko awu, bwa kumwaluja mu lupangu lwa mikooko lwà Taatù. Mu Dîna dya Mukalenge Yesu nyewu tuludikila disambila dyetu bwa kushebeya nyama wa ntambwe awu, cyùjà aci, kansere kàà lufu aku, bwa kubaaluja mu dikubiibwa dyònsò mu lupangu lwa mikooko.

8 Nenku twètù, Nzambi, tudi cya bushuwa tuvùluka diloolo edi Mfumu wetù wa ditunga munanga, mwaneetu, Dwight Eisenhower wetù. Yèyè mmulombole ditunga, Mukalenge, mmuteete bwa kutwepula ku mvita. Úvwa mulaye ne mvita ya Corée yivwa mwa kujika bu ne yèyè ùvwakù ne mushindu kampana wà kuyijikija. Úvwa mulaye baamaamù abu ne ùvwa mwa kwaluja nsongàalùmè ayi. Kadi kwambaye ne: “Bwa mèmè kucyenza, ncyèna ne bukole bwa kucyenza to. Ndi mèmè mwa kwenza ne bwànyì bukole, kadi bikèngela anu Nzambi nkàâyendè àcyènzè.” Ne Wèwè uvwa nende, Mukalenge, ne patùdi twakulangana apa bwalu mbumane kutuuka bwònsò. Bwa cinyi kabàvwakù mwa kwikala bamòne ciine aci kwine kwònsò aku? Nzambi, ndi ndomba bwa Wèwè kumwambulwishaku. Beneshaku musuuka wà bukutu awu, Mukalenge. Ne tudi tulomba bwa Watùsungwilakù mulombodi wìkala mwa kulonda awu. Diswa Dyebe didyànjila kulongolola adi dyènzekiibwèku, Mukalenge.

9 Kadi Ewu utùdi tusankila diloolo edi ewu, pa kuumusha maalu a ditunga dyetu, ng’Ewu munene ne wa butumbi ulwàlwa bwa kushikika Bukalenge bwikalà kabùyì ne ndekeelu, Mukalenge Yesu, Mwan’Ebe awu. Dìbà adi bòbò nebungwiye bingoma mishiki; tungonga twa diimanyika dya mvita netudile twàmà ne kakwakwikala kabidi mvita to. Nebakune madimi a mvinyo ne nebadye tumuma twàmù. Nebiibakè nzubu, e kusòmbelamù. Ne kakwàkwikalakù ndululu dìbà adi paanyima pàà cyôci aci to.

10 Tùbènèshaakù mpindyewu patùdi tulenga Dìyì apa. Nenku, Taatù, Wèwè ngudi mumanye kabingilà kàdi kènza ne ndengele Dìyì pa Mufundu ewu mene. Mbwalu ndi—ndi ndyumvwa ne Wèwè udi muswe bwa mèmè kucyenza mushindu ewu, bwa ne ndiswa Dyebe dya Bunzambi, cidi mu dilondangana Dyebe dya maalu, cidi mu...ndilondangana dya maalu dya dituku, bwa kwenza ne bantu bàpetè kaaba kààbò ne biikalè badilongòlòle bwa dìbà dya mvita. Anu mwàmbì mwaneetu wa balume mu disambila dyèndè Kùdi katanci kakese aka

ne: “Kaa, Wêwè watùlongèshì ntanta mule be, Mukalenge.” Mpindyewu, Taatù, twàsààku mpèètà. Tutèèkaaku mwaba awu bwa citùdì ne cya kwenza, bwa twamòna mwa kwikala badifile ku maalu a Taatù. Bwalu tudi tulomba nunku mu Dìnà dya Yesu, Mwan’Ebe. Amen.

¹¹ Ndi mupicile mu mapingaja malenga a dikema mu mapingaja emu, nyiikilangana ne ngangabuka mwendè luumu mu Louisville, munganga wendè mukaji. Bàvwa bumvwe tulonda maalu a butumbi a Mukalenge. Ne tatwèndè wa munganga-mukaji awu ùvwa ngangabuka. Nenku munganga-mukaji awu kulwaye ne kusòmbayè mu cibambalu cyànyì cya mudimu ntanta mule menemene mu mapingaja amu, kubwelaye anu cyanàànà, mulwe kunkumbula. Muntu mulenga wa dikema; cibì wa ùshidisha maalu ndambu, nudi bamanye’s, mwikàle mu mushindu kampana Presbytérien wa menemene, mulelela wa kwònsò eku, kadi kuumukaye ne binsonji bimupwekela pa matama’s. Kaa, mèmè. . . Nzambi ùdi naabo kacya anu bààlamata mu myaba yònsò, mu maabirò a bangangabuka, mu baaminganga. Ncyèna ngeela meeji ne kùdikù munganga-mukaji mu Lupitaadi lwà Norton’s Infirmary ùndì nciyikù mwambile bujaadiki bwa dipeta dya Nyuma Mwîmpè to, ne mumukonkeku ní ùvwa mubatijiibwe mu Dìnà dya Yesu. Kakwena ngangabuka ùndiku mutwilangane nende, nansha penyì, anyì cintu nansha cimw- . . . Nwamonu anyì?

¹² Ikàlaayi nubambilaCi. Katwena ne dîbà dyàbùngì to, mwaneetu wa balume. Nansha cyòci cimwèka cikole bishi kaaba aka, indila wêwè anu too ne pawàpità e kuya dyàmwàmwà dya mweyelu wà ndekeela awu ne wêwè kumona, dîbà adi neujinge ne bivwa bikèngela bwa wêwè kwikala mucyènzè. Eyowa’s, mukalenge. Kwindidi too ne dîbà adi to, tùcyènzàayi mpindyewu mene. Dîbà ndyòdì edi. Kaa, mbafwànyìne kubènga kuciitaba, ne bàfiika munda bikole ne bàjuudilapù makokyanganyi ndambu, kadi kabeena bàcyènza ku bukole to. Ncyà bushuwa kabeena bàcyènza ku bukole to. Bòbò—bòbò—bòbò bàdi bîmpè. Pàdìbo bàjuula neebe makòkyanganyi, ùvulukè anu—anu ne, kabeena—kabeena cya bushuwa bàcyènza ku bukole to. Kabeena bàcyènza ku bukole to. Pàmwàpa mbabalongeshe anu cintu kampana ne bòbò bashààle bakwàtekù, pa nanku udi—udi mwa kumona mmwenenu wabò. Kkokyanganyi naabo to, kukòkyanganyi ne muntu nansha umwe to, kadi bàbweja anu buludi mu Cyòci aci ku dibànanga. Pashiishe ùbàsambidilè.

¹³ Ee, ngeela meeji ne tuvwa bapweke too ne ku mvensa wa 9, ncyèna mutwishiiibwe to. Aku’s nkule bikole ne nshapita mwi3, kî mmwòmò anyì, balumyana? Kadi kaa, s’Cidi mbwici mu lubwebe’s, bwànyì mèmè! Tuvwa twakula mpindyewu, nwavulukaayi, mbwa tûpetèku mwa kwambulula cyakabidi ndambu. Nenku mpindyewu, Mwaneetu Neville, wêwè—wêwè ungiimanyikeku mpindyewu bu mèmè mwa kupanga kumona

pàdì dìbà dipìta, bwa ngaamona mwa kwenza disambila bwa babeedi. Tudi baswe kwangata kasùnsukilà kònsò katùdìku mwa kwangata aku. Ne diloolo edi ndi muswe kwenza dibiikila dya ku cyoshelu. Ndi . . . Ndi ngooya ne eci, bwa bìdì bishààla ndi mwa kubibala anu cyaànà.

¹⁴ Kadi kiipàcìlà kàà cyôci eci, nkàà ne, kumona kaaba keebe mu Kilisto, kumona ne kî ncintu kampanda cyûdi mukabwelemu anu ku mpuukapuuka, anyi cintu kampanda cidi cifwànyine kwikala ne . . . cyûdi mukumbanyine mwaba kampanda to, kadi ncidi Nzambi mukwenzele, Yèyè mwine. Kî nne mpaùvwa mwîmpè menemene mu mushindu wà wèwè mukabwele mu ekeleziya diloolo kampanda, ne mwaneetu wa balume mukwate ne bya luse mukulombole ku cyoshelu to. Kadi kacivwa ng'aci to. Úvwa n'Nzambi, kumpala kwa difuka dya dyulu ne buloba, uvwa mudyànjlile kukulongolola ku Mwoyi wà Cyendelele. Pawàya kafikaku dituku adi, kabyena bikèmesha to pàvwa bakulu makumi anaayi . . . makumi abidi ne banaayi beele bifulu byabo bya butumbi panshi, umwe ne umwe mwele cifuku cyèndè cya butumbi panshi, umwe ne umwe mupone mutwe mpala panshi, kabàyi ne cintu cya dyamba nansha cimwe, muyiishi nansha umwe, mukulu nansha umwe, cintu nansha cimwe. Butumbi bwònsò kùdi Mwànà wa mukooko! Nzambi neakungwije bintu byònsò munda Mwèndè dituku adi. Kaa, twìkalapù nanshà mwa kumanya ne kujingulula ne Yèyè uvwabò bapoopele pa nkuruse awu úvwa Nganyi's wè. Mpindyewu ku . . .

¹⁵ Tudi tubangila ku mvensa wa 8, bwa kwenzaku dyambulula ndambu.

Udiyè mutùvudijìle twètù lungenyi lwònsò ne ditàlama,

Mutumanyishe twètù bwalu-busokoka bwa diswa dyèndè, . . .

¹⁶ “Maalu-masokoka a diswa Dyèndè.” Nenku nudi bavùlùke mutùvwa banengepù anyi? Mbanganyi bàvwàpu mu dinda emu, tumonaayibi. Mushindu wutùvwa basuminyine pa cyôci aci, “bwalu-busokoka bwa diswa Dyèndè.” Mpindyewu, kacyna anu kantu kakese cyaànà to, dìbà adi mbwalu-busokoka. Diswa dya Nzambi didi bwalu-busokoka. Nenku bìdì bikèngela bwa muntu yònsò mulume anyi mukaji yònsò kudikebelaye diswa dya Nzambi bwèndè yèyè mwine, bwalu-busokoka bwa Nzambi.

¹⁷ Tudi tubujandula munyi? Pòlò, bwàkamanyishiibwa kùdiye. Mmwambe ne yèyè kààkakonka muntu nansha umwe to, musunya anyi mashi. Kààkaya ku cilongelu nansha cimwe, ku seminere nansha umwe to. Kàvwa ne bwalu nansha bumwe bwa kuya kakebaku to. Kadi yèyè . . . Bwàkabuuludiibwa kùdiye kùdi Yesu Kilisto, Wàkatuutakeena nende mu njila wa ku

Damàsèkè awu, mu—mu Bukênkè bufwànàngàne ne Dikunji dya Kapyà, ki kumubiikilaBu. Ki kuyaye mu Arabie, ne kushàalayè bidimu bisatu kuntwaku. Kaa, kwênàku udifwanyikijila ne civwa ncikondo anyi, Mwaneetu Egan? Bidimu bisatu bìvwà Pòlò ùsanganyiibwa mu Arabie mwàmwa, ùfucila kazubu kakese mu mwaba kampanda, ùbànda ùpweka, ne mikanda mivunga yònsò ya kale ayi. Kabàvwa ne mipyamipya eyi to; Pòlò ngwákayifùnda, yàbùngì ya ku yòyi. Anu mu miine mikanda mivunga ya kale eyi, mùvwà Nzambi, ku cibangidilu, mudyànjlè kutulongolola ku Mwoyi wa Cyendelele amu. MùvwàYe mwa kutuma Yesu, bwa ku Mulambu ewu twamòna bònsò mwa kwikala ne bukenji ku Muci wa Mwoyi. “Aba bààkadyànjlàYe kumanya, Wàkabàbiikila; aba bààkabiikilàYe, Ùkaadi mumane kubabingisha; aba bàdìYe mubingishe, Ùkaadi mumane kubatumbisha.” Nzambi, kacya ku cibangidilu cya dyulu ne buloba, wàkadyànjlà kutulongolola ku ditèekiibwa dya bàna. Mpindyewu bufuki bujimà bùdi bùtwa mikemu, bwindile dimweneshiibwa dya bàna bàà Nzambi. Kaa, mèmè’s ndi mufwànyine kudifwanyikijila Pòlò ùpicila mu cikondo cilenga be. Mw’w’a kujingaku bwa ngíkala nende kuntwaku’s. Kadi wèwè?

¹⁸ Mpindyewu mmwambe ne: “Yèyè mmutùmanyishe bwalu-busokoka.” Wèwè anjì peta anu Nyuma Mwìmpè pambidi peebe apu musangu kampanda, nenku ùbangè anu kulondesha Aci kadi ùmonè mùdìCì cìya. Mu mapingaja emu, kaa, ndi mwangate tusunsa tutwè ku makumi asatu bwa kulonga, anu bwa kukenketa dileesònà adi cyanààna; pàmwàpa kaciyi aci to, ndi mwa kwamba ne ncyabibidi cimwe cya cyòci aci, tusunsa dikumi ne tutaanu munkàcìnkacì amu. Ki mèmè kuditwa mu dibipicisha ku cimwe ku cimwe, ki mèmè kudyambidila ne: “Bwalu-busokoka abu, mushindu mwine wùdìbu busokoka’s!” Ki Mifundu kungaaluja ku Dipungila Dikulukulu, pashiishe kungaaluja cyakabidi mu Dipungila Dipyadipya; yiswìkakaja cintu kapanda ne cikwabo, mmona bwalu-busokoka bwa Dilwa Dyèndè, bwalu-busokoka bwa diswa Dyèndè, bwalu busokoka bwa mutùdi basòmbe pamwe. Vùlukàayi ne, kabyenaku mwa kulongeshiibwa mu seminere nansha umwe to. Mbwalu-busokoka. Kwèna mwa kubimanyinaku ku dilonga dya tulaasa, ku teoloji to. Mbwalu-busokoka bùvwà busokoka kacya ku difuka dya dyulu ne buloba, bwindile dimweneshiibwa dya bàna bàà Nzambi.

¹⁹ Anjì ngambilaanyaàaku tũng, mwaneetu wa balume, anjì ngambilaanyaàaku tũng, mwaneetu wa bakaji, ndìbà kaayi divwàku bàna bàà Nzambi ne cya kumweneshiibwa pa kuumusha dìbà ditùdì mpindyewu edi? Ndìbà kaayi diikaadiku cikondo mu maalu-malonda, mùvwàbìkù bìkèngèle bwa kumweneshabo cikondo cya kusungila bufuki bujimà? Bufuki, bufuki bwòbù bwine bùdì munkaci mwa kutwa

mikemu, bwindile cikondo cya dimweneshiibwa. Mona's, kumpala kwa difuta dya cibawu kwenjiibwadi, kumpala mene kwa Nyuma Mwîmpè kupongolodiibwaYe, kumpala kwa Dipungila Dikulukulu dyônsò—dyônsò, too ne kwine kwônsò aku, kakùvwakù mwa kwikala mamweneshiibwa to. Bivwa bikèngela kwindiladi too ne cikondo eci. Mpindyewu bintu byônsò bikaadi bitwàdiibwe, munkaci mwa kulwa, byènda byàngata mbùngakeenu bitàngile ku dibwe dya mùsongà, ku mamweneshiibwa a bàna bàà Nzambi bàdi munkaci mwa kwalukila, ne Nyuma wa Nzambi ùbwela mu bôbò bantu aba, mu bupwàngàne bwônsò, mu mushindu wà ne mudimu wabo wà bwambi newikalè mufwanangane anu menemene ne wà Kilisto too ne mwikalàwu mwa kuMusangisha ne Ekeleeziya Wendè pamwe.

²⁰ Mbanganyì bàkaadiku balongè bwalu-bulonda bwa bipaapu bya misàkà? Ngeela meeji ne inábànzà umwepele kaaba aka ngwedi cyanza muulu. Eyo.

²¹ Nzambi ùtu mufunde Bibles yisatu. Umwe wa ku yôyi ùvwa n'Cidiminzaji mu mauulu, ki Bible wa kumpala. Bivwa bikèngela bwa muntu kwikalaye ùtàngila muulu bwa kumanyaye ne Nzambi ngwa kuulu. Londàayi Cidiminzaji, kacya nukàadikù bacilongè anyi? Cidi mene cifila cikondo ne cikondo cyônsò, nansha mene ne cikondo cya kansere. Cidi cifila ntwadijilu, cya kumpal- . . . dilediibwa dya Kilisto. Cimfwànyì cya kumpala mu Cidiminzaji ncinyi? Virgo. Cimfwànyì cya ndekeelu ncinyi? Leo nyama wa ntambwe. Dilwa dya kumpala ne Dilwa diibidi dya Kilisto, byônsò abi mbifundamù.

²² Pashiishe Bible udi ulonda wàkafùndiibwa, ùvwa mmu dibwe, bàmbiikila ne m'“bipaapu bya misàkà.” Nzambi wàkamufùnda mu bipaapu bya misàkà. Nwènù babilongè, nùtangilàayi maalù-malonda a kale awu, ne mvita, mùvwàbi biibàkiibwe kumpala kwa kabutu kàà musangu wà mvula wa Noa.

²³ Mwisàtù wàkafùndiibwa pa mabeji, Bible, bwa bantu banene bàà meeji matwe ne maalù a mamanya bàvwà bàlwa. Mpindyewu, bu mùdibi ne Nzambi mmwendè mupicile mu bikondo, tudi ku Leo nyama wa ntambwe. Tudi ku dyasa dya mùsongà wa cipaapu cya musàkà. Tudi mu Mukanda wà Bwàkabuulwibwà, ku nshapita wa ndekeelu. Maalu a mamanya àdi àmba ne tudi pa dibà mundankulu kushàadile tusunsa tusatu. Kaa, elaaibi meeji mwaba wutùkaadi.

²⁴ Nenku monaayi, twàngatàayi cipaapu cya musàkà, mbipeepele. Ncyenze anu mùdi cipaapu cya matumba asatu amu.

²⁵ Patùvwà kaaba aka biikàle tubanga ne cikondo cya kumpala cya ekeleeziya, paanyima pàà Dilongolola mu cikondo cya Luther, muntu yéye mudidinge anu mwambe mùdiye

mwená Kilisto, s'cívwa bwèndè yêyè cilumbu cya mwoyi anyi cya lufu. Bàvwa bàmushebeya nansha bwa dyamba mene dya ne yêyè mmwena Kilisto adi. Ki bwa cinyi bwa kupicila mu dikengeshiibwa. . . Cikondo ne cikondo cyònsò, díbà dyònsò, kùvwa anu dikengeshiibwa. “Aba bònsò bàdì ne nsòmbelu wa difwana dya Nzambi mu Kilisto Yesu nebapicile mu dikengeshiibwa.” Mu cikondo cya Luther, cívwa ncintu cibi be bwa kwamba ne “Luthérien.” Bàvwa bàkwangata bu mukoleshi wa maalu, ne wêwè mufwànyine kushiipiibwa. Misangu yàbúngì bàvwa bàbàshebeela ku dikunji dya kwoshelanganaku, bàbòòsha, ne bikwabo byònsò, ne bwalu mba-Luthériens.

²⁶ Pashiishe ekeleeziya kubùmbakanayè, mwenze mùdì cipaapu cya musàkà. Wàkabwela mu citùpà cikwabo cya ngàsà, cívwa dijidiibwa. Mu cikondo cya Wesley, pàakatontololàye ekeleeziya wa ba-Anglicans, wàkalongesha dijidiibwa. KulwaYe cyakabidi wa banyààbanyà, díbà adi kubabiikilabo ne mmusùmbà wà bakoleshi bàà maalu.

²⁷ Mbanganyi kaaba aka bàvwàku ba-Méthodistes, anyi bàvwàmu kale, anyi bàvwàku musangu kampana baswikàkàne ne ekeleeziya wa ba-Méthodistes? Cyabibidi cimwe cya kunùdì. Nudikù bamanyè ne ekeleeziya wa ba-Méthodistes musangu kampana úvwa ciibwìpì ne kwikala ne Nyuma Mwìmpè anyi? Mémè nkààdikù muye mu ekeleeziya ya ba-Méthodistes ne mubamone bàdishinda panshi, kadi bàbèèla màyi kwisù eku ne bàbèèla lupeepele ne cipeepudi, bwa kupangisha Nyuma Mwìmpè bwa kulwaYe pambidi pààbò. Ncya bushuwa's. Mpindyewu, aci mbulelela, mu tukùnà twa mu Kentucky mutùvwà ne ba-Méthodistes mwàmwa. Nwènù balumyana's mbàdì bashààle bàà ku ekeleeziya kaaba aka. Tuvwa ne ba-Méthodistes kuntwaku, ne ba-Baptistes. Tuvwa tuyá katwà binù ku cyoshelu ne tutuutangana tuumapi paanyima muntu ne mukwèndè too ne patùvwà tupeta cintu kampana. Patùkaadi bamanè koobeka kaaba aku, tuvwa ne nsòmbelu mushiilàngàne paanyima pàà cyòci aci.

²⁸ Kadi nwènù nulwàlwa anu cyanàànà nufùnda dìnà mu mukanda nwamba ne: “Ndi Méthodiste.” Ne bàngata kandundu kàà kumyamina naaku mukele ne bàkumyamina tuumàyi ndambu, pààkù kumba kùjika. Nupàtuka nuya kavwàla tuputulu, nudilaaba bilaabu kwisù, nwenza manayi a mbilu ya dipiiyangana a pa tubalu, nudya mpiku, nunaya manayi a mfranga, nunaya ku mashinyi a binjànjà bya mfranga ne bikwabo byònsò, cibi biikàle anu ba-Méthodistes bimpè, nwamonu's. Abu kí mba-Méthodistes to. Abu's bàdì anu bakashààdì bàà ku ekeleeziya. S'ncya bushuwa. Ba-Baptistes, bya mwomumwe, ba-Presbytériens, anu bya mwomumwe.

²⁹ Mùvwà David duPlessis wàmba ne: “Biikùlù, Nzambi kàtu ne biikùlù to.” Kacya Nzambi kàtukù ne mwikùlù to. Yêyè útú

ne bânà, kadi kàtu ne biikùlù to. Ncya bushuwa. Nwênù... ne bantu bàtu bàbwela mu ekeleeziya wa ba-Méthodistes abu, anyì mu ekeleeziya wa beena Mpenta, anyì mu ekeleeziya wa ba-Baptistes, ne bwalu tatwèbè anyi mamwèbè ùvwa mwena Mpenta anyì Baptiste, dîbà adi wèwè's udi mwikùlù. Bòbò mbàvwà bânà. Wèwè udi mwikùlù, wamonu's. Kadi Nzambi kàtu ne cintu bu nanku nansha. Ekeleeziya ngudi ne bya nanku bûngì cyanààà, kadi kî—kadi kî—kî—kî... Nzambi kàtu Yèyè naabi nansha.

³⁰ Mpindyewu, monaayi aba, too ne mùdìbi byènda bìya mpindyewu, pàdiye ùkafika ku banyaàbanyà, ekeleeziya. Cikondo cya beena Mpenta cyàkalwa. Ncya bushuwa ne aci cyàkakòsa bikùnàkùnà bûngì cyanààà. Pashiishe cyàkenza cinyi? Cyàkashìya anu ba-Méthodistes ne ba-Luthériens bònsò paanyima.

³¹ Mpindyewu Nyuma Mwîmpè mmushiye cikondo cya Mpenta kule kutàmbe. Cyàkenzàbo ncinyi? Bàakadyènza bulongolodi, bòbò biine ne: “Twètù tudi Assemblées de Dieu.” “Twètù tudi ba-Unitaires.” “Twètù tudi ba-Binitaires.” “Twètù tudi Église de Dieu.” “Twètù tudi *cikampanda*, anyì *cikansanga*. Wèwè kùyi ne aku to, kwèna mwa kubwela mu Dyulu to pawikalà kùyi ne dîna dyebe difunda mu mukanda wètù twètù.” Kaa, macimbu's wè! Nansha wèwè mwikàle Baptiste, Méthodiste, Presbytérien, funda dîna dyebe mu Mukanda wà Mwoyi pàdi Nzambi ùdîfundamù apu. Piikalàbi ne wèwè ukààvwa mudyànjila kulongolola ku Mwoyi wà Cyendelele, Nzambi neakubiikile mu mushindu kampanda, nansha bishi, mu mushindu kampanda—kampanda anyì mushindu mukwabo. Ncya bushuwa ne Yèyè neakubiikile. “Bònsò bàdi Taatù muMpèeshe nebalwe kùNdi.” Nansha wèwè mwikàle wa mu ekeleeziya kaayi, aci kaciyena ne bwalu to. Kadi dingumba kadyàkukwenzelakù cintu nansha cimwe to, kadi ndifwànyine kukupangisha bikole bwa wèwè kutungunuka ne Nzambi, kadi kadyà—kadyàkwenzakù cîngà cintu nansha cimwe to. Didì dyòdi dikusanga ne musumbà wà beena kwitabuuja ne beena bupidya. Mu bushuwa bwa bwalu, udi utwilangana ne cyòci aci kwònsò kùyaayà, ne bàvwa ne cya nanku nansha mu Dyulu mwine. Pa nanku, bidì anu bîmpè, kadi wèwè udi weyemena dingumba dyenu. Ikàlà mweyemene Yesu, Yèyè ngudi ukèngela kweyemena.

³² Mpindyewu patùdi munkaci mwa kupweka buludi batàngile ku...bàvwa...Mbanganyì...Ngeela meji ne mukaji ewu ùvwa mwele cyanza muulu ne, wèwè udi mulonge bipaapu bya misàkà. Nudi bamanye's, cipaapu cya musàkà aci kacya kacya kacyàkaashiibwakù mùsongà nansha, mmwòmò anyi? Kacya kadyàkatèèkiibwakù dibwe dya ku lusongo pöpù to. Kacya, dyòdi diine kabààvwa mene mwa kudipetakù to. Kî mbamanye ne cidì cidiyènzèkèle ncinyi to. Bwa cinyi? Dibwe dya ku lusongo adi kadyàkatèèkiibwapù bwa cinyi, dibwe dya mùsongà adi, ku

lusongo kwàcì aku? Bwalu Yeyè wàkabèngiibwa pàakalwàYe. Yèyè nguwwa Dibwe dibèngiibwe adi. Ncya bushuwa. Kadi necyashiibwe mùsongà. Ncya bushuwa. Ne pashiishe mabwe àdì àkùmbananganà ku nyungulukilu wa Dibwe dya mùsongà adi awu, nebikengelè bwa kwikalawu mabwe ikalà mafwànàngàne anu menemene ne Dibwe adi, diikalà mwa kukumbanangana naaci adi, àtwàngana mu mwaba wònsò—wònsò. Cipaapu cya musakà aci ncipwàngàne anu menemene mu mushindu wà kùyikù mwa kupicisha kapaaya keetu aka munkaci mwa mabwe awu to, mwaba wùdì mabwe awu matwàngàne awu. Ngiibàkilù mulenga wa dikema. Amwe a ku ôwò àvwà mafwànyine kwikala ne bujitu bwa nkama ya binunu bya kilò muulu mu lupeepele amu, kadi mashikika matwàngàne mu mushindu mupwàngàne menemene.

³³ Mushindu awu ngùdì Nzambi ùfikisha Ekeleeziya Wendè. Twètù tudi batwàngaja bakùmbànàngàne anu menemene, ne mwoyi wumwe ne dīyì dimwe. Mpindyewu muntu ùjuuka wàmba ne: “Ee, ba-Luthériens kale wàwa kabàvwa ne kantu nansha kamwe to.” Kanwitabuujuke aci to. Ba-Luthériens nebalwe mu dibiika dya ku lufu anu mwàlwà bakwabo bònsò mu dibiika dya ku lufu amu. Ba-Baptistes, ba-Presbytériens, ne bânà bàà Nzambi bònsò, nebalwe mu dibiika dya ku lufu adi. Nenku ki bwa cinyi leelu ewu bantu bàdi bàmba ne: “Kaa, ee, nekùpatukè ditabuluja dikole mwab’ewu dyàsungilà beena Mpenta milliyò lukama. Bònsò nebasungidiibwe ne Dyambwibwa nedyenzeke.” Udi mutùpàkàne. Adi Dyambwibwa nediiikalè dya bantu binunu nkama, ncya bushuwa, kadi’s nebiiikalè cipeta cya bidimu binunu bisambombo bya lupandu bisanga, bidimu binunu bisambombo bikaadi bipite abi. Muntu ùdi wendela mu Bukènkè pàdì Bukènkè bùlwa kùdīye, ùsabuka bilamba pàdīye ùfikapù. Mpindyewu, yèyè muBubenge, dībà adi ùdi ùshààla mu mīdimà. Kadi yèyè mutungunuke ne kwenda kuya!

³⁴ Mpindyewu, monaayi, nenku Dilwa dya Mukalenge Yesu didi pabwipi menemene mu mushindu wà ne Nyuma udi mufumine lwà mwinshi emu awu . . . anu ndambu cyanààna wa dibingishiibwa, dijidiibwa, dibatiiza dya Nyuma Mwimpè, ne mpindyewu kubwela buludi mu cikondo cya dilwa dya Dibwe dya mùsongà. Ekeleeziya ùdi ne cya kwikala mufwànàngàne menemene ne Kilisto mu mushindu wà ne Kilisto ne Ekeleeziya bàdi mwa kudisanga, Nyuma umwèumwè awu. Ne Nyuma wa Kilisto Yèyè munda mwebe, Ùdi ùkufikisha ku diikala ne nsòmbelu wa Kilisto, ku dyenza maalù a nsòmbelu wa Kilisto, ku dyenza dya byenzedi bya Kilisto. “Ewu udi uNgiitabuuja, byenzedi bíNdi ngenza yèyè neàbyènzè pèndè.” Yesu ngwákamba nanku. Nwamonu anyi? Mpindyewu netwikalè mwa kupeta, tudi ne mudimu wa bwambi wùlwalwà wùdì mufwanangane anu menemene ne nsòmbelu wa Kilisto. Mudimu wà bwambi awu wùdì wùmaniyisha cinyi? Dilwa dya Mukalenge.

35 Cìtàngilaayi pa buloba leelu ewu, ne tângilàayi cidi Khrouchtchev munkaci mwa kwamba, bikwabo bintu binene ebi, ne ndululu minene ya buloba bujima yidi pabwipi menemene eyi, pa dibà kanà dyònsò, s'mbifwanyiine kutudika mu kasunsukila kàà kasunsa kanà kònsò. Ncya bushuwa's. Ne byòbi nanku, tudi tumanya ne cikaadi pabwipi. Muntu kanà yònsò wa luumvu ewu's ùdi mwa kubala mu cibebibeji anyi kuteeleja ku cisanji, ne kumanya ne cikaadi pabwipi. Ee, nwavulukaayi ne, Kilisto ùdi ùlwa bwa kwangata Ekeleeziya Wendè kumpala kwa cyòci aci kwenzekaci. Pa nanku Dilwa dya Mukalenge Yesu dikaadi pabwipi pàà mushindu kaayi? Pàmwāpa kumpala kwa disangisha edi kujikadi diloolo edi's. Tudi ku cikondo cya nshiikidilu. S'ncya bushuwa anu cyetu cya menemene eci.

36 Tàngilàayi numone ekeleeziya mùdiye mulwe, mùdiye muye kumpala. Anji cyàngataayi anu cyanàànà mu meeji, nwènù balongi bàà maalu-malonda bàtù bàlongà maalu-malonda abu. Tàngilàayi ekeleeziya wa ba-Luthériens mu dibingishiibwa, mucikàle ùpàtukilakù mu cyena Katolike, mutangilaayi mùdiye muye kumpala. Pashiishe tângilàayi mùdi Wesley wènda ùtamba kuseemena ndambu, ùbwela mu dijidiibwa, ùtùkina mu Mifundu. Tàngilàayi buludi lwà pankaci apu, cikondo cya Wesley aci. Pashiishe cintu cyàkalondà cyàkalwà cìvwa ncikondo cya Mpenta. Nenku cikondo cya Mpenta ne dyalujulula dya mapà, mapà a Nyuma. Mpindyewu, tângilàayi cikondo cidi munkaci mwa kubànda mpindyewu too ne ku Dibwe dya mùsongà. Nudi bamone cìndi njinga kwamba aci anyi? Dilwa dya Mukalenge, cidi cimanyishiibwe. Nzambi ne bifukiibwa byònsò mbindile bwa ekeleeziya àpetè kaaba kèndè.

37 Lutatu leelu, mèmè...pamwe ne bantu bònsò bândiku mutwilangane naabo. Bààkampàtula, tuvwa twangata...Bidi bikèngela bwa mèmè kupicila ku diteeta dya mubidi, nudi bamanye's, piikalàbi ne tuyàaya dyàmwàmwà dya mbù, nwènù bampandanjila ne bakwabo nudi bamanye aci. Pàmvwà mpicila ku diteeta adi bàvwa bapàtùke naanyi mu cibambalu amu kuntwaku, mvwa nnwa bintakanyi bya kale abi...bimwèka kùndi bu musabusabu, anyi bukula, anyi cintu kampanda nanku awu, nenku mvwa—mvwa munkaci mwa kubinwa. Ki mèmè kupatuka pambelu apu, kusòmbela panshi, kushààla mwindile tusuna makumi asatu bwa kumona ní bìvwa mwa kupatuka munda mwanyi anyi to. Mèmè kutangila luseke lukwabo lwàlwa, nyawu kùvwa mukaji kampanda mukese, ùmwèka anu bu ne ùvwa pabwipi ne kufwa. Ùvwa...tukolo tukese ne tuboko tukese. Nenku mèmè kutungunuka ngenda mpweka nguumuka kùdi ewu muntu mulume nya kùdi wàwa, kùdi ewu muntu mulume kuya kùdi wàwa, ntamba kuya ngenda nseemena mutàngile kùdi mukaji awu, too ne mungàalu kufika mwaba wùvwàye ùsanganyiibwa awu. Ùvwa ne mmwenekelu wa muntu mukese mukwate ne bya luse mwikàle wamba kufwa. Ki mèmè

kufika pabwîpì nende apu, kwamba ne: “Ûmfwilèku luse, mwâbânà.”

Yèyè ne: “Wetwawu!” Kaa, ùvwa ùsaama bya bibi be!

Ki mêmè ne: “Udi umvwa cinỳì?”

³⁸ Yèyè ne: “Mvwa muye ku Tucson bwa kuya kasàmba mwanàànyì wa bakaji. Mêmè kusaama, kî mbafike ku dyangula disaamà to.”

³⁹ Mêmè ne: “Cintu cimwepele cìndi njinga kukukonka.” Mêmè ne: “Mêmè ndi muyiishi wa Evànjeeliyò. Wèwè udi mwena Kilisto anyi? Udi mudilongolole bwa kuya bu dîbà adi mwa kulwa anyi?”

Ki yèyè ne: “Mêmè ntu wa mu ekeleeziya *kampanda*.”

⁴⁰ Mêmè ne: “Aci kî ndukonko lúndì mukwele to. Wèwè udi mwena Kilisto mùle tente ne Nyuma wa Nzambi mwikàle mudilongolole bwa kuya pààkubiikilàYe anyi?” Mukaji awu kàvwa nansha mumanye ne cîmvwà ngamba ciine aci ncinganyì to. Nwamonu anyi? Kaa, mu mmwenekelu mwine wa ùkwàta ne bya luse mùdì bàà pa buloba bàsanganyiibwa’s wè!

⁴¹ Mpindyewu, “mutumanyishe maalu-masokoka a diswa Dyèndè,” dilwa. . . Ngǎnji nnubadileku cintu *kampanda*. Mvwa munkaci mwa kubala mu. . . Tùbuululàayi mpindyewu mwaba wa “bwalu-busokoka bwa diswa Dyèndè” awu. Twǎnjàayi kubuulula mu Ebelu emu bwa katanci kakese cyanàànà, nshapita wa 7 wa Ebelu, ngeela meeji ne nyèyè awu. Nenku ndi muswe kunubadilaku cintu *kampanda* cìdì cifwànyine kunufikisha ku didyumvwakù bilenga be patùdì twela meeji ku diikala basòmbe pamwe mu myaba ya mu Dyulu apa. Ebelu, nshapita wa 7.

*Bwalu Melekisedekè ewu, (Tàngilàayi mpindyewu.)
mfumu wa Salemà, mwakwidi wa Nzambi mutàmbe
bunene wa mu dyulu, . . .*

⁴² Bwalu-busokoka bùdì cinỳì mpindyewu? Bwalu-busokoka mbwòbù ebu, tàngilàayi eci. Muntu ewu nganyì, “mwikàle wèntza, ùmanyisha, bwalu-busokoka bwa diswa Dyèndè,” Melekisedekè ewu? Ndi mwindile bantu bônso kaaba aka, bàcìdì munkaci mwa kubuulula Bibles, Ebelu, nshapita wa 7, Pòlò ngudi wakula ewu, mufùndì umwèumwè wa Galàtiyà awu.

*Bwalu Melekisedekè ewu, mfumu wa Salemà,
mwakwidi wa Nzambi mutàmbe bunene wa mu
dyulu, . . . yèyè wàkatwìlangana ne Abraham pàvwàye
ùfùma ku dishebeya dya bamfumu, ne wàkamubènesha,*

*Yèyè kabidi ngwàkapèèshabò citùpà kùdì Abraham,
citùpà cya dikumi cya byônso awu; dyambedi mwikàle
dyumvwija, bilondèshile dyumvwija ne Mfumu wa
bwakane, . . . paanyima pàà aci. . . Mfumu wa Salemà,*

(Ewu Muntu nganyi?) *mbwena kwamba ne, Mfumu wa ditalala,*

Kàyi taatù, kàyi maamù, kàyi bankambwa, kàyi ne mbangilu wa matuku, anyi ne ndekeelu wa mwoyi ; . . .

43 Ewu Muntu ùvwa nganyi? Ùvwa nganyi? Kacya Yèyè kàvwakù ne taatù, kacya Yèyè kàvwakù ne maamù, kacya Yèyè kàvwakù ne dîbà dyàkabangàYe, anyi kàvwakù ne cikondo cya ne Yèyè wàdyàakufwàku to. Wàkatwilangana ne Abraham pàvwàye ùfuma ku dishebeya dya bamfumu. Cìvwàye wènza aci ncinyi? Ùvwa muye bwa kwangata Lota, mwanaabo mujimine, bwa yèyè kumwaluja. Ki kushebeyaye bamfumu abu; bàà bwalu, bamfumu abu's bàvwa bàshebeya, ngeela meeji bamfumu dikumi anyi dikumi ne bataanu, ne makalenge àbò. Kadi Abraham yèyè wàkapèèsha basadidi bèndè bya mvita ne kuyabo bènda bàkèbangana nende, kuditapululaye bufuku, nwamonu's, pàakamukwàtàyè mu mèbà a bufuku. Kaa, mwaneetu, twètù's tudi tukwata mudimu mu mîdimà patùdi twakulangana apa, Bukênkè bumwepele butùdìku naabu bwikàle anu Bukênkè bwa Evànjeeliyò. Kadi yèyè wàkaditapulula, ne wàkamukwàta ne wàkamwaluja. Kadi mmu njila wa dyalukila amu, paanyima pàà mvita mimane kujika!

44 Tuyaayi ku Genese 14, bwa katanci kakese cyanààna, bwa kutàmba kutookeshaku bwalu abu. Tuyaayi mu Genese emu, mu mwinây-. . .ngeela meeji ne ngwa dikumi ne mwi4, Genese 14. Eyowa, twàngatààyi Genese 14.18, bwa kubangilapu. Tùbangilààyi anu kumpala kwa cyòci aci ndambu. Tùbangilààyi, eyowa, ku mvensa wa 18, Genese 14.18: "Nenku Melekisedekè. . ." Mpindyewu, awu ng'Abraham mpindyewu mwikàle wàlukila ùfùmina ku dishebeya dya bamfumu. Mwikàle wàlukila, mu njila wa dyalukila amu, mwikàle wàluja Lota, ne bantu bònsò bàvwàbo bakwàte bayè naabo abu. Bònsò!

45 Byenze mùvwà Davidi, wàkaya ne kukwata. . .Cyàkenzà Davidi ncinyi? Wàkangata ndundu mukese wa nyuunyi, kuyaye ne kunyengaye mwànà mukese wa mukooko ewu mukana mwa nyama wa ntambwe. Elààyibi meeji ku ndundu wa nyuunyi, ùlonda mwànà wa mukooko. Nganyi ku bàfwà ne ku bàbolà udikù mufwànyine kwenza cyòci aci? Ngambilaayi muntu wetu wa maci ne mèsù ewu kaaba aka udi mwa kucyenza, èlè cyanza muulu tûng. Mèmè's nènkwambile ne lukasa lwònsò ne udi mutupakane. S'nwamonu ne mèmè ncyèna mwele cyànyè cyanza muulu. Bwàlà, mèmè ncyènakù mufwànyine kumulonda ne cingoma cya 30-0-6 to, mbikole. Kadi yèyè wàkamulonda ne ndundu wa nyuunyi, cyenze bu kapese kakese kàà ciseba keetu aka, ne tuumilemu tubidi tuswikilakù ùkànyungulula. Bwalu. . . Kadi pàakalwà dîbà dya Goliyààtà bwa kuditambishaye, yèyè kadi kuyilaye Goliyààtà awu, kwambaye ne: "Nzambi wa mu Dyulu wàkampà mwa kusungila mwànà wa mukooko mukana mwa nyama wa ntambwe, mukana mwa nyama wa ours." Ùvwa

mumanye ne kacivwa nndundu wa nyuunyi to. Cìvwa mbukole bwa Nzambi búvwà bukamufile. Úvwa n'Yèyè wàkaaluja mwànà wa mukooko awu.

⁴⁶ Ne cyòcì aci ki citùdì twètù twamba leelu ewu. Nzambi ùdì ne ba-Davìdì biimàne mánzàlànzàlà eku ne eku, eyowa's, mukalenge, munkaci mwa kudiisha mikooko ya Taatù. Ne ku musangu ne ku musangu cyùjà cya kansere necilwe, anyi kansere nekalwe, anyi cintu kampanda, ne cìbàfuka ngangabuka mu byanza. Aci kacýàkwimanyikakù Davìdì awu to, yèyè neatungunuke ùpàtuka kwaka ùlondangana ne mukwetu awu, mwambule ndundu mukese wa nyuunyi, wa ne: "Lombaayi cintu kanà cyònsò mu Dìnà Dyànyi, necifidiibwe." Nansha byòbì ne, ngangabuka yìdì mwa kuseka, ne bantu bakwabo bònsò bàdì mwa kumwelulwila, yèyè neamulonde nansha bya munyi, wàluja mwànà wa mukooko awu mu lupangu lwa mikooko. Eyowa's, mukalenge. "Yèyè mmwànà wa Nzambi, umusha cyanza cyebe pambidi pèndè!" Kubyankulaye nyama wa ntambwe ewu panshi, pashiishe nyama wa ntambwe awu ùjuuka, kumukwataye ku mwedi kadi kumushebeyaye; kànà kàà balume kakesèè kàà mubidi mukunzubile, kàà bujitu pàmwàpa bwa kilò makumi asatu ne yisambombo anyi makumi anaayi.

⁴⁷ Tàngilàayi. Melekisedekè, Mfumu wa Salemà udi Mfumu wa Ditalala awu, bu mùdìbì mu bushuwa bwa bwalu ne Salemà ùdì ùsanganyiibwa luseke lukwabo lwà kakuna. Yèyè m'Mfumu wa Yelusàlèmà, ki cìvwaYe. Ki cìvwaYe menemene, Mfumu wa Yelusàlèmà. Bu mùdìbì ne, Yelusàlèmà ùvwa ùbìikidiibwa kumpala ne n'Salemà, cìvwa ditalala; cìvwa n'Yelusàlèmà kumpala, kumpala kwa kubiikidiibwaci ne n'Yelusàlèmà. Yèyè ùvwa Mfumu wa Yelusàlèmà. Úvwa Mfumu wa bwakane, Mfumu wa ditalala, Mfumu wa Salemà. Kàvwa ne taatù, Kàvwa ne maamù, Kàvwa ne mbangilu wa matuku, Kàvwa ne ndekeelu wa mwoyi, Kàvwa ne bankambwa nansha. Kaa, kaa, kaa! Ewu Muntu nganyi? Mukenketaayi numone. Paanyima pàà mvita mimane kujika, paanyima pàà bucimunyi bumana kwangata, tàngilàayi numone cyàkambàYe. "Nenku Melekisedekè," mvensa wa 18, nshapita wa 14, Genese.

Nenku Melekisedekè mfumu wa Salemà wàkalwa ne dyàmpà ne mvinyo: ne yèyè ùvwa mwakwidi wa Nzambi mutàmbe bunene wa mu Dyulu.

Nenku yèyè wàkamubènesha, e kwambaye ne: Abram àbeneshiibwè kùdì Nzambi mutàmbe bunene wa mu Dyulu, mwena maulu ne buloba!

Ne Nzambi mutàmbe bunene wa mu Dyulu àbeneshiibwè, yèyè udi mufile beena lukuna beebe mu cyanza cyebe awu! Nenku kumupeeshaye cyadiikumi cya byònsò.

⁴⁸ Tuyayibi kule ndambu ne dibala.

Nenku mfumu wa Sodomà wàkambila Abraham ne: Mpèèshè mèmè bantu, wàngatè bintu bwebe wèwè.

Kadi Abram wàkambila mfumu wa Sodomà ne: Nyewu ndi mujuule cyanza cyànyì muulu kùdi MUKALENGE, Nzambi mutàmbe bunene wa mu Dyulu, mwena maułu ne buloba ne, (Tèèlejàayi mùdiye mucikosoloje, hum, mùdiye mumwambileci!)

Ncyàkwangatakù kantu to kubangila anu ku kanshinga kàà bwàndà too ne ku nshinga wa cisabaata, ne ncyàkwangatakù kantu nansha kamwe to, kantu nansha kamwe kàdi. . . ne udi mufwànyìne kwamba, ne kàdi keebe wèwè, bwa kwikadi wàlwa kwamba ne: Mèmè ngudi muvwije Abram mubanji.

Pa kuumusha anu bìdi nsongààlùmè yìdya, . . .

⁴⁹ Monaayi Melekisedekè ewu pàdiYe anu ùtwilangana ne Abraham pàvwàye ùfuma ku dishebeya dya bamfumu apu. Bwalu-busokoka bwa Nzambi abu mpindyewu munkaci mwa kumanyishiibwa's! Yèyè ùvwa nganyi? Muntu nansha umwe. . . Kabeenaku mwa kupeta bwalu-bulonda Bwèndè Yèyè nansha bumwe to, bwalu Yèyè kàvwakù ne taatù, Kàvwakù ne maamù, kacya Kàvwakù ne cikondo cya ne Yèyè mmubange, kacya Kàvwakù ne cikondo cya ne Yèyè ùvwa mwa kufwa to, ní Ùvwa nganyi Yèyè ùcidi anu ne mwoyi. Kacya Yèyè kàvwakù ne mbangilu to, pa nanku Yèyè kàvwakù mwa kwikala mungà muntu to anu El, Elah, Elohim; udi wikalaku nkààyèndè, udi musòmbèle pàà nkààyèndè, Nzambi Wa bukole bwònsò awu!

⁵⁰ Yesu ùvwa ne Taatù, Yesu ùvwa ne maamù; Yesu ùvwa ne mbangilu wa matuku, Yesu ùvwa ne ndekeelu wa mwoyi wa pa buloba. Kadi ewu Muntu Yèyè kàvwakù ní nne taatù ní nne maamù to, amen, ní nne taatù ní nne maamù to. Yesu ùvwa naabo bònsò babidi Taatù ne maamù. Ewu Muntu Yèyè kàvwakù ní nne taatù ní nne maamù to. Amen. Kadi cyàkenzàYe ncinyì, paanyima pàà mvita mimane kujika, paanyima pàà Abraham mumane kwangata kaaba kèndè?

⁵¹ Paanyima pàà ekeleeziya mumane kwangata kaaba Kèndè, tudi babiikidiibwe ku ditèekiibwa dya bânà, ku Nyuma Mwimpè. Ne pàdi muntu yònsò wàngata kaaba kèndè, cidi Nzambi mumubiikidile bwa kwenzaye aci, ne kwimana kundekeelu kwa njila, kuya kalonda bajimine.

⁵² Dyambedi, Pòlò ùdi wànji kuumusha bwòwà bwàci bwònsò, pa nanku mpindyewu: “Wèwè mubiikidiibwe, wèwè kùyi anu musaluke cyanàànà mu meeji ebe ku teoloji wa mushindu kampana to, wèwè mulediibwe bulelela kùdi Nyuma, dibà adi Nzambi ùkaavwa mudyànjile kukulongolola kumpala kwa difuka dya dyulu ne buloba, mufunde dìnà dyebe mu Mukanda wà Mwoyi wà Mwànà wa mukooko, nenku mpindyewu tudi tudisanga pamwe bwa kusòmba mu myaba ya mu Dyulu mu

Kilisto Yesu. Cisàmbà cya cijila, ditunga dya cijila, cisàmbà cya pabwàci, bwakwidi bwa bukalenge, biikàle tulàmbula milambu ya nyuma kùdì Nzambi, mbwena kwamba ne, mamuma a mishiku yetu yidì yìfila butumbi ku Dìna Dyèndè.”

⁵³ Bantu bàdi bàlwa apa bàmba ne: “Bantu abu bàdi ne mukupa.” Ncya bushuwa ne bàdì naawu; lungenyi lwa Nzambi ndukutakane bwa muntu, ne lungenyi lwa muntu ndukutakane bwa Nzambi. Mmibengangane, elu ne elu.

⁵⁴ Kadi ekeleeziya mulelela mùle tente ne Nyuma, mùle tente ne bukole bwa Nzambi, basòmbe pamwe mu myaba ya mu Dyulu, biikàle bàlàmbula milambu ya nyuma, disàasaamuna dya Nzambi, Nyuma Mwìmpè ùkwàta mudimu munkaci mwabo, ùjingulula mpekaatu ne ùtândisha patooke maalù àdì mabi munkaci mwabo, ùàlongolola ne ùàlàndakaja ne ùòlola. Bwa cinyi? Misangu yònsò anu mu Bwikadi bwa Nzambi mùdì mùsanganyibwa Mulambu wà wùmata mashi awu.

⁵⁵ Mpindyewu vùlukàayi ne, tudi bacikenkète mu dinda emu. Kwèna musungidiibwe ku Mashi to. Udi *mulama* musungidiibwe kùdì Mashi. Kadi udi musungidiibwe ku ngàsà, ku diitabuuja, mwikàle uCiitabuuja. Nzambi mmukookole ku mwoyi webe bwalu Wàkadyànjila kukulongolola. Wèwè kubanduluka ne kuciitabuuja, kuciitaba. Mpindyewu Mashi àdì ènza difuta dya cibawu bwa mpekaatu yebe. Vùlukàayi, mvwa mwambe ne: “Nzambi kèna ùpiisha ngènzàmpèkààtù bwa dyenza dya mpekaatu to.” Yèyè ngènzàmpèkààtù anu kwine kwònsò aku. Yèyè ùdì ùpiisha mwena Kilisto bwa dyenza dya mpekaatu. Nenku bwalu Yèyè mmumupiiishe, Kilisto wàkangata dipiila dyetu. Pa nanku kakwena dipiila bwa aba bàdì mu Kilisto Yesu, bàdi kabayi bènda bilondèshile musunya to, kadi bilondèshile Nyuma. Nenku wèwè mwenze cintu cibi, kî nku bukole to. Kwèna wenza mpekaatu ku bukole to. Muntu udi wenza mpekaatu ku bukole, ùpàtuka ùya kenza mpekaatu ku bukole, awu kacya kàtukù mwanjì kubwela mu Mubidi awu to. Kadi muntu ukààdiku mumùbwelè, yèyè mmufwe, ne mwoyi wèndè mmusokoka mu Nzambi, kupicila ku Kilisto, mutwà citampi kùdì Nyuma Mwìmpè, ne dyabulu kèna mene mwa kumupetaku to, yèyè ùdì kule menemene muntwamu. Nebikengelè bwa kupatukayemu kumpala kwa dyabulu kupetaye mushindu wa kumupeta. “Bwalu nudi bafwe!”

⁵⁶ Ambila muntu mufwe mùdiye cyena lubombo kadi ùmonè cìdì cyènzekà. Anjibi kumutwa museba mu lubavu amu wàmbè ne: “wèwè cyena lubombo eci, wèwè,” yèyè kààkwambakù dīyì to. Nenku ncyà bushuwa, yèyè neikalè anu kacya wàdyòlola mwaba awu.

⁵⁷ Nenku muntu udi mufwe mu Kilisto, wèwè udi mwa kumubiikila ne ncyena lubombo, kumutwa mènà ònsò aùdiku muswe kumutwa awu, yèyè kààdyàkuukilakù kuulu bwa

bwalu abu to. Yêyè muswè kwenza cintu, ncyà kudifinda kuya mwaba kampana bwa kakusambidila. Ncyà bushuwa. Kadi, kaa, bamwe bàà kùdìbo's bàdi ne mwoyi anu wetu wà menemene ewu. Ki cìndì mêmè ngeela meeji's, twètù tudi ne cya kwikala tujika bantu bafwe. Aba bàdi bafwe mu Kilisto, tudi tubajika mu mâyi. Mîngà misangu tutu tujika bantu bapitepite bûngi bacikàle ne mwoyi, budimu ne makokyanganyi ne tûyaayi, ne biine abi bìdimù bûngi cyaanàna mu ekeleeziya. Kadi kî ntwtù bàdi mwa kutapulula abi to, Nzambi ngudi ubitapulula. Yêyè mmumanye bantu Bèndè. Yêyè mmumanye mikooko Yèndè. Yêyè mmumanye dîyi ne dîyi dyònsò. Yêyè mmumanye bânà Bèndè. Yêyè mmumanye udiYè mwa kubiikidila ku luseke, Yêyè mmumanye udiYè mudyànjile kulongolola. Yêyè mmumanye udiYè mupèeshe bintu ebi, kùdiYè ùDìmwèneshila. Mushindu wùdiYe . . . Nzambi ùdi mwa kutèeka dyeyemena mu bânà Bèndè, pa cidi cikèngela kwenza, mumanye ne bôbò nebàcyènzè anu mu cyôci.

58 Nudi nwitabuuja ne Nzambi ùdi wènza nanku anyi? Mona's, Sàtaanà wà—wàkambila Yobo dîngà dituku . . . wàkambila Nzambi dîngà dituku ne: “Eyowa, Wêwè udi ne musadidi.”

59 Nzambi kwambaYe ne: “Kakwena pa buloba apa udi bu yêyè to. Yêyè mmuntu mupwàngàne.” Ûvwa mumweyemene.

60 Sataanà wàkamba ne: “Kaa, eyowa's, yêyè's ùdi ne byònsò anu bipeepèle. Lekela mêmè mmutwe anu byanza katanci kakese nenku mmufikishe ku diKwela dya mulawu muKutangile mumpala.”

61 Yêyè kwamba ne: “Nyêyè awu mu byanza byebe, kadi kwangaci mwoyi wèndè to.” Nwamonu anyi? Ne kwenzaye byònsò pa kuumusha kwangata kwa mwoyi wèndè.

62 Kadi, kaa, Yobo, pamutu pàà . . . cyàkènzàye ncinyi? Yêyè wàkeela Nzambi mulawu pàakangatà Nzambi bânà bèndè, pàakamwenzelàye bintu byònsò bibi ebi, ne bikwabo byònsò anyi? Yobo kàakeelaku nkonko nansha. Yêyè wàkapòna mutwe mpala panshi ne wàkakuukwila. Aleluuyah! Kwambaye ne: “Mukalenge nguwva mufile ne Mukalenge ngwangaci, Dìna dya Mukalenge dìbeneshiibwè!” S'ki bwalu mbwòbù abu.

63 Nzambi ùvwa mumanye dyeyemena divwàYe naadi kùdi Yobo. Nzambi mmumanye mushindu wùdiYe mwa kukweyemena wêwè awu. Yêyè mmumanye mushindu wùdiYe mwa kungeyemena mêmè ewu. Kadi citùdi twamba mpindyewu ndishikika dya mwine mwànà ewu.

64 Mpindyewu, pàdi Bible . . . Pàdi mvita yijika yònsò, pàdi byònsò bijika, dibà adi cintu cidi cilondà citùdi twenza ncinyi? Cintu citùdi twenza ncinyi paanyima pàà mvita mimane kujika? Nukààvwakù bamanye citùdi twenza anyi? Tudi tutwilangana ne Melekisedekè. Tùbuululàayi mu Maatàayi 16.16, lukasalukasa, bwa tumone ne mmwòmò anyi kî mmwòmò. Maatàayi Munsantu,

nshapita wa 16 ku mvensa wa 16. Ndi mutwishiibwe menemene ne mmwômò, Maatàayi 16.16. Maatàayi dikumi ne isamb-... To, kî mmwômò to, kî ncifwànyine kwikala pabwîpî mushindu awu to. 26.26. Kaa, 16 kaaba aka, mpàdìYe wàkula ne Simonà Peetèlò; mfwilaayiku luse, ncivwa ne meeji a kwamba aci to. 26.26 awu, bwalu anu ku didya dya diloolo dya ndekeelu aku, ki kùndi nteeta bwa kuya kafika. Maatàayi, nshapita wa 26 ku mvensa wa 26. Mpindyewu twàmupeci, mpòpò apa, ku didya dya diloolo dya ndekeelu adi.

Nenku pàvwàbo munkaci mwa kudya apu, Yesu wàkangata dyàmpà, ne wàkadibènèsha, ne wàkadìcìbula, ne wàkadìpèèsha bayiidi Bèndè, ne wàkamba ne: Angataayi, dyàyi, eci mmubidi wànyì.

Ne yèyè wàkangata lupanza, ne wàkasàkidila Nzambi, ne wàkabàpèèshalù, wàmba ne: Lùnwaayi bònsò;

Bwalu eci mmashi àànyì a dipungila dipyadipya, àdì meediibwe panshi bwa bààbùngì bwa dìlekelediibwa dya mpekaatu (m-p-e-k-a-a-t-u, mpekaatu, beena Kilisto bàdì bènza maalu mabi).

65 Eyo: “Kadi—kadi . . .” Tèèlejàayi, mvensa wa 29.

. . . Ndi nnwambila ne, kubangila ku leelu ncyàkunwà maluvu a tumuma twa mvinyo to, too ne ku dituku adi dīngàànwà neenu mapyamapya mu bukalenge bwa Taatù wanyì.

66 Cinyi? Cintu cimwecimwe cyàkenzà Melekisedekè aci paanyima pàà Abraham mumane kwangata kaaba kèndè. Mutèèke bantu bèndè mu bulongame, ne mucimune mvita ayi, ne mwalukile kwèndè kumbelu, ki Melekisedekè kulwa ne dyàmpà ne mvinyo. Paanyima pàà mvita mimane kujika, dībà adi netudye Didya dya Dibanjì pamwe ne Mukalenge Yesu mu buloba bupyabupya. Kaa, Dìnà dya Mukalenge dibeneshiibwe’s wè. Eyo.

67 “Maalu-masokoka a diswa Dyèndè, bilondèshile disanka dīmpè Dyèndè,” twàlukilàayi mpindyewu mu Efèsò, 9, “didiye mudipangadikile munda Mwèndè Yèyè mwine.”

Bwa mu cipungu cya kaabujimà kàà cikondo . . .

68 Nenku vùlukàayi ne, twafumu ku dicishiya katùyi bacitàngile to. Efèsò, nshapita 1, mvensa wa 10.

Bwa mu cipungu cya kaabujimà kàà cikondo . . .

69 Mpindyewu, tudi bayiile ne kaabujimà kàà cikondo nkindile cinyi? Kaabujimà kàà cikondo cyònsò nkòong, cikondo cyàjikà mpekaatu, cikondo cyàjikà lufu, cikondo cyàjikà mabeedi, cikondo cyàjikà mpekaatu, cikondo cyàjikà dinyangakaja dyònsò (didì dinyangàkàje bintu adi, bìdì dyabulu munyangakaje abi), byònsò abi paajikabi, cikondo cyòci ciine pàjikàci. Tàngilàayi.

Bwa mu cipungu cya kaabujimà kàà cikondo bwa yêyè wàmòna mwa kusanga . . . mu cintu cimwe bintu byònsò mu Kilisto, byònsò ne bidi mu dyulu, ne bidi bidi pa buloba apa; munda mwèndè mene;

70 “Kusanga bintu byònsò pamwe mu Kilisto.” Mûngâmbi mu dinda emu amu, tuubimpokoto tukese twònsò tutùdi tusangana, tuntu tukese twa butumbi etu, udi mwa kutupela mu Genese, udi mwa kutupela mu Ekèsòòdè, udi mwa kutupela mu Lewitiki, ne kuya naatu nanku too ne ku ndekeelu, ne ndekeelu wa byònsò mu Bwakabuulwibwa tûya kiikala Yesu. Angataayi Yozefu, angataayi Abraham, angataayi Izàkà, angataayi Yakòbò, angataayi Davidi, angataayi cyònsò cya ku bimpokoto abi, balume bàà Nzambi abu, kadi numone ní kanwena numona Yesu Kilisto muleejibwe patooke mu yònsò wa kùdibo. “Bwa Yêyè wàmòna mwa kusanga bintu byònsò mu Umwepele, Kilisto Yesu.”

71 Mpindyewu, patùdi tutàmba kuya kule ndambu mpindyewu, mpindyewu mvensa wa 11.

Mu yêyè kabidi tudi bapete bumpyanyi, . . .

72 Kaa, “bumpyanyi.” Bikèngela bwa muntu ìkalè mukushiile cintu kampanda, bwa wèwè kucipyana. Mmwòmò anyi? Bumpyanyi’s! Mbumpyanyi kaayi butùdi naabu? Mbumpyanyi kaayi bûmvwà naabu? Ncivwa naabu nansha bumwe to. Kadi Nzambi wàkanshiila bumpyanyi pààkafùndàYe dìnà dyànyì mu Mukanda wà Mwoyi wà Mwànà wa Mukooko kumpala kwa difuka dya dyulu ne buloba.

73 Kaa, wèwè udi wamba ne: “Mpindyewu, anji indilabi kakese tûng, mwaneetu, Yesu’s wàkenza aci pààkakufwilàYe apu.” To, kacya Yêyè kààkenzakù aci to. Yesu wàkalwa bwa kumpetela bumpyanyi abu. Balàayi mvensa udi ulond- . . .mulongo mene wùdi wùlondà awu.

Mu yêyè twètù pèètù tudi bapete mùdibi bimwèka . . . bapete bumpyanyi, biikàle badyànjila kulongolola bilondèshìle kiipàcìlà kàà ewu udi wenzeja bintu byònsò bilondèshìle mubelu wà diswa dyèndè dîmpè yêyè mwine,

74 Nzambi, kumpala kwa difuka dya dyulu ne buloba, mutùdi bacyàkùle mu kulonga kwa dìleesònà adi, nwènù bakwetu, mutwàmònu ne Nzambi ùvwa wikalakù nkàâyendè, mùvwàbi ne mu Yêyè mùvwa dinanga. Mu Yêyè mùvwa ne cya kwikala Nzambi; kakùvwa cintu nansha cimwe bwa kuMukuukwilaci to. Mu Yêyè mùvwa ne cya kwikala Taatù; mùvwa . . . Yêyè ùvwa Nkàâyendè. Mu Yêyè mùvwa ne cya kwikala Musungidi; cintu nansha cimwe kacivwa cijìmìne to. Mu Yêyè mùvwa ne cya kwikala Mwondopi. Ki byambiibwà Byèndè mbyòbì abi. Kakùvwakù cintu nansha cimwe mwaba awu to. Pa nanku Yêyè Mwine, mubelu Wèndè Yêyè mwine mwimpè awu kupatulawu

bintu ebi, bwa ku Muntu umwepele ewu, Kilisto Yesu, Yèyè wàmòna mwa kubisangisha byònsò cyakabidi. Kaa! “Cidi disu kadiyi dimòne, cidi dici kadiyi...” Kabyena bikèmesha to mùdici cintu cya kaciyi cyumvika’s!

⁷⁵ Tàngilàayi, “mudyànjile kutulongolola ku bumpyanyi ebu.” Mémè mwikàle mupyanyi wa cya bushuwa wa cintu kampanda, Nzambi Yèyè ùkookola ku mwoyi wànyì wàmba ne: “William Branham, Ndi mukubiikile kùkaadi ntanta mule, kumpala kwa difuka dya dyulu ne buloba, bwa wèwè kuyiisha Evànjeeliyò,” ndi ne bumpyanyi, bumpyanyi bwa Mwoyi wà Cyendelele. Mpindyewu, Nzambi wàkatùma Yesu bwa kuvwijaYe bumpyanyi abu bwà cya bushuwa bwànyì mémè, bwalu kakùvwakù cintu nansha cimwe cìmvwà mémè mwa kwenza bwa—bwa kubupyana to. Bùvwa munda mutupu, bùvwa bwa cya bushuwa, kakwena cintu nansha cimwe cìndì mémè mufwànyine kwenza to. Kadi mu kaabujimà kàà cikondo Nzambi kutumaYe, pa dībà Dyèndè Yèyè mwine dimpè, kutumaye Yesu Mwànà wa mukooko, mushebeya kacya ku difuka dya dyulu ne buloba. Mashi Èndè àkeediibwa panshi bwa ngaamona mwa kuya ku bumpyanyi bwànyì. Bwa kwikala cinyì? Bumpyanyi kaayi? Buumwànà, bwa kwikala mwànà wa balume wa Nzambi.

⁷⁶ Kadi mpindyewu Eci cidi anu mwa kunufudisha mipuuya ya munda bya bafwànyine kufwa. Kadi nukààvwakù bamanye ne bantu bàdi bânà bàà Nzambi bàdi banzambi bàà twànàtwànà anyì? Mbanganyì bàkaadiku bamanye nanku? Mbanganyì bàdiku bamanye ne Yesu wàkamba nanku? Mu Bible, Yesu wàkamba ne: “Mikenji yenu, yòyì miine, kayitukù myambe ne nudi ‘banzambi’ anyì? Nenku panwikalà nubabiikila ne mbanzambi...” Byòbi biine, Nzambi’s mmwambe mu Genese 2 ne bàvwa banzambi, bwalu ki cìvwàbo, bàvwa ne bukookeshi mu kaabujimà mu mwaba wà bukookeshi wà buloba awu. Yèyè wàkamupèèsha bukookeshi pa bintu byònsò. Kadi yèyè kujimija bunzambi bwèndè abu, yèyè kujimija buumwànà bwèndè, yèyè kujimija bukookeshi bwèndè, ne Sàtaanà kubwángataye bwònsò. Kadi, mwaneetu, twètù’s tudi bindile dimwèneshiibwa dya bânà bàà Nzambi biikalà mwa kwalukila ne kubwángatulula bwònsò. Bindile kaabujimà kàà cikondo, piikalà cipaapu cya musàkà cibànde too ne ku lusongo, pààmwèneshiibwà bânà bàà Nzambi mu kaabujimà kààbò, pààpàtukà bukole bwa Nzambi bwènda bwènda tamakatamaka (alèluuyah) ne kunyenga Sàtaanà bukole ne bukole bwònsò bùvwaye mumunyenge abu. Eyowa’s, mukalenge, mbwèndè yèyè.

⁷⁷ Yèyè ki Logos wàkapàtuka munda mwa Nzambi awu, aci ncilelela, ùvwa m’Mwànà wa Nzambi awu. Pashiishe kwenzaYe muntu nzambi mukese awu. Nenku Yèyè wàkamba ne: “Piikalàbi ne bàdi bàbiikila aba bàvwà Dìyì dya Nzambi dilwa kùdibo, bapofeta abu, piikalàbi ne bàdi bàbiikila aba

bàvwà Dìyì dya Nzambi dilwa kùdibò ne ‘mbanzambi’...” Ne Nzambi nguvwa mwambe nanku awu, Yèyè mwine, ne bàvwà banzambi. Wàkambila Mòsà ne: “Ndi mukuvwije wèwè nzambi, ne muvwijè Aalònà muprofeta webè.” Amen. Yoyöyò! Ndi mwa kwikala ngenza maalu bu mwena katombùtombù wa mu ntendeleelu’s, kadi kí ncìndi to. Kaa, pàdi mèsù enu mwa kutabala bwa kumona bintu abi. Eyo. Yèyè wàkenza muntu nzambi, nzambi mu mwaba wèndè wà bukookeshi. Ne mwaba wèndè wà bukookeshi wüyààya kuumukila ku mbù too ne ku mbù mukwabo, kuumukila ku mwelelu wà màyi too ne ku mwelelu mukwabo wà màyi; yèyè ùdimù ne bukòntononyi.

⁷⁸ Ne pààkalwà Yesu, mwikàle Nzambi Umwepele wa kàyi mpekaatu, Yèyè wàkacijaadika. Pààkatuutà mpepele, Yèyè wàkamba ne: “Ditalala, puwaayi!” Amen. Kadi bwa mucì, Yèyè wàkamba ne: “Muntu nansha umwe kàdikù cimuma cyebe to.”

⁷⁹ “Bulelela, Ndi nzwambila, nwènù bàdi banzambi bakese aba, wèwè mwambile mukuna ewu ne: ‘Tentemuka,’ ne kùyi wela mpatà mu mwoyi wèbè to, kadi witabuuja ne ciwāmbi aci necyenzeke, udi mwa kupeta ciwāmbi aci.”

⁸⁰ Alukilaayi buludi ku Genese, ku cya ku cibangidilu, cìdi cinyi? Patùdi twakulangana apa buloba ne bufuki bìdi munkaci mwa kutwa mikemu, byèla mbila, bintu byònsò bìdi munkaci mwa kusubakana. Bwa cinyi? Bwa dimweneshiibwa dya bānà bàà Nzambi, pìikalà bānà balelela, bānà balela, bānà buujìibwe tente mwa kwakula ne dīyì dyabo dītūbwa nyama ku mikolo. Ndi mēmè ngiitabuuja ne tukaādi ku mwelelu waci mpindyewu mene. Eyoa’s, mukalenge. Ambila mukuna ewu dīyì, bìikalè nanku.

⁸¹ “Mwaneetu, ndi—ndi njinga bwa *cikampanda*, bwa cintu kampanda cyènzekè. Mēmè’s ndi mwena kwitabuuja mu Yesu Kilisto.”

⁸² “Ndi nkupèeshaci mu Dīnà dya Mukalenge Yesu Kilisto.” Amen. Ki dimweneshiibwa ndyòdi adi.

⁸³ “Kaa, mwaneetu, bya pa madimi byànyì’s ki kuuminyinabi eku kuntu kwàka. Ncyèna mupeteku mvula to.”

⁸⁴ “Nènkutùminè mvula, mu Dīnà dya Mukalenge.” Apu mvula nealwe. Kaa, bindile, bitwa mikemu, bufuki bujimà bwindile dimweneshiibwa dya bānà bàà Nzambi. Nzambi wàkatùma dīyì bwa bwalu abu ku cibangidilu. Yèyè wàkapèèsha muntu mwaba wà bukookeshi.

⁸⁵ Yèyè wàkabùpèèsha Yesu Kilisto, ne Yesu wàkabùfila mu Dīnà Dyèndè, ne dītūshiiibwa edi ne: “Nùlombāāyi Taatù cintu kanà cyònsò mu Dīnà Dyànyì ne Mēmè nēncyènzè.” Kaa, Mwaneetu Palmer! Bindile dimweneshiibwa dya bānà bàà Nzambi, kaaba, Ekeleeziya!

⁸⁶ Múngǎmbì ne, Mukanda wà Efèsò m’Mukanda wà Yoshùwà, ne Yoshùwà mwikàle ùshikika bantu mu kaaba kàdi kààbò. Mpindyewu, bôbò kabàyi baswe kushààla bapuwe to, ne yêye mutèèke Efàlàyimà *apa*, pa mwaba wa Maanàsè, ne *ewu* nunku mufwànyine kwalukila ne kubanga makokyanganyi ne dibinduluka, mwaba awu nebapetanganeku bishi? pàdi umwe wàmba ne: “Mémè ndi Baptiste, mémè ndi Méthodiste, mémè ndi mwena Mpenta, mémè ndi Unitaire, mémè ndi Binitaire, mémè ndi mwena *Cikampanda*.”

⁸⁷ Nenupite ne bwalu abu bishi? Puwayi! Nzambi mmuswe kushikika Ekeleziya Wendè, bàna bàà balume ne bàà bakaji bàà Nzambi. Nzambi, itabaku bwa nshaale ne mwoyi too ne ku dimona dya ciine aci, ki dyànyì disambila ndyôdi adi. Cidi pabwîpì mu mushindu wà ngamba anu kucilenga ne byanza, mùdìbì bimwèka’s. Cidi anu pabwîpì *apa*. Ki cîntù mujingèjinge bwa kumona, mwindile cikondo cya twenda tupweka ne müsèèsù nunku, ki muntu mucibukile panshi udi mulàadika pàapa wàwa, kacya anu mu difu dya mamwèndè: “Nì ng’argent nì ngòlò ncyèna naabi to.” Kaa, bindile dimweneshiibwa dya bàna bàà Nzambi, aleluuyah, pààDimanyishà Nzambi, pìimanyikàbo mabeedi, pìimanyikàbo kansere, pìimanyikàbo màsaamà.

⁸⁸ Nudi nwela meeji ne kansere ncintu anyi? Bible mmwambe ne kùlwalwa cikondo cyàbolelà bantu anu mu mibidi yabo mene, ne tubangu-nyuunyi netudye bitalu byabo kumpala kwa kabàyi nansha banji kufwa to. Kansere kàdi anu bu dînú disaama patùdi tukàfwànyikija ne bìlwalwà abi. Kadi, vùlukààyi ne, cintu cya cikwàcisha bwòwà aci bìvwa bikàndika bwa kulengaci aba bàvwà ne Citampi cya Nzambi. Ki citùdi tudyènzeja bwa kwenza ncyôci aci mpindyewu, kubwela ne kushikikiibwa mu Bukalenge bwa Nzambi bilondèshìle myaba kumpala kwa bipùpù bya màsaamà bìdi bikwàcishà bwòwà ebi kudikumabi. Kaa, bilenga kaayipu’s wè! Cipungu cya cikondo, kaabujimà kàà cikondo, bumpyanyi.

Mu yêye twètù pèètù. . . bapètè. . . bumpyanyi, biikàle badyànjila kulongolola . . .

⁸⁹ Bumpyanyi bwetu bwàkafidiibwa kutùdi munyì, ku cinyi? Didyànjila-kulongolola. Didyànjila-kulongolola didi ndidyànjila-kumanya. Mmunyì mwàkamanyà Nzambi ne Yêye ùvwa mwa kukweyemena bwa wèwè kwikalala muiishi? Didyànjila-kumanya Dyèndè. “Kí ng’ewu udi muswe anyi ewu udi unyeema, anyì ewu. . . Nzambi ngudi uleeja luse.” Ncyà bushuwa, didyànjila-kulongolola. Yêye ùvwa mumanye cìvwà munda mwebe. Yêye ùvwa mumanye cìvwà munda mwebe kumpala mene kwa wèwè kulwa pa buloba. Yêye ùvwa mumanye cìvwà munda mwebe kumpala kwa kwikalaku buloba bwa wèwè kulwapu. Ki—ki Yêye awu. Ki Nzambi wa kàyi mikàlù awu, wa kàyi mikàlù. Twètù tudi ne mikàlù, tudi mwa kwela meeji anu ne mikàlù.

90 Bidi bya mushinga wàbúngì be bwànyì mêmè, kacya anu cìvwà cingenzèkéle aci. Ncyèna mumanye to. Pàndi nkwèlela meeji, pâmvwà mwimane mwaba mwine awu bwa bikondo bikese bya disanka abi, ndyambidila ne: “Kamwena maalaba to.” Kamùvwa makeelela, kamwena bubeedi, kamwena tunynganyinga nansha. Kamwena bya ndambu wa disanka, pashiishe disanka búngì cyanààna to; byònsò bìdi anu disanka dyangàtàngàne. Kaa, ekelekele! Kaa, pâmvwà mwimane mwaba awu mêmè kwamba ne: “Ncinyì eci?”

91 Dìyì adi kwambadi ne: “Eci ki dinanga dipwàngàne adi, ne cyònsò cyúkaadiku munange ne cyònsò cikaadiku cikunange bìdi neebe mwab’ewu mpindyewu.”

92 “Ne wêwè neutuleje kùdi Mukalenge Yesu pààlwàYe, bu bivulukilu bya mudimu wèbè wà bwambi.” Mêmè kumona bantu bakaji balenga abu biimàne mwaba awu, bònsò bànguupukila ne bèèla lubila lukole ne: “Mwaneetu munanga, wa mushinga mukole!” Mêmè kumona bantu balume abu ne nsuki mishitákàne ayi kunshingu kwònsò eku, bàlwa lubilu, bànguupukila bàmba ne: “Mwaneetu munanga!”

Ki mêmè kudyambidila ne: “Eci cìdi cyùmvwija cinyì?”

Yèyè ne: “Mbàà kwenu.”

93 Mêmè ne: “Bàà kwetu? Kí nkufwànyìne kwikala ba-Branhams búngì nàka to, s’nyawu bàdi mìlìyò.”

94 Yèyè ne: “Mbaùdi wêwè mukudimwishe mucima!” Aleluuyah! “Mbaùdi wêwè mukudimwishe mucima. Ng’aba bàdi...” Yèyè ne: “Udi umona udi mwimane pààpa wàwa?” Mukaji mutàmbe bulenga ùntù nciyikù mwanjì kumona to. Yèyè ne: “Úvwa ne bidimu bipite pa makumi citeema pawàkamulombolà kùdi Nzambi. Kabyena bikèmesha to pàdiye wèla lubila ne: ‘Mwaneetu munanga’ apu.” Yèyè ne: “Yèyè kààdyàkukùlakajakù kabidi to. Yèyè ùkaadi mushiye aci paanyima. Ùdi pa bulenga bwa bunsongà. Nyewu mwimane apa. Yèyè kèna mwa kunwa màyi a mashika to, kèna naawu bwalu nansha. Kèna mwa kudyolola panshi bwa kulààlayè tulu to, bwalu kèna ùcyòka to. Kakwena nì mmaalaba, nì mmakeelela, anyì nì ncinyì cyònsò to. Tudi mu Cyendelele mpindyewu. Kadi dituku kampanda dya butumbi Mwànà wa Nzambi nealwe, ne wêwè neulumbulwishiibwe bilondèshile Dìyì dyùdi mubayiishe.” Kaa, mwaneetu!

Mêmè ne: “Nebikengelè bwa Pòlò kulwaye ne kèndè kasumbu anyì?”

“Eyowa’s, mukalenge.”

95 Mêmè ne: “Ndi muDiyiishe menemene anu mwàkaDyàmbà Pòlò. Kacya ncitukù museesuke to, kacya ncitukù mwelemu twitabààyi ya ekeleeziya anyì nì ncinyì cikwabo to. Ntu mêmè mushààle anu mwànyì ne kale.”

⁹⁶ Ki bôbò bônso ne dîyì dimwe kwelabo lubila lukole ne: “Aci tudi bamanye! Tudi biimanyinepu ne ditwishibwa dyônso.” Bôbò ne: “Wêwè neutuleeje kùdîYe, ne pashiishe netuye bônso cyakabidi pa buloba, bwa twêtù kusòmbelapù kashidi.” Kaa, ekelekele!

⁹⁷ Anu dîbà adi mêmè kubanga kwalukila mu mêmè. Mêmè kutangila, pa bulaalu apu, mêmè kumona cibidibidi cyànyì cya kale cikaavwà cyènda cìkùlakaja ne cyèla minyengu aci cilààle pààpa, ne ciditùnye ne—ne cineka kùdì màsaamà ne ntatu, ne mêmè kumona byanza byànyì paanyima pàà mutu wànyì, ki mêmè kudyambidila ne: “Kaa, nebikengelè bwa mêmè kwalukila cyakabidi mu cintàkanyì cyàcya anyì?”

⁹⁸ Nenku mêmè kutungunuka ne kuumvwa Dîyì adi ne: “Tungunuka ne kukolesha! Tungunuka ne kukolesha!”

⁹⁹ Mêmè kwamba ne: “Mukalenge, mêmè ntu misangu yônso anu mwitabuuje dyondopa dya kùdì Nzambi, nêntungunukè ne kudiitabuuja. Kadi nênkoleshè bwa kupeta misuuka ayi, ndi ngambilamu. Nênyìbwejè yàbùngì muntwamu ne nêngiikalè mwa... Enzaku bwa ngiikalè ne mwoyi, Mukalenge, nenku nêmbwejèmu mùllyô mukwabo, bu Wêwè anu mwa kwenza bwa ngiikalè ne mwoyi.”

¹⁰⁰ Nansha bôbò biikàle bàà dikoba kaayi, bàà twitabàayi kaayi, bàà ditunga kaayi, nansha biikàle cinyì, bàdì bônso anu cintu cimwe pàdìbò bàkafika mwàma, ne mikàlù ayi yikaadi mishààle paanyima. Kaa, mêmè's ndi mwa kumona bakaji abu, balenga bàà dikema; bândì ncìyi mwanjì kumonaku to... mipweke, nsuki yabo mile mipweke too ne paanyima. Jipè mile mipweke too ne kwinsi. Bàvwa ku makàsà kutupu. Mmona bantu balume abu ne nsuki mishitàkàne ku nyungulukilu kwa nshingu kwônso, nsuki mikunze, nsuki mifiike, ne ya meekala mashiilèshiilàngàne ônsò. Nenku bàvwa bangeela maboko kunshingu. Mvwa mwa kuumvwa maboko abo awu. Mvwa ngumvwa byanza byabo. Nzambi ngudi Mulumbulwishi wànyì, ne Mukanda munsantu ewu mubuulula. Mvwa mwa kubyumvwa anu mùndì ngumvwa byànyì byanza kwìsù kwànyì emu. Bàvwa bangeela maboko kunshingu, kakùyikù masansakata a bakaji mùdiwu mafwànyine kwikalaku mpindyewu to. Nansha wêwè wa cijila wa bishi, nansha wêwè nganyì, nansha wêwè muiyishi wa mushindu kaayi, nsaserdose anyì nì ncinyì cyùdì mufwànyine kwikala aci, kakwenaku muntu mulume nansha umwe udi mufwànyine kulekela muntu mukaji ùmwela maboko kunshingu, kàyikù ùmvwa masansakata a bulume to. Aci mbulelela bwa menemene. Kadi, mwaneetu, paùdì umuka apa uya dyàmwàmwa, kabyena mushindu awu mwàmwa to. Kaa, ekelekele! Bìdì mu mushindu wà ne... Kaa, mùdì... Kabyena mwa kwenzekaku to. Byônso bìdì anu dinanga. Byônso bìdì anu mwaneetu wa balume wa cya bushuwa ne byônso bìdì anu mwaneetu wa bakaji wa cya bushuwa. Kamwena nì

ndufu, nî ntuninganyinga, nî mmukawu, ncintu nansha cimwe, cintu nansha cimwe kacyenaku mwa kubwelamu to. Cidi anu bupwàngâne. Ki cîndî mêmè nditacishila. Ki mwaba wûndî ngiipacila ngwôwù awu.

¹⁰¹ Mêmè kwamba ne: “Éyi Mukalenge, mbwa cyôci aci bûndî nsanganyiibwa mu ekeleeziya emu, nteeta bwa kutèeka ekeleeziya mu bulongame.” Nnwàmbila ne, wêwè mwaneetu wa balume ne wêwè mwaneetu wa bakaji, kùdi cintu anu cimwepele cidi mwa kubwela muntwamu, ndinanga dipwàngâne. Kî mbwalu udi ne lulamatu kùdi Branham Tabernacle, anyi kùdi ekeleeziya wa ba-Méthodistes anyi ekeleeziya wa ba-Baptistes to. Abi bidî anu bîmpè, bîvwa bikèngela bwa wêwè kwikala nanku. Kadi, kaa, nwênù balunda bàanyi, bìdî bikèngela bwa nwênù. . . Kî mbwalu udi mwakule mu myakulu, muje maja mu Nyuma, kî mbwalu udi mwipate baadémons anyi mutentemune mikuna ku diitabuuja nansha. Byônsò abi bidî anu bîmpè, bwalu bìdî bîmpè, kadi nansha nanku, anu dinanga dipwàngâne menemene adi diikàle munda amu’s. Mwômù amu ki mùvwà dinanga dipwàngâne. Nenku ki cintu cimwepele cyàkubwejàmu ncyôci aci. Ki cintu cimwepele ncyôci aci cidi mwa kushààlamù, ki cintu cimwepele cìvwàku, mwômù amu. Kaa, ekelekele! Nditèekiibwa. Nzamb, kumpala kwa difuka dya dyulu ne buloba!

¹⁰² Mpindyewu, tûlwijakajàayi, tûjikijàayi nshapita umwepele ewu, nansha bishi, kwôkù mushindu, mu tusunsa dikumi tûdi tûlondà etu.

Kùdiye yèyè tûdi pèètù bapètè bumpyanyi. . . (Citùdi tupyana ncinyi? Mwoyi wà Cyendelele. . .) . . . biikàle badyànjila kulongolola. . .

Munyi? Bantu bônsò mbumvwe aci anyi? Wêwè nguvwa mubiikile Nzambi anyi? To, Nzambi ngwâkakubîikila. Bamwe bantu bàtu bàmba ne: “Kaa, ndi mukebe Nzambi, mukebe Nzambi.”

To. Muntu nansha umwe kàtukù mukebe Nzambi to. Nzambi ngudi wenda ukèbangana ne muntu. Yesu wàkamba ne: “Muntu nansha umwe kèna mwa kulwa kùNdî to pàdî Taatù Wanyî kàyi mumukoke dyambedi.” Nwamonu’s, bìdî mu ngiikàdilù wa muntu bwa kunyeema Nzambi. Kadi wêwè udi wamba mpindyewu ne. . .

¹⁰³ Aci, cidi cîntàcishà mêmè’s ki cyôci aci, nansha nanku, bwa kunuyiisha nwênù aba; kùtùngunuku ne kushààla mu ngiikàdilù umwèumwè útù awu to, shintuluka mpindyewu! Nteelejaayi pândî ncyàmba apa: EMU MMÛDÌ MUKALENGÈ WÀMBA. Kacya nçitukù mudibiikile mêmè mwine cyôci eci to, kî ncîndî to. Kadi nwênù nudi numbiikila bu muprofeta wenù, anyi muprofeta. Bàà pa buloba bàdi bìitabuuja nanku, mu nyungulukilu wa buloba bujimà, miliyò ne miliyò ne miliyò ya

bantu. Ntu nkàadi mwakule bya ku cyàbwàshì ne bya mwikàle mbubika ngambila bantu miliyò dikumi anyi—dikumi anyi dikumi ne yibidì, anyi bapite apu, ngaakula bya ku cyàbwàshì. Nkàadi mumone binunu makumi bya bikeena-kumona ne bya bimanyinu ne maalu a kukema, ne nansha cimwe cya ku byòbì abi kacitukù cipangile nansha. Ne aci ncyà bushuwa. Yèyè ùkaadikù mudyànjlile kungambila maalu àtù kaàyikù manji kupanga kukumbana anu menemene to. Mémè nêmpicishè muntu ku cilumbù pa bwalu abu nansha bàmwamba ne yèyè ùdi nganyì. Ncyà bushuwa. Ncìtu ndyamba mùndi muprofeta to, kadi nwènu ntèèlèjaayi.

104 EMU MMÙDÌ MUKALENGE WÀMBA, nebikengelé dinanga dipwàngàne bwa kukufikisha mu wòwò mwaba awu, bwalu ki cyònsò cìvwà mwómò amu. Nansha wèwè ne mfranga ya bishi, dileeja dya patooke búngì munyì dya maalu a ntendeleelu, búngì bwa byenzedi bilenga byúkaadi mwenze anyi ní ncinyì ní ncinyì cyúkaadi mwenze, abi kabýàkubadiibwakù ne mushinga nansha wà kànà mu dituku adi to. Nebikengelé dinanga dipwàngàne. Pa nanku cyònsò cyúdi wenza, tèeka bintu bikwabo byònsò ku luseke anu too ne paújiibwà tente ne dinanga dya Nzambi mu mushindu wà ne udi mwa kunanga aba bàdì bakukine.

105 Mémè ndi menemene anu múngãmbi mu dinda emu amu ne, mémè ntu mwenjìibwe, cyànyì cìndì mwenjìibwe naaci mu kaabujimà cidi nngàsà. Bantu bààbúngì bàtu bàmba ne: “Mpindyewu, ùnkoonyè paanyima nenku mémè nkukoonye pàànyì. Eyowa’s, ùngenzèlè cintu kampanda nenku mémè nkwenzèlè pàànyì cintu kampanda.” Aci kì nngàsà to. Ngàsà ùdi ne, wèwè muumvwe paanyima pàkusansakana, mémè nênkukoonyèpu nansha bishi, nansha wèwè munkoonye pàànyì paanyima anyì kùyi munkoonye; udi mwa kumbàngula dipì mwísù, wamba ne “paanyimà pàdì pàkèngela kunsansakan- . . . , anyì, pàdì pàkèngela kunkoonya,” mémè nênkukoonyèpu. Nwamonu anyi? Ki mùdibi nanku, enza cintu kampanda. Mémè ncìtu ngiitabuuja byenzedi to. Ntu mémè ngiitabuuja ne byenzedi ndinanga. Byenzedi bìdì—byenzedi bìdì ndimwenesha dya ne ngàsà ùkaadi mukwate mwaba. Ncìtu ne nsòmbelu wa lulamatu kùdì mukàjàànyì ne bwalu ndi ngeela meeji ne mmufwànyine kushipa naanyì dibaka bu mémè ncìyi nende ne nsòmbelu awu to, ndi ne nsòmbelu wa lulamatu kùdiye mbwalu ndi mumunange.

106 Ncìtu nyiisha Evànjeeliyò ne bwalu ndi ngeela meeji ne ndi mufwànyine kuya mu iferno bu mémè mwa kubenga kumuyiisha to, ndi nyiisha Evànjeeliyò bwalu ndi muMunange Yèyè. Bushuwa. Nudi nwela meeji ne ndi mufwànyine kukosolola mbù mituuta kùdì bipeepele bikole yàya, ne ndeke yidì yipwekelela bu ya kupona mu diya ne mu dyalukila ayi, ne mikenyi yèla eku ne eku, ne—ne bikwabo byònsò, ne mu kasunsa kanà kònsò. . . .

ne bantu bônso bèèla mbila mikole, masambila a “Mwoyo Mariya” ùmvwika mu ndeke mujimà amu, ne bikwabo byônso abi anyi? Bantu abu munkaci mwa kukupiibwa eku ne eku mu mikaba yabo ya dikubiibwa ayi, ne mwendeshi wa ndeke wàmba ne: “Nkushàale ndambu wa kasooloonyi anu bwa tusunsa dikumi ne tutaanu cyanààna, ncyêna mumanye ne tudi penyì to.” Nudi nwela meeji ne ndi mufwànyine kwenza aci anu— anu bwa disànkà dya kucyenza anyi? Huh! Nudi nwela meeji ne mvwa mufwànyine kwalukila mu bisuku ne meetu mùvwàbi bìkèngela bwa basalaayi bàà beena Allemagne abu kwikalabo batèèke maboko abo mannyùngùlùkile mushindu *ewu* diloolo ne diloolo dyônso bwa kubwela ne kupatuka naanyi mu disangisha, too ne pàvwà Nyuma Mwimpè mwa kubanga kwenza bishima apu anyi? Ba-Communistes basòmbe ne byamu bya mmwenu mikenkeci bya bufuku, bwa kungaashilabo cingoma mu ntanta wa kilòmèètà mujimà ne citùpà. Nudi nwela meeji ne ndi mufwànyine kucyenza anu bwa disànkà dya kucyenza anyi? Mbwalu cintu kampanda munda mwànyì ncinangè; bôbò abu’s mbantu bàdi Kilisto mufwile. Pòlò wàkamba ne: “Ncyêna muswe kuya ku Yelusàlèmà anu bwa kuya to, kadi ndi nyakù bwa nkapoopèdiibwè pa nkuruse. Ndi nya bwa nkafwe. Ndi nyakù bwa nkafwile bwalu bwa Mukalenge.” Ncintu kampanda, dinanga ndidì dikwenzejà adi, didì dikusàka. Ncyà bushuwa menemene.

¹⁰⁷ Bu mèmè muyiishe Evànjeeliyò bwa mfranga, bu ne bivwa mbwa nanku, nunku ncyêna ne dibanza dya ndola binunu makumi abidi diloolo edi to, nunku ncyêna mubwele dibanza bu nanku nansha. To, mukalenge. Bwalu nunku’s ndikù mulame yimwè ya ku—yimwè ya ku miliyò yikaadibo bampèèshèpèèshe ayi. Muntu kampanda, muntu kampanda wàkatùma beena FBI ne kabeji kamfùndila kàà mfranga ndola mùliyò mujimà ne binunu nkama yitaanu ya mèmè kwangata. Ki mèmè kwamba ne: “Alukilaayi naaku.” Kì mbwà mfranga to! Kì mmfranga to. Ncyêna nyiisha Evànjeeliyò bwa mfranga nansha. Kì mbwà aci to!

¹⁰⁸ Mbwà dinanga. Cintu cìndì muswe kwenza, ncyà ne, pângààyà dyàmwàmwà dya mweyelu wà ndekeelu awu, ciine aci cidi mwa kwenzeka mu tusunsa tutaanu emu kuumukila ku mpindyewu, cidi mwa kwenzeka mu mèbà abidi kuumukila ku mpindyewu, cidi mwa kwenzeka mu bidimu makumi ataanu kuumukila ku mpindyewu, ncyêna mumanye dībà dyènzekàci to. Kadi pènzekàci, mèmè nkufika bulelela, ndi muswe bwa ngaanumonaku pa bulenga bwa bunsongà, nulwa lubilu, nutuuta mukòbolo ne: “Mwaneetu munanga! Mwaneetu!” Ki cidi mu wànyì mwoyi ncyòci aci. Mbwa nanku awu. Ncyêna nteeta bwa kwikala mbengangana neenu ku mèyì bwa kwikala—kwikala kupangakanangana to, kadi ndi nteeta bwa kunutèeka mu njila udi mujaalame. Ki njila wa dibwelela nyèyè awu. Kaciyi

ekeleeziya wenu to, kaciya dingumba dyenu to, kadi ndilediibwa dyebe mu Kilisto. Kaa, ekelekele! Yoyöyò!

Mu yêyè . . . tudi bapetè . . . bumpyanyi, biikàle badyànjila kulongolola bilondèshìle kiipàcìlà kàà ewu udi wenzèja bintu byònsò bilondèshìle mubelu wà diswa dyèndè yêyè mwine,

¹⁰⁹ Tèèlejàayi. Netujikije mu tusunsa tukese emu. Tèèlejàayaaku ne ntema mpindyewu kumpala kwa twètù kujikija.

Bwa twètù kwikala bwa disaamuna dya butumbi bwèndè, twètù bàakadyànjilà kweyemena . . . Kilisto.

Mu yêyè kabidi nwàkeeyemena, . . .

¹¹⁰ Tàngilàayi eci mpindyewu, ne ntema yònsò. Vwalaayi nkòletè yenu, nkòletè ya Evànjeeliyò. Bàwulàayi maci, tèèlejàayi ne ntema. Ndi ku mvnsa wa dikumi ne mwisàtù.

Mu yêyè kabidi nwènù nwàkeeyemena, paanyima pàà bamane kuteeleja . . .

“Diitabuuya dìdì difùmina ku . . .” [Disangisha dìdì dyàmba ne: “Ditèèleja.”—Muf.] “ditèèleja dya . . .” [“Dìyì.”] “Dìyì dya . . .” [“Nzambi.”]

. . . paanyima pàà nwènù bamane kuteeleja dîyì dya bulelela, . . .

¹¹¹ Bulelela ncinyi? Dìyì dya Nzambi. Ncya bushuwa anyi? Yone 17.17, nwènù bàdì munkaci mwa kufunda Mifundu abu, Yesu mmwambe ne: “Ûbàjidilè, Taatù, ku Bulelela. Dìyì Dyebe m’Bulelela.”

. . . paanyima . . . nwènù bamane kuteeleja . . . bulelela, Evànjeeliyò wa lupandu lwenu, . . .

¹¹² Lupandu lùvwàye ùteeta kubambila alu lùvwa ndupandu kaayi? Badyànjila kulongolola kumpala kwa difuka dya buloba (Ncya bushuwa anyi?), ku ditèèkiibwa dya bânà, badyànjila kulongolola ku Mwoyi wà Cyendelele. Mpindyewu, paanyima pàà nwènù bamane kubwela mu Mwoyi wà Cyendelele, paanyima pàà nwènù bamane kusungidiibwa, kujiidiibwa, kujiibwa tente ne Nyuma Mwîmpè, nudi bânà. Mpindyewu Nzambi mmuswe bwa kunushikika bilondèshèle myaba, kaa, bwa nwamona mwa kukwata mudimu bwa Bukalenge Bwèndè ne butumbi Bwèndè.

¹¹³ Ki Evànjeeliyò nyêyè awu. Bamane, dyambedi, kuteeleja Dìyì ne: “Nyingalalaayi, nubatiijiibwe mu Dìnà dya Yesu Kilisto bwa dilekelediibwa dya mpekaatu.” Dyumusha dya mpekaatu yenu yònsò, nusòka Dìnà dya Mukalenge Yesu Kilisto, bwa Buloba bulaya. Mulayi wùdì kùdì wêwè mwena lwendu yònsò udi mu njila webè. Pawìkalà muumuke kumbelu kwebè diloolo edi, ngènzàmpèkààtù, wamba ne: “Ndi nya ku Branham Tabernacle kwàka,” Nzambi ùdì ùkupèsha mpùngà diloolo

edi. Kùdi cintu cimwepele cidì cisanganyiibwà pankaci peebe ne Buloba bulaya. Buloba bulaya ncinyi? Nyuma Mwimpè. Civwà cisanganyiibwà pankaci pàà Yoshùwà ne buloba bulaya n'Yadènè. Cya bushuwa menemene.

¹¹⁴ Mòsà, mwikàle cifwanyikijilu cya Kilisto, wàkalombola bânà too ne ku buloba bulaya, pashiishe Mòsà kààkabweja bânà mu buloba bulaya to. Yoshùwà ngwàkabweja cisàmbà ne kwabanyaye buloba. Yesu wàkafuta mushinga, wàkabàlombola too ne ku Nyuma Mwimpè. Nzambi wàkapwekesha Nyuma Mwimpè ne Wàkatèèka ekeleeziya mu bulongame bilondeshile myaba, muntu yònsò, ùmuuja tente ne Bwikadi Bwèndè Yèyè mwine. Nudi numona cìndì njinga kwamba aci anyi? Bònsò mu Kilisto Yesu, mushindu wùvwà Nzambi mudyànjlile kulongolola cyòci eci ku dibiikila dya Evànjeeliyò ewu!

¹¹⁵ Pòlò, Galàtiyà 1.8, mmwambe ne: “Mwanjelo yèyè mulwe mwikàle ùyiisha nì ncinyi nì ncinyi cikwabo, èdiibwè mulawu.” Bulelela, Evànjeeliyò. Mpindyewu tèelejàayi ne ntema patùdi tutungunuka ne kubala apa, twenda tujikija mvensa ewu.

*. . . Evànjeeliyò wa lupandu lwenu, mu yèyè kabidi . . .
(Tèelejàayi ne ntema.) . . . paanyima pàà nwènu bamane
kwitabuuja, nwàkatwibwa citampi cya Nyuma Mwimpè
mwine wa mulayi,*

¹¹⁶ Mu matuku a ndekeelu, Bible mmwambe, mpindyewu tàngilàayi, mu matuku a ndekeelu nekwikalè bitùpà bibidi bya bantu. Cimwe cya ku byòbi bòbò nebiikalè mwa kupeta Citampi cya Nzambi, cikwabo aci cimanyinu cya nyama wa lwonji. Aci neya bushuwa anyi? Mbanganyi bàdi bamanye nanku? Ee, piikalàbi ne Citampi cya Nzambi n'Citampi cya . . . Piikalàbi ne Citampi cya Nzambi n'Nyuma Mwimpè, dìbà adì's kakùyi Nyuma Mwimpè to ncimanyinu cya nyama wa lwonji. Ne Bible mmwambe ne nyuma yibidi ayi neyikalè mitàmbe kufwanangana mu mushindu wa bifwanyine kuseeswisha ne Basungula mene bu ne bivwa mwa kwenzeka. Kacyàkucyènzaku to, bwalu bòbò bàkaavwa basungudiibwe bwa Mwoyi wà Cyendeleele. Nwamonu anyi?

¹¹⁷ Diya dya mu ekeleeziya, anu mùdi kumanya kwa ne kùvwa baavirgo dikumi bààkapàtukà e kuya bwa katuutakeena ne Mukalenge, bònsò bajidiibwe, bònsò bàà cijila, yònsò wa kùdibo mujidiibwe. Bataanu bàvwa bènza maalu fwèfwèfwè ne bààkalekela myèndù yabo yijìma. Bataanu bàvwa ne maanyì mu myèndù yabo. “Nenku, monaayi Mubaki nyawu wìya!” Ki bataanu bàvwà ne maanyì mu myèndù yabo abu kubwelabo mu Didya dya Dibanji. Kadi bakwabo abu bààkabàshiya pambelu pàvwà myadi ne ditwa dya mikemu ne disumakaja dya mènù. Ikàlaayi badìlongòlòle, bwalu kanwena bamanye ne mmu kasunsa kaayi mùdi Mukalenge ùlwa to. Ikàlaayi ne . . . Maanyì àdi àleēja cinyi mu Bible? Nyuma Mwimpè.

118 Mpindyewu bwenu nwênù leelu ewu, nwênù bânà beetu ba-Adventistes du Septième Jour bàdì bambe ne dituku dya mwandamutekete ki Citampi cya Nzambi, twàlaayi Mufundu wumwe cyanàànà bwa kucijaadika. Bible mmwambe ne Citampi cya Nzambi n'Nyuma Mwîmpè. Tàngilàayi eci. “Udi...” Tàngilàayi mvensa wa 13 mpindyewu.

. . . paanyima pàà nwênù bamane kwitabuujà, nwênù nwàkatwibwa citampi cya—cya Nyuma Mwîmpè wa mulayi.

119 Buululaayi mu Efèsò 4.30, ngeela meeji ne nyêyè. Monaayi ní katwena tupeta 4.30, monaayi eci ní kî ncintu cimwecimwe aci. Efèsò, nshapita mwi4 ku mvensa wa 30. Eyowa, nyêyè ewu, 4.30.

Nenku kanubungamiji Nyuma Mwîmpè wa Nzambi to, unwàkatwibwa nende citampi too ne ku dituku dya bupikudi.

120 Too ne ku díbà kaayi? Paùdì bulelela, bulelela upeta Nyuma Mwîmpè, Yêyè ùdì ne cya kushààla neebe too ne ku díbà kaayi? Too ne ku ditàbuluja didì dilondà anyì, too ne pààkucyàmakanà kakwèbè mukaji kumpala anyì, too ne pààkutàndishà mfumwèbè wa mudimu ne mèyi makole anyì? Too ne ku dituku dya bupikudi bwebe! Aleluuyah!

121 Paanyima pàà wêwè mumane kufwa, paanyima pàà wêwè mumane kusabuka mubwele mu Buloba abu, muwikalà ukàadi mwimanemu ne bananga beebe, wêwè newikalè anu mule tente ne Nyuma Mwîmpè. Mifundu's! Wêwè udi anu mùdì mpindyewu emu, cibi mwikàle ne . . . udi mubwele mu mubidi mukwabo. Udi mushintulule anu nzubu cyanàànà. Ewu nunku ùkaadi mulwe mukulakaji, kùcìyi kabidi mwa kumwasa biteetela to, bipàndà bikaadi bimane kubola. Ncya bushuwa. Pa nanku udi anu muumushe cintàkanyì cya kale aci ne mucishiye cidìbolela panshi, ne mubwele mu wà mupyamupya. Ncya bushuwa anyì? “Bwalu bu ntenta wa buloba ewu mwa kunyanguka, tudi ne mukwabo mwindile.”

122 Nudikù nuvuluka ne, dituku adi tuvwa bakenkete cyôci aci anyì? Pàdì mwànà mukese munkaci mwa kufwimbiibwa mu difu dya mamwëndè, misunya mikese eyi yìdì yìdisuba ne yitùpika ne yitùngunuka. Kadi pàdì anu maamù awu ùpàtula mwànà wa mu diboko awu ne yêyè mwànà awu ùlwa pa buloba, cintu cya kumpala, kùdì mubidi wa nyuma bwa kubakulawu mubidi mukese wà mu bufuki awu. Pàmwäpa ngangabuka ùdì ùmwela . . . [Mwaneetu Branham ùdì ùtuutakaja byanza—Muf.] mushindu ewu, anyì cintu kampanda bwa kumunyùkushakù, pèndè ne “wà, wà, wà.” Ki dyakamwe ùmba ùya ku dibeele dya mamwëndè aku ne, “mm, mm, mm,” ùbàndisha ne ùpwekesha mutu wèndè mukese awu pa dibeele dya mamwëndè apu, bwa kufikisha mijilu ya mabeele ayi ku dipatula mabeele.

123 Kànà kakese kàà ngombe, pàdiku anu kàpàtuka munda mwa mamwàkù, nekajuukile ku tuubinù twàkù tukese atu paanyima pàà tusunsa tukese cyanàànà. Nekènzè cinyi? Kàdi kààlukila buludi, kàkwàta mamwàkù awu, ne kàbanga kunyùkusha mutù wàkù mukese awu kàwùbàndisha kàwùpwekesha mushindu ewu, ne kàpeta mabeele àkù. Aleluuyah! Eyowa's, mukalenge.

124 Pàdi mubidi wà mu bufuki ewu wùbwela munda mwa maamù awu, kùdi mubidi wà nyuma muwìndile.

125 Ne pàdi mubidi wà mu bufuki ewu wèdiibwa panshi, aleluuyah, kùdi mukwabo mwindile mwàmwa! Tudi tuumuka anu cyanàànà mu ewu ne tubwela mu mukwabo, tudi tushintulula bisòmbedi byetu. Cya cifwaka eci cidi ne cya kuvwala dibènga-kufwà, cya nyuma eci; dibola edi didi divwala dibènga-kubola. Mubidi wà kale wùdi mwele minyengu, mudikoke, mukòbàme ewu, kadi kawàkushintululakù mmwenekelu wawù to nansha kakese, ndi njinga kwamba ne pàdiwu wùya mwàmwa naka, wèwè neutungunuke ne kwikala ne nyuma anu yèyè umwèumwè awu.

126 Lekelaayi nnupèèshèku kaacintu kakese kàdi kàmwèka kunùdi bu ne nkakonyangale, kadi m'Bible, pashiishe nènnpèèshè kiikalà mwa kunwolwelaku. Tàngilàayi eci nunku. Musangu wà Shawùlà wa kale, mfu—mfumu awu, wa—wa kale awu, muyiishi munene wa kale wa cyena mangumba kwine kuntwaku musangu awu, nudi bamanye's, mwine uvwa ne mutu ne makaaya kumutu kwa bôbò bônso awu, kadi mwikàle ne bwôwà, kabàvwakù bamanye kantu nansha kamwe pa bidì bitàngilà Citàmbe-mfùkilo to. Bivwa bikèngela bwa Davìdi kulwaye bwa kusungila mwànà wa mukooko mukana mwa nyama wa ntambwe, kushebeya Goliyààtà. Mutangilaayi numone. Yèyè ùkaavwa mushiye Nzambi muye kule, mu mushindu wà ne wàkafika too ne ku dikina muyiishi mubunguluki wa mu malaba ewu. Ne pamutu pàà kwikalaye mutwe ku cyèndè, bwa kuteetaku kumwambulwisha, yèyè kadi kumukudimukilaye. Aci cyôci kacyi cimfwànyì anu menemene, cimfwànyì anu menemene! Kumukudimukilaye buludi!

127 Mbanganyì bàvwàku mwab'ewu pàngàakayà mu lwendu lwànyì lwà kumpala, ne mémè kuyiisha pa ne: "Davìdi ùshebeya Goliyààtà," pàngàakayà apu? Bààbùngì, ndambu, bakese menemene bàà ku bàà kale. Nkàadi pa kuya cyakabidi mu elu nunku. Nudi bavùlùke cìvwà, nudi numona cidi cìfume ku dyenzeka mu dyalumingu dyàshàadi edi aci anyi? Cidi munkaci mwa kubwela buludi mu citùpà cikwabo. Kampanye kiibìdi kàà Davìdi, citùpà ciibìdi cya mudimu wèndè wà bwambi. Aci's ncyà bushuwa menemene. Ne, pashiishe kulwaye mfumu kumutu kwa Izaleela. Monaayi mùdi mudimu wà bwambi awu mpindyewu wènda wùbwela mu citùpà citàmbe bunene, wènda wùshààla mutàmbe bunene. Ki mwàkadìbi kabidi bwa Davìdi. Mémè ndi mmona eci pàakakùfikàye, Davìdi awu, kaa, pàakafikishà

Nzambi Davidi kwòkù aku bwa kushebeyaye nyama wa ntambwe awu, monaayi, ne bwa kushebeyaye nyama wa ours, ne pashiishe kushebeya mwena Pelèshètè awu. Mpindyewu, kulwakù cikondo cyàkafilà Nzambi nyuma mubi bwa kulwaye pambidi pàà mulumyana wa kale ewu. Ne wa . . . Bwa kwenzaye cinyi? Bwa kukinaye Davidi. Ne ndi ngeela meeji ne . . .

¹²⁸ Mpindyewu, mikaba ya mèyi eyi. Mpindyewu tèèlejèayi, nwènù bânà beetu, nwènù bàdi bàtèèlejè mikaba ya mèyi eyi, nwènù nubenga kupetangana naanyi ku mèyi, nwamfwilaayiku luse. Nwamonu's, mèmè ndi mununange. Nènkawilàngàne neenu dyàmwàmwa nansha bya munyi, nwamonu's, bwalu pawikalà mulume wa Nzambi mèmè nènkawilàngàne neebe nansha bya munyi. Kadi, ndi njinga kwamba nunku ewu, kabingilà nkòkò aka: Anu bwalu Shawùlà wàkamòna ne Davidi ùvwa ne cintu kampanda civwàye kàyi yèyè naaci to. Dìbà adi cyàkenzekà ncinyi?

¹²⁹ Kalumyana kàà mubidi “mukunzubile,” mudikoke, Bible mmwambe ne yèyè ùvwa ne mubidi “mukunzubile.” Kàvwa mwànà mulenga kumona menemene to, “mukunzubile” mbwena kwamba ne kàdi anu kalumyana kàà mushindu wà mubidi mudikoke. Kuyaye kwàka, ki Shawùlà, mona's, kumuvwàdikayè bya mvita bya Shawùlà pambidi pèndè, ne mèmè ndi ndifwanyikijila ne ngabu ùvwa mupweke mukafike too ne ku makàsà. Ki yèyè kwamba ne: “Nguumùshè bintàkanyì ebi pambidi. Mèmè—mèmè ndi ne . . .” Pàmwàpa ní wàkamupèèsha dipolome dya bu-docteur, dya Ph.D. anyi dya L.L.D., anyi cintu kampanda, nudi bamanye's. Mushindu wàkambàye ne: “Mèmè ncyèna ne cìndi mumanye pa bìdi bitàngilà bintàkanyì abi to, bwalu nciitu mubìbidile to. Lekela ngangate eci, cìndi mumanye mwa kukwata naaci mudimu.” Eyowa's, mukalenge. Kwangataye yèyè ndundu wa nyuunyi.

¹³⁰ Ki kufiikishabo Davidi munda bwalu bânà bàà bakaji, maekeleeziya, maekeleeziya àvwa imba ne: “Shawùlà, yèyè mmufwànyine kwikala mushebeye byèndè binunu, kadi Davidi yèyè mmushebeye byèndè binunu makumi.”

¹³¹ Dìbà adi kukwacikayè mukawu ne: “S'ncintàkanyì cya kale cya Dìnà dya Yesu aci, kaCiyi ne bwine bwa nsongo.” Ncyà bushuwa. Kadi Nzambi wàkamwenzela cinyi? Nzambi wàkatùma nyuma mubi pambidi pèndè, bwa kukinaye Davidi, ki kukinaye Davidi kakùyi bwalu to.

¹³² Davidi's ùvwa mufwànyine kwikala mumunyenguvule nshingu misangu nansha búngì kaayi. Yèyè's ùvwa anu mufwànyine kwikala mucyènzè, kadi kubilekelaye pèndè nanku. Kàvwa anu wàmba bwalu to. Ncyà bushuwa ne yèyè ùvwa anu mufwànyine kwikala muncyènzè. Wàkaya ne wàkakosa luzemba lwà cinkutu cyèndè, bufuku kampanda, kwalukilaye, e kwamba ne: “Tangila kuneeku, s'udi mumone's!” Eyowa's, mukalenge,

yêyè ùvwa anu mwa kwikala mucyènzè, kadi wàkamulekela cyanàànà. Nunku's mmutapulule anu disangisha dyèndè adi ne mubatangalaje, ne mubange bwèndè bulongolodi budyènzela bu yêyè muswe kwenza nanku. Kadi kàakacyènza to, wàkalekela anu Shawùlà ùtùngunuka. Shiila Nzambi àlwanganè Yêyè mvita ayi. Eyowa's, mukalenge.

¹³³ Pa nanku yêyè pàvwàye ùtùngunuka ne kupatuka ne kampanye katàngile ku ndekeelu wakù, ne yêyè wènda ùya, nyuma mubi awu wàkafika too ne mu mushindu wà Shawùlà kàcìyikù mwa kupeta dyandamuna nansha dimwe dya kùdi Nzambi to. Paanyima pàà mutanci yêyè. . . Nyuma wa Mukalenge ùkaavwa mumuumuke. Ki mukulumpe Samwèlè, mwine uvwabò babenge awu, mwine uvwa mu bulelela Dîyi dya Nzambi kùdìbo awu, mwine uvwa mubàmbile kumpala mene kwa kuswabo bwa kwenza maalu bu bàà pa buloba awu . . .

¹³⁴ Mmunyi mùdì ekeleeziya ùswa bwa kwenza maalu bu bàà pa buloba? Beena Mpenta babàtìjìibwe, ba-Méthodistes bàdi benzè dilabula dya Nyuma Mwimpè, ne ba-Baptistes, ne ba-Presbytériens, mbaswè kwenza maalu bu bàà pa buloba bwa cinyi? Bàdi bènza nanku bwa cinyi? Mèmè ncyèna mumanye to. Mèmè—mèmè ncyèna anu mwa kucyumvwa to. Wèwè udi wamba ne: “Ee, kunaya kwa karta kàà pòker s'kùdi kùumushakù luteetùkù, anu kakese nàka bwa kuumushaku luteetùkù, anu ndambu wa manayi àdì kaàyi nansha ne musinga to,” mwònsò mùdì ucibiikila amu. S'mmpekaatu. Kabìvwa bikèngela bwa nwènù kwikala ne bintu abi mu nzubu mwenu to. “Mona's, kabyena anu byènza bibi to bwa kunwaku anu kaavèrè kakese menemene kàà maala a bière. S'tudi banwe anu tukese menemene. Mèmè ne mukàjàànyì tutu tunwaku anu tukese cyanàànà mu mapingaja.” Kadi katanci aka anyi, bàna beenu balela bànwakù pààbò ndambu's. S'ki mùdìbi cya bushuwa.

¹³⁵ Ne nwènù bakaji, hm, dyabulu's mmwenze anu . . . Cyôcì aci's ki cyàkenzàye ku cibangidilu, ne ncyà bushuwa ne yêyè mmunuvwije cintu cya diludikila mikete nwènù bàna beetu bàà bakaji. Yêyè ùdi wènza nanku anu bwa . . . bwalu's yêyè mmumanye cidiye mwa kwenza. Yêyè ùdi mwa kuseeswisha muntu mukaji ne lukasa lwònsò misangu cinunu kutàmba muntu mulume. Ndi mumanye ne aci cidi cinutapa ku mwoyi, kadi's m'Bulelela. Ki cyôcì aci menemene. Ki cyôcì aci cyàkenzàye mu budimi bwa Edènà. Yêyè ùdi mwa kuvwija . . . Mpindyewu, mukaji ùvwa wa kweyemena, ùvwa ne meeji matooke, kadi's wàkaseeswishiibwa. “Adàmà kî ngwàkaseeswishiibwa to,” mùdì Bible mwambe. Kì nyêyè wàkaseeswishiibwa to, kadi mukaji ngwàkaseeswishiibwa. Pa nanku yêyè ùdi mwa kuseeswisha mukaji. Kadi pààbì's bampaasata bàdi bàya anu buludi bàkajidila bayiishi bakaji, bàbàtèèka kumutu kwa masangisha mushindu awu, pàdì Bible ewu ùcìpiisha kuumukila anu ku Genese too ne ku Bwàkabuulwibwà. Wèwè udi wamba ne:

“Ee, s’mbîmpè. S’mbîmpè. Bôbò’s bàdi ne. . . Bôbò’s bàdi mwa kuyiisha anu mùdi bakwabo mwa kuyiisha amu.” Ndi mumanye ne aci ncyà bushuwa.

¹³⁶ Byenzè mùvwà musangu kampanda muntu mubange kwakula mu myakulu, mêmè kutungunuka anu ne kuyiisha, kadi pângààpàtukà. . .

Mukaji mukwabo ùvwa mwambile mwanaanyi wa balume, wàmba ne: “Ndi ne mukenji wà kufila maalaba diloolo,” yèyè ne, “pààfikà papa webe pa cibumba cya ku cyambilu.”

Yèyè ne: “Ee, Mwábânà, udi uswa kwamba bishi’s?”

¹³⁷ Ki diloolo adi pààkakùmbanà díbà, pànkaavwà ndilongolola bwa kwenza díbiikila dya ku cyoshelu, mukaji awu kulongololaye nsuki yèndè ne kubàndishayè nshesheete yèndè ne bikwabo byònsò, kudilongololaye, kwelaye cidya e kumata munkaci mwa cyenedi amu ne kubangaye kutupika ùya muulu wàlukila, wàkula mu myakulu ne wàmba ciprofeta. Mêmè pàànyi kutungunuka anu ne kuyiisha, ngenza díbiikila dyànyi dya ku cyoshelu. Apu mêmè nciyikù mwa kuneemeka aci to nansha kakese, kacìvwa cijaalàmè to. Nunku pashiishe, ee, Bible mmwambe bwa kubenga kucyenza, mmwambe ne: “Nyuma wa—wa baprofeta ùdi ùkòòkela muprofeta.” Nzambi ùdi pa. . . Nzambi ùdi munkaci mwa kwakula pa cibumba cya ku cyambilu, Mulekèlaayi àkulè. Pòlò mmwambe ne: “Cintu kampanda cyòci cibiulùdíibwe kùdi muntu, àpuwè too ne pàdi mukwabo awu ùjikija.” Ncyà bushuwa’s.

¹³⁸ Mpindyewu, pashiishe ndi mwenze anu mpàtuka pambelu anyi, bantu abu kwambabo, musùmbà munene wà bantu’s, kwambabo ne: “Udi mubungamije Nyuma Mwîmpè diloolo edi.”

Mêmè ne: “Ku cinyi cîndi mwenze? Cîndi mwenze ncinyi?”

¹³⁹ Bôbò ne: “Ee, mwaneetu wa bakaji awu páfidiyè mukenji wèndè apu ne, aleluuya,” mwàkambàbo, “nanku awu.”

“Mona’s,” mùngààkambà, “mêmè mvwa munkaci mwa kuyiisha. Yèyè’s ùvwa mupatuke mu bulongame.”

¹⁴⁰ “Kaa,” mwàkambàbo, “aci’s cìvwa cipyacipyà cìfùmina buludi ku Nkwasa wa butumbi. S’cìvwa cipyacipyà kutàmba cyúvwà wèwè munkaci mwa kuyiisha aci.” Uh!

¹⁴¹ Mpindyewu, aci’s cìdi cìleeja anu ne. . . aci cìdi cìleeja anyi eci, ne mêmè ndi ncyàmba bwa kununeemeka, anyi nkatombòtombò, anyi ndipanga dya kaneemu, anyi ndilongesha dya kùdi muntu udi kàyi mumanye mukanda to udi kàyi mumanye Nzambi kutàmba mùdi kàlulù kamanye bilatu bya kwendela naabi mu nêjè. Mpindyewu, bwa aci, ncyèna ngamba ne aci ndíyi dya—dya bukutakane nansha, bwalu ewu kî mmwaba wà dyelela bilele to. Kadi aci—aci mbulelela anu bwetu bwa menemene ebu. Muntu udi mufwànyine kwikala mumanyè ne Nzambi kî mmutwàdi wa cimvundu to. Yèyè ngwa

ditalala. Bible ngudibo kabàyi bamanye. Cyàbò pààbò civwàbo bamanye civwa anu kutupika kuya muulu kwalukila, kwakula mu myakulu, kwamba ne: “Ndi ne Nyuma Mwîmpè. Aleluuyah!”

¹⁴² Mémè ewu’s nkààdikù mwimane ne mumonemone, mu Afrike, bampàkààmàngà ne bakwabo bônso bàakula, bantu bu binunu bitaanu nanku awu cyapamwe; bàtùpika bàya muulu bàalukila, ne mashi kwîsù kwónsò eku, bàakula mu myakulu, ne bânwina mashi mu kabalùbalù kàà mutu wà muntu; bàsòka dyabulu, ne bàakula mu myakulu.

¹⁴³ Kadi pààbì dyakula dya mu myakulu’s ndipà dya kùdi Nzambi, kadi kí ncileeki cya Nyuma Mwîmpè cìdì kaciyi mwa kupangila to. Anyishaayi nwàmbilè cyòcì aci mpindyewu. Mémè ndi cya bushuwa ngiitabuuja ne bansantu bônso bàdì basonsòdiibwe bàtu bàakula mu myakulu. Mémè ndi ngiitabuuja ne muntu musangu kampanda paùdi ulwa musonsòdiibwe menemene kùdi Nzambi mu mushindu wà wakula mu myakulu. Mémè ndi ngiitabuuja nanku. Kadi ncyèna ngiitabuuja ne aci ncimanyinu cya ne udi ne Nyuma Mwîmpè to. Eyowa’s, mukalenge. Ndi ngiitabuuja ne kùdi misangu ya paùdi ne diitabuuja, muntu’s, wèwè mufwànyine kuya buludi katentekela mwànà mukese udi ne dîsaaàm dya kansere byanza, pààbì bayiishi makumi ataanu bamanè kumusambidila, ne yèyè mufwànyine kwondopiibwa bwalu maamù awu udi ne diitabuuja bwa mwine mwànà awu. Nzambi ngudi mumupeesheye, maamù awu ncidimba cya Mubidi wà Kilisto. Eyowa’s, mukalenge. Ndi ngiitabuuja nanku. Nkààdi mucimone cyenzèke ne ndi mumanye ne ncilelela. Kadi bwalu bùdiku mbwà ne, kutèeka ekeleeziya mu bulongame, kumutèeka mu bulongame bwa twamònakù mwa kukwata mudimu.

¹⁴⁴ Mpindyewu tùjikijààyaaku citùpà cikwabo cya mvensa ewu kaaba aka kumpala kwa twètù kuumuka.

*... paanyima pàà nwènù bapete, nwènù
nwàkatwìbwa citampi cya Nyuma Mwîmpè wa mulayi.*

¹⁴⁵ “Citampi!” Citampi ncinyi? Citampi ncinyi? Citampi cìdì, cintu cya kumpala cìdìcì cileeja mmudimu wùkaadì mujikija, mudimu mujikija. Cintu cìdì cìlondà cìdìcì cyùmvwija mbwena cintu. Ne cintu cìdì cìlondà cìdìcì cyùmvwija ndikubiibwa, kucilama.

¹⁴⁶ Twǎnjìbì kwamba, cileejilu, kale wàwa mvwa nkwata mudimu ku kùmpànyì wa Njila ya njanja wa Pennsylvanie, mvwa nkwata mudimu ne tààtù mu njila wa njanja. Tuvwa tupàya bintu mu màkaadikà. Nenku tuvwa twela mu cyapù cya dikangila byakudya mu makopo eci, tuvwa tutèèkamù makopo makànga a byakudya, ne tuvwa tuàtèèka amwe lwà kuulu eku ne makwabo lwà kwînshi eku, ne makwabo lwà kuulu mushindu ewu. Kadi kumpala kwa dikaadikà adi kukangiibwadi, mukòntononyi ùvwa ùpicila muntwamu, ne

ùvwa ùàsàka, ùsàkila *eci*, ùnyùkusha *cyàcya* nàka. “Kaa! Edi to! Bintu nebicibuluke byònsò bishaalè tupese tupese kumpala kwa kufikabi kuntwaku. Bwa edi dikaadikà to! Patulaayi bintu. Byènzùlùlaayi!” Mukòntononyi ùvwa ùbènga dikaadikà adi.

¹⁴⁷ Nyuma Mwímpè ki Mukòntononyi. Yèyè ùdi ùkunyùkushakù ndambu, kadi wèwè uzèla. “Udi witabuuja Dìyì dya Nzambi dyònsò anyi?”

“Ncyèna ngiitabuuja bintàkanyì bya Dìnà dya Yesu abi to.”

“Bèngaayi aci. Wèwè nyawu udi uzèla.”

“Ncyèna ngiitabuuja dyondopa dya kùdì Nzambi anyi cintu cya mushindu awu to.”

“Mucíkàlè ùzèla. Bìpàtùlaayi.”

“Udi witabuuja ne Yesu Kilisto ùdi umwèumwè awu makeelela . . .?”

“Ee, mu mushindu kampanda’s.”

“Wèwè nyawu udi uzèla. Tuutà aci musèbà ùcyèlè pambelu, wamonu’s, kí ncyanjì kwikala pabwìpi to.” Eyowa’s, mukalenge.

¹⁴⁸ Mwaneetu, pàdiye mudilongòlòle bwa kwamba ne: “Amen!”

“Ukàadi mupete Nyuma Mwímpè anyi?”

“Amen!”

“Byònsò bikaadi bijikija anyi?”

“Amen.” Dìbà adi cidì Mukòntononyi wènza ncinyì? Byònsò mbikùta ne bitwàngaja bímpè, byùle ne Evànjeeliyò tente. Kaa, Dìyì ne Dìyì dyònsò dya Nzambi ndímpè. Byònsò mbipwàngàne. “Ndi ngiitabuuja Dìyì ne Dìyì dyònsò. Amen! Amen! Amen!”

“Wèwè udi witabuuja ne Nzambi ùcitu anu wòndopa anyi?”

“Amen.”

“Udi witabuuja ne Yesu, umwèumwè awu makeelela, too ne kashidi anyi?”

“Amen.”

“Udi witabuuja ne Nyuma Mwímpè ngwa cya bushuwa anu mùvwàYe kwònsò aku amu anyi?”

“Amen.”

“Udi witabuuja ne Nyuma umwèumwè wàkapwekela Pòlò awu, ùdi ùtùpwekela peetu anyi?”

“Amen.”

“Udi witabuuja ne Yèyè ùdi wènza bintu bimwebimwe kutùdì, byàkènzàYe kùdìbo abi anyi?”

“Amen.” Kaa, kaa, bìdì munda mwa mukaji ewu bikaadi byènda bishààla bitwàngaja bímpè mpindyewu. Um-hum, byènda bishààla bitwàngaja bímpè mpindyewu, tukàadi pabwìpi ne kukànga ciibi. Eyo.

149 Dìbà adi mukòntononyi ùdi ùkànga ciibi. Ùdi wènza cinyi? Ùdi ùtwakù citampi. Pashiishe ùdi ùtùuluka apa ne wàngata cikwacilu cikese cya nkàlà eci, wòlola cyaanza kwàka wàmbula kaacintu kakese aka ne ùtwa citampi pa cyòcì aci. Kùdìdingi kùcìkòsukù to. Piikalàbi ne, dikaadikà adi, kùyaayàdi nku Boston, kabeena mwa kucikosaku to. Ncifwànyine kwikala cilumbu cya muntu wèdiibwa mu buloko bu wèwè mwa kukosa citampi aci pàdìci kaciyi cyañjì kafika ku Boston to. Nenu muntu udi ne bukookeshi abu ki udi mwa kukosa citampi aci, ne anu yèyè nkàayendè. Ncya bushuwa. Ncintu cya bende cya kùmpànyì *kampanda* wa njila ya njanja. Ncitampi cyabo bòbò. Nditwishiiibwa kùdìbo dya ne dikaadikà adi bintu mbipàyamù bimpè, bwa ne dikaadikà adi dikaadi dilongolola. Ndyabo bòbò. Kì mbafwànyinekù kutwa citampi cya “B&O” ku dya “Pennsylvanie” to. Bikèngela wèwè ùtwibwè citampi, ne pàdìci citwibwa citampi.

150 Nenu pàdì mwena Kilisto ùpàyiibwa ne Evànjeeliyò, mùle tente ne bwimpè bwa Nzambi, bintu bimpè byònsò bya Nzambi bìsanganyiiibwa munda mwèndè, mwikàle ne mwoyi muunzulula, mudilongolole bwa kukwata mudimu, mwikàle ne budiswilè bwa kushikikiibwa bilondèshile mwaba, wènza byònsò bìdi Nyuma Mwimpè ùmwambila bwa kwenzaye abi, muumuke ku lufu muye ku Mwoyi, mujidiibwe ku bintu byònsò bya pa buloba, wèndela mu Bukènkè pàdì Bukènkè bùlwa kùdiye, mutungunuke wènda ùya, awu mmudilongolole. Dìbà adi Nzambi ùdi ùkànga ciibi cya maalu a pa buloba paanyima pèndè, ne ùtuuta cya eku ne cya eku musangu wumwe mushindu ewu, ne ùmutwa citampi cya Nyuma Mwimpè wa mulayi. Aleluuyah! Too ne dìbà kaayi? Too ne kùyaayàye. Kumupatwidi apa mu njila wa njanja emu bwa kucikangula bwa kumona cyakabidi bintu byònsò ní bìdi bimpè to. Bìdi bimpè, wèwè bìlekèlè anu nanku. Mukòntononyi mmumane kubikòntonona. Wèwè udi mutwibwe citampi too ne ku dìbà kaayi? Too ne ku dituku dya bupikudi bwebe. Ntoo ne ku dìbà adi kùdì mutwibwe citampi.

151 “Ee, paùdi ufwa, dìbà adi, Mwaneetu Branham, bwalu bùdi cinyi paanyima pàà wèwè mufwe, muwàmbi ne udi anu naaCi?” Wèwè udi naaCi bwa kashidi. Mwoyi wùdi wùbangila mwaba kaayi? Ku cyoshelu. Anu kwòkù aku mene nkùdi umona kaamundidimbi kakese menemene. Kì mundidimbi ngwòwù awu, Citampi cya Nyuma Mwimpè. Pashiishe cidi mundidimbi wà mindidimbi wà mindidimbi, mùmvwà mwambe dituku adi amu. Kadi paùdi ufwa, udi utungunuka anu ne kwenda kupicila mu mindidimbi ayi too ne paùdi ukafika ku mutaleela, umuka ku mutaleela ukafika ku kaamushimi kakese kàà kàpweka bitekete bitekete, umuka ku kaamushimi aku ukafika ku kasulu, umuka ku kasulu ukafika ku musulu, umuka ku musulu ukafika ku mbù, nwamonu’s, wa dinanga dya Nzambi. Wèwè udi muntu anu umwèumwè awu.

152 Tàngilàayi kuneeku. Mukulumpe Shawùlà, muntu wa kale uvwa mutwe cimpingà awu, kàvwakù mwa kupetangana ne Nzambi to, kadi pèndè kàvwa mujimine to. Ncya bushuwa ne kàvwa mujimine to. Yèyè ùvwa muprofeta, kadi ùvwa anu muye kule ne Nzambi cyanààna. Ki bwa cinyi, bânà beetu, ngàm̀bi ne: “Kanwena bajimine to.” Pa nanku dîbà adi vùlukàayi ne, yèyè ùvwa anu mupatuke mu diswa dya Nzambi cyanààna, ki katanci aka, yèyè—yèyè kàciyi wa bàpeta ku mèyi to. Mpindyewu, pàmwàpa kabivwa bikèngela mèmè kwikala mwambe nanku to. Eyo, cîndi ndi anu ntungunuka cyanààna bwa disangisha dya disanka diloolo edi. Pa nanku dîbà adi, nudi bamanye’s, kadi katanci aka anyi, kaa, ekelekele, dîbà adi. . . Kuyaye ka—kakonka Ulimà Tuumimà.

153 Nudi bamanye cìvwa Ulimà Tuumimà’s, cìvwa ncibwikilu cya pa cyâdi, efòdà uvwa—uvwa Aalònà ùvwa. Ne bivwa misangu yònsò, Nzambi ùtu misangu yònsò anu Nzambi mutàmbe-mfukilu mwikàle wàndamuna anu mu mishindu mitàmbe-mfukilu. Ne pàvwa muprofeta wàm̀ba ciprofeta, kadi makènkè àdì kaayi ùmvwika awu òwò kaayi mapenye mu Ulimà Tuumimà amu to, cìvwa cya mafi. Pàvwa mulooçi wa ciloota wàwula ciloota cyèndè kadi kaciyi cìpenyisha bukènkè pa Ulimà Tuumimà apu to, nansha cyòci cyùmvwika cìmpè cya bishi, cìvwa cya mafi. Ncya bushuwa’s.

154 Ne bwànyi mèmè nansha wèwè ne mapolome a bu-docteur búngi munyi ne bulongolodi bwenu bwikàle bunene bishi, paùdi wamba ciprofeta anyi uyiisha, cyòci kaciyi cìkùmbanangana ne Dìyi edi to, udi mu ntùpàkànyi, mwaneetu. Udi. . . Ewu ki Ulimà Tuumimà wa Nzambi. Wèwè wamba ne kùvwa mudyànjila kulongolola kumpala kwa difuka dya dyulu ne buloba to, bukènkè abu kabwakupenya nansha, bwalu Bible mmwambe ne wèwè uvwa mudyànjila kulongolola. Paùdi wamba ne bivwa bikèngela bwa wèwè kubatijiibwa mu dìnà dya “Taatu, Mwànà, Nyuma Mwîmpè,” kabwena bùpenya to, bwalu muntu nansha umwe mu Bible kàakabàtijiibwakù mushindu awu to. Anu mu Dìnà dya Mukalenge Yesu. Kabwàkupenya ku to, pa nanku kùdi cintu cidi kaciyi cyènda bìmpè mwaba kampanda.

155 Pa nanku Ulimà Tuumimà kàakandamunakù mukulumpe Shawùlà to, ne yèyè kàvwa mwa kupetakù nansha mene ciloota to. Ùkaavwa muye kule bikole mu mushindu wà kàyikù mene nansha mwa kupeta ciloota. Pa nanku nudi bamanye cyàkenzàye anyi? Wàkapweka e kuya kwa mwamùlopò, ne mwamùlopò ewu, mpàkààmàngà wa kale wa dyabulu awu kuntwaku, mpàkààmàngà. Ki kwambaye ne: “Udikù mwa kutempa lubùkù anyi?”

156 Mukaji awu ne: “Eyowa, kadi Shawùlà mmwambe ne neashebeye muntu yònsò udi utempa lubùkù.”

157 Yèyè kwamba ne: “Mémè nénkukùbè,” muvwale bilàmbà bu muunzulwidyanganyi wa ku ciibi. Kwambaye ne: “Ntempèlèku lubùkù ùmpàtwilè ku bafwe bàkaadì baye dyàmwàmwa abu.” Mpindyewu tèèlejàayi eci. “Mpàtwilè nyuma wa Samwèlè muprofeta.”

158 Ki mukaji awu kubwelaye bwa—bwa kutempa lubùkù. Nenku, mmwenze anu ùtempa lubùkù, kuponaye mutwe mpala panshi, kwambaye ne: “Ndi mmona nzambi yènda yibànda.” Nwamonu’s, yèyè ùvwa mumpàngaanù, “nzambi,” yibidi anyi yisatu, bu mùdì Taatu, Mwànà, Nyuma Mwìmpè, anyi cintu cya mushindu awu, nudi bamanye’s. Yèyè kwamba—yèyè kwamba ne: “Ndi mmona nzambi yènda yibànda.”

159 Awu ne: “Anjì umvwijàbi mùdiye tǔng. Mmwenekelu wendè ùdi bishi? Yèyè ùdi ne mmwenekelu kaayi?”

160 Yèyè ne: “Ngwa kanyikanyi ne mwikàle ne cinkutu cyela pa makaaya.” Yèyè kàvwa mushintulukeye to nansha kakese.

161 Awu ne: “N’Samwèlè. Mufikishèbi mu cibambalu emu, mufikishèbi kumpala kwànyi eku.”

162 Kadi tàngilàayi numone pààkafikà Samwèlè kumpala kwa Shawùlà, wàkamba ne: “Ciwàmbiikididi ncinyi, peebe mumane kulwa mwena lukuna wa Nzambi?” Kadi tàngilàayi numone. Kabiya anu ne yèyè ùcìvwa anu Samwèlè to, ùcìvwa anu mulame nyuma wa ciprofeta. Ambàayaaku ne ncyà mafi, muntu àmbè ne ncyà mafi. M’Bulelela! Yèyè ùcìvwa anu muprofeta. Bwalu wàkamba, wàkamba ciprofeta e kwambaye ne: “Mvita neyìkukùdimùkìlè maalaba, ne wèwè ne bânà beebe bàà balume babidi abu nenufwe mu mvita amu maalaba, ne patwàmbà kufika dîbà ditùdì edi maalaba diloolo wèwè newikalè naanyi.” Ncyà bushuwa anyi? Yèyè ùcìvwa anu muprofeta!

Mpindyewu wèwè udi wamba ne: “Kya, kadi aci mwamùlopò awu’s ngwàkacyènza.”

163 Eyo, kadi nènkwabibile Kampana uvwa kàyi mwamùlopò to. Yesu wàkangata Peetèlo, Jakobo, ne Yone, ne bàkabànda musangu kampana ku Mukuna wà Dikudimuka dya mpala, ne bàvwa biimàne ku lusongo lwà mwine mukuna awu. Nenku, Yesu, Nzambi ùvwa munkaci mwa kushikika Mwan’Ende; mùndì nteeta eci. . .mùmvwà muleeje diloolo adi, kushikika kwa mwànà wa balume. Ne pààkenzàbo nanku, bààkakènzakana e kusanganabo ne Mòsà ne Eliya bàvwa biimàne mwaba awu. Bàvwa munkaci mwa kuyiikila, bènza muyiiki. Kaciya tuumabendela tukese tutòòke tùpitakana eku ne eku to, anyi, tuumavuba tukese tutòòke’s wè, munkaci mwa kupitakana eku ne eku. Kadi, bàvwa mbantu anu beetu aba, biikàle bàyiikilangana. Mòsà ùkaavwa mumana kujiika mu lukita lùvwàbo kabàyi bafùndèepù dînà to kùkaavwa bidimu nkama mwandamukulu. Ne Eliya ùkaavwa mwalukile Kumbelu mubànde mu dikalu dya mvita, kùkaavwa bidimu nkama

yitaanu. Kadi's ki bôbò aba bùbìdi bwabo, bacikàle ne mwoyi anu mwabo ne kale, biimàne mwaba awu munkaci mwa kuyiikilangana Nende kumpala kwa Yèyè kuya ku Kalvariyo. Aleluuyah! “Batwibwe citampi too ne ku dituku dya bupikudi bwetu.”

¹⁶⁴ Nêndwijakajè, ne pashiishe nênjikijè bwalu dîbà dikaadi dipîte, nenku netusambidile babeedi, mu tusunsa tukwabo tutwè ku tutaanu. Mvensa wa 14, kubala, ngânji mbalulule wa 13, mmwangàtè, pàa dishindamijila.

Mu yèyè nwènù...nwâkeeyemena, paanyima pàa nwènù bamane kuteeleja dîyì dya bulelela, Evânjeeliyo wa lupandu lwenu, . . .

¹⁶⁵ Mpindyewu vùlukàayi, ndupandu kaayi lùdibo naalu? Aba bàvwa—aba bàvwa mbeena Kilisto bàa beena Efèsò. Bôbò, mpindyewu tàngilàayi, nuvwa bamone beena Kolinto anyi? Bìvwa bikèngela misangu yònsò anu bwa kwikalaye ùbàmbila ne: “Pàndi ndwa munkaci mwenu, ewu ùdi ne dyakula dya mu myakulu, ewu ùdi ne dyakula dya mu myakulu, ewu ùdi ne musambu, ewu ùdi ne dîyì dya ciprofeta, ewu ùdi ne . . .” Nwamonu's, kàvwakù mwa kubalongesha cintu nansha cimwe to, bwalu bôbò bàvwa misangu yònsò anu bàjinga *cikampanda*, *cikansanga*, anyi *cikankenga*. Bantu aba bàvwa ne cintu anu cyôci cimwecimwe aci, kadi bàvwa naaci ciikàle mu bulongame. Kacya yèyè kàvwakù mulongeshe beena Kolinto cintu nansha cimwe cya mushindu ewu to, kàvwa ne mushindu to, ekeleeziya kàvwa mu bulongame bwa yèyè kucilongesha to. Mpindyewu, aba bantu mbàvwàyekù mwa kulongesha cintu cya bushuwa.

. . .cidi, lupandu lwenu, mu yèyè kabidi paanyima pàa...nwènù bamane kwitabuwa, nwènù nwâkatwìbwa citampi cya Nyuma Mwîmpè wa mulayi,

Udi cyeyà... (Kaa, ncipìcìkù aci to)...cyeyà cya bumpyanyi bwetu too ne...bupikudi bwa bidì bu byetu bitùsumbìla, ku disaamuna dya butumbi bwèndè.

Yoyòyò!

¹⁶⁶ Nyuma Mwîmpè ncinyi? Mpindyewu, pashiishe nêmbalè cidi cishàale aci lukasalukasa bu nwènù mwa kuntwalaku too ne mpindyewu. Tuvwa penyì diloolo adi, Mwaneetu Mike? Mwaba wùvwàbo bònsò ne disanka awu, kaa, wùvwà byònsò anu ditalala awu, cìvwa ndinanga dipwàngàne. Mpindyewu, musangu wònsò wùdi ulwa mu *nunku*, udi ubipwekesha ndambu, ubipwekesha. Musangu wònsò wùdi wela cidya, udi utàmba kuseemenaku ne ndambu wa centimètres. Pàdibi bikafika panshi pa buloba, udi ne mundidimbi wà mundidimbi wà mundidimbi wà mindidimbi. Mpindyewu, ki búngì bwa Nyuma Mwîmpè ùdi nende munda mwèndè amu abu. Ki dinanga ndyòdi adi. Kadi, kaa, wèwè udi ne nyoota ya cintu kampanda.

167 Kaa, bantu bakulakaji bu mùdì, bakulakaji kî mbafwànyinekù bóbò...Mushindu mwine wùndiku mufwànyine kunanga bwa kwalukila cyakabidi ne kwikala ne bidimu dikumi ne bitaanu, makumi abidi's wè! Kaa, s'ndi mufwànyine kufila cintu kanà cyònsò's. Ciine aci ncifwànyine kunkwacisha ku cinyi? S'ndi mufwànyine kwikala ne bidimu dikumi ne bitaanu kadi kufwa diloolo edi. Kî mbimanya to. Kadi bu wèwè mwa kwikala ne bidimu dikumi ne bitaanu diloolo edi, wàmanyi munyi ne mamwèbè neikalè ne mwoyi, pawàmbà kafika kwenu kumbelu, anyi kààkwikala ne mwoyi? Wàmanyi munyi muwàya kafika kumbelu? Wàmanyi munyi muwikalà ne mwoyi maalaba bu wèwè ne bidimu dikumi ne bibidi, ne mubidi tumatuma? Wèwè's udi mufwànyine kupeta njiwu kufwa, mufwe cikàdi, cintu kanà cyònsò's ncifwànyine kukwenzekela. Mbya kabiyikù bimanya to, nwamonu's. Kakwena cintu nansha cimwe panwapa cya cimanyike to. Kadi cyôci aci ki cyûdi ujinga wamba kufwa's. Ncinyi aci? N'Cyôci aci Muulu mwàmwa cidi cyènza bwa wèwè kwikala ucijinga.

168 Mpindyewu, udi ubwela mu Eci, dîbà adi udi ne Mwoyi wà Cyendeleele. Mpindyewu ncinyi cidi cyènzekà aci? Ki "cyeyà" ncyôci aci.

169 Mfranga ya cyeyà mifila bwa cintu kampanda ncinyi? Mémè mulwe kùdì bwa kusumba kashinyi, ngamba ne: "Kashinyi aku kàdi mushinga kaayi?"

170 Wèwè wamba ne: "Kashinyi aka, Mwaneetu Branham, mushinga wàkù bwebe wèwè kàdi ndola binunu bisatu."

"Citùpà cya kumpala cya mushinga ncyà yingà?"

"Ee, nênkupèshèku wèwè ku ndola nkama yitaanu."

171 "Eyo, ki ndola nkama yitaanu nyôyi eyi. Nê—nênkutwàdilè mikwabo yidi mishàale ayi musangu kumpala, pândi anu mpeta mushindu. Shàala wèwè mulame kashinyi aku." Ndi nkupèsha ndola nkama yitaanu ayi, ki cyeyà ncyôci aci. Mmwômò anyi?

172 Mpindyewu, kwàtaayi aci ne, ki "cyeyà" ncyôci aci, ki "citùpà cya cya kumpala cya mushinga" ncyôci aci.

... paanyima pàà nwênù *bamane kutwibwa citampi*
kùdì...*Nyuma wa mulayi*, kùdì...*Nyuma wa*
mulayi,... paanyima pàà nwênù *bamane kutwibwa*
citampi...

Udi...

Citampi, citampi cya mulayi, Nyuma Mwîmpè wa mulayi ncinyi?

Udi cyeyà cya bumpyanyi bwetu too ne...ku bupikudi
bwa bidì bu byetu bitusumbila,...

173 Ncinyi ciine aci? Ncitùpà cya kumpala cya mushinga. Nenku, mwaneetu, kaa, kaa, kaa, kaa, kaa, bayiishi wa yàaya!

Piikalàbi ne eci nciùpà cya kumpala cya mushinga, neciikalè cinyi patwàfikilà bônso mwàmwa! Neciikalè cinyi? Piikalàbi ne eci ki. . . Piikalàbi ne eci citùdì tusankila mpindyewu eci, ne tupetela disanka búngì cyaànà mu mushindu wà ne. . . Mwva mumone bantu bàà bidimu makumi citeema bàlwa anu. . .

¹⁷⁴ Mémè ngákamòna muyiishi mukulakaji ùjuuka diloolo kampana. Kupatukaye, kwambaye. . . Nunku ewu, ùlwa pa cibumba cya ku cyambilu. Ki mémè kwamba ne: “Muntu mukulakaji wàwa neayiishe anyi?”

¹⁷⁵ Kwambaye ne: “Ee, Mukalenge abeneshiibwe.” Muntu mukulakaji wa bafiike’s, muvwale kazaku kanene menemene kaleepa kàà bayiishi aku.

¹⁷⁶ Mémè kwamba ne: “Bwa cinyi kabàyikù mwa kulekela bamwe bàà ku bayiishi batekete bàba kuyiishabo? Muntu mukulakaji wàwa, ùdikù mwa kuyiisha bishi’s mwine wàwa?”

¹⁷⁷ Kwambaye ne: “Ee,” mwàkambàye, “bànà beetu,” yèyè ne, “lelu ewu ndi muteeleje bànà beetu bàyiisha dituku dijimà,” yèyè ne, “pa bìdì Yesu mwenze pa buloba. Mémè néndondè byàkenzàYe mu Dyulu.” Yèyè ne: “Nèngàngatè kubala kwànyì diloolo edi mu Yobo 7.27,” yèyè ne, “pàvwàbi kale wàwa kumpala kwa difuka dya dyulu ne buloba,” yèyè ne, “pàkambàYe ne mitoto ya mu dinda yàkimba pamwe ne bànà bàà Nzambi bààkeela mbila ya disanka.” Kubangaye mushindu awu. Kwambaye ne: “Nudi bamanye ne, kùvwa cintu kampana cyenzèke kuntwaku.” Yèyè ne: “Nudi bamanye. . .” Ki kubangaye kulonda bìvwà byenzèke mu Dyulu. Kubituulwilaye panshi ku mwanzankòngòlò wà ku ntwàngèenu wa dyulu ne buloba awu mu Dilwa dya cyakabidi. Lwà pa dībà adi, Nyuma Mwímpè kadi kumulenagaYe. Mpindyewu, byàkakèngela bwa kulombolabo mukulumpe awu bwa kulwabo nende mwaba awu, ùvwa ne bidimu bìipacila ku makumi citeema ne bitaanu. Ùvwa anu bu nunku ewu, mukòbàme yèyè yònsò, ne mwikàle anu ne nsuki kajengu kakese, nudi bamanye’s, nunku ewu. Kupatukaye mwaba awu ne kubangaye kuyiisha, kwambaye ne: “Eyi’s wè! Aleluuyah! Butumbi’s wè!” Kuditwaye mu ditupika ùya muulu wàlukila mushindu awu. Kwambaye ne: “Kaa, kanwenaku ne mwaba bunene bukùmbàne kaaba aka bwa mémè kuyiishilapu to.” Ki kukùtulaye lubilu, wènda ùpweka mushindu awu, ne mwèndè mwònsò. Nenku aci’s cidi anu ncyeyà cyaànà. Kaa!

¹⁷⁸ Cidi Nyuma Mwímpè wènza ncinyi? Kaa, ki kaaba kimpè nkòkò aka, ngànji mbale mvensa wa kumpala wa nshapita udi ulonda. Ndikù mwa kubala anyi? Mbilenga anyi? Ambàayi ne: “Amen.” [Disangisha didi dyamba ne: “Amen.”—Muf.] Eyo, mvensa wa kumpala wa nshapita mwi2, lukasalukasa. Tèelejàayi:

Nwênù, bàvwà . . . nwênù . . . *Ne yèyè mmunùfuùlùlùlùlùlù,*
nwênù bàvwà musangu . . . bàvwà bafwe mu matomboka
ne mpekaatu,

179 “Yèyè mmunùfuùlùlùlùlùlùlùlù.” *Bafùlùlùdùdùbwe* mbwena kwamba cinyi? “Bavwijiibwe ne mwoyi.” Bambè anu kufwa, kadi mMunufuùlùlùlùlùlùlùlùlùlùlù anu ku mfranga ya cyeya cyanàànà. Nebiikalè cinyi pawikalà—pawikalà cya bushuwa mwa kufuciibwa mfranga yònsò ya makàsà? Kaa! Kabyena bìkèmesha to pàvwà Pòlò, mwambwibwe mu dyulu diisàtù, mwambe ne: “Bidì dísù kadiyi dimone; bidì dici kadiyi dyumvwe; anyi kabiyi bibwelè, kabiyi bibwelè mu mwoyi wà muntu, bidì naabi Nzambi (mu cibucilu) bwa aba bàdì baMunange.” Abi nebiikalè bishi’s wè! Nwênù bàdì bàmba bwa disanka didì kadiyi kwamba ne dyùle tente ne butumbi! Yoyòyò! Hmm! Nwênù bàvwà musangu kampanda bafwe mu mpekaatu ne matomboka Yèyè mmunùfuùlùlùlùlùlùlùlùlùlùlù pamwe ku mundidimbi wà mundidimbi wà mindidimbi. Nebiikalè cinyi panwàfika ku mundidimbi wà mindidimbi ne kubwela mu mundidimbi, kuumuka ku mundidimbi pashiishe kuya kabwela mu kasulu, kuumuka ku kasulu kuya kabwela mu musulu, kuumuka ku musulu kuya kabwela mu mbù?

180 Kadi nebiikalè cinyi pawikalà kule menemene kwàka mu bupikudi, mwikàle ne mubidi mupyamupya wà menemene, mumane kwandamuka mwàlukile cyakabidì ku bunsongààlùmè bwa menemene, anyi ku bunsongààkàjì, kùciyikù kabidi mwa kufwa? Ne utàngila panshi pa buloba, udjàmbidila ne: “Mvwa mwa kwikala nsankila tumuma twa mvinyo ne màyi mimpè matalale’s, kadi, nudi bamanye’s, ncyèna naabi dijinga mwaba ewu to. Kadi dîngà dituku Yesu nealwe, nenku mubidi wa banjelo ewu, teòfànì ùndì musòmbèlemù ewu. . .” Awu kawakupatukila kabidi mu difu dya muntu mukaji, kawakulwila kabidi ku dijinga dya disangila dya mulume ne mukaji to; kadi bwalu Yèyè wàkalediibwa kakùyi dijinga dya disangila dya mulume ne mukaji to, mèmè nèmbiishiibwè ku lufu kakùyi dyòdì adi to, kadi dîngà dituku Yèyè neàkulè ne bafwè mu Kilisto nebàbiikè, ne mubidi wùmvwà musòmbèlemù musangu kampanda awu newùbiikè ku lufu mwikàle mubidi mutumbishiibwe, ne nêngèndakanè ne nényiikilè, ne nêngiikalè ne mwoyi ne nênsankè (aleluuyah), nêngiikalè ne mwoyi munda mwa bikondo bya Cyendelele byònsò bilwalwà, ku Yesu Kilisto Mukalenge wetù. Yoyòyò! Ki bwalu mbwòbù abu’s, mwaneetu, ki Evànjeeliyò nyawu!

181 “Ki bwa cinyi mèmè pàanyi,” mùdì anu Pòlò munkaci mwa kwamba anu cyanàànà cidiye mpindyewu. Némبالè cidi cishààle cya ku cyòci eci ne pashiishe túsambidilè babeedi. “Too ne ku bidì bu byetu, eci ncyeya too ne ku bidì bu byetu, ku disaamuna dya butumbi Bwèndè.”

Ki bwa cinyi mêmè pàànyì, paanyima pàà mêmè mumane kuumvwa bàmba bwa diitabuujà dyenu (Mvwa muumvwe bàmba ne nudi biitàbùùje bintu ebi, mvwa muumvwe bàmba ne nudi biitàbùùje cya bushuwa didyànjila-kulongolola, Mwoyi wà Cyandelele, ne lupandu, ne bikwabo) mu Mukalenge Yesu, ne dinanga kudì . . . bansantu bônso,

Ncyéna ndekela kusakidila Nzambi bwa bwalu bwenu to, mwikale nteela mènà enu mu masambila àanyì,

Bwa Nzambi wa Mukalenge wetù Yesu Kilisto, Taatù wa butumbi, wàmònakù mwa kunùpèèsha nyuma wa lungenyi ne dibuulula . . . dimumanya: Atungunukè anu ne kuDibuulula kunùdì dibà dyónso, bwa nwikalè nukola nuumuka ku ngàsà nuya ku ngàsà, nuumuka ku bukole nuya ne ku bukole, nuumuka ku butumbi nuya ku butumbi. Kanùyì nwalukila cyanyima to; ne, kadi nuumuka ku butumbi nuya ku butumbi, batungunùke anu ne kwenda kuya. Mêmè nêntungunukè anu ne kunusambidila.

Dìsù—mèsù a cyumvwilu cyenu . . .

¹⁸² Hmm! Nudi bamanye's, mu Bible mbambe ne nuvwa mpofo ne kanùyì bacimanyè to. Kadi apa Pòlò mmwambe ne: "Mêmè nênsambilè bwa mèsù a cyumvwilu cyenu . . ." Wèwè udi umvwa ne mwoyi wèbè. Ki cidiye wàmba ncyôci aci. Udi utangila ne disù dyebe, kadi udi umona ne mwoyi wèbè. Aci kaayi nudi bamanye. Eyo. "Bwa Nzambi wa Butumbi . . ." Twänjìbi kumona, mvensa wa—wa 18.

Mèsù a cyumvwilu cyenu miikàle makenkeshila, bwa nwamona mwa kumanya cidì ditekemena dya dibiikila, ne cidì mabanji a . . . butumbi bwa bumpyanyi bwèndè mu bansantu,

Ne cidì bunene butàmbidile bwa bukole bwèndè kutùdì twètù . . . (yoyòyò! Bàmba pààbò mùkaadì bukole bumane kuya? Bukole kì mbwanji nansha kufika mene to) . . . bàdì biitùbùùje, bilondèshùle bwenzeji bwa bukole bwèndè bunene. (Nwênù bàdì biitàbùùje bwenzeji bwa bukole Bwèndè bunene, ndi mêmè anu ndomba bwa Nzambi icikijèku anu bukole Bwèndè pambidi peenu. Nwamonu anyì?)

Bwàkenzejaye mu Kilisto, pàakamubiishàye ku—ku bafwe, ne kumusòmbeshayè ku cyanza cyèndè yéyè mwine cya dyabalume mu . . . myaba ya mu dyulu.

Kumutu menemene kwa . . . mamfumu, . . . makole, . . . ngulu, . . . makookeshi, ne kwa dinà dyónso didì dibùikidiibwà, . . .

183 Kaa, kaa, kaa! Pwàyi mwoy-. . . To, mbîmpè bwa ncìyi aku to. Tudi bafwànyine cya bushuwa kwangata citùpà cìdì cishààle cya bufuku ebu pa cyòci aci.

. . . *dìnà dyònsò dìdì dìbìkidiibwà, kî ng'anu mu cikondo eci to, kadi mu cikondo cilwalwà.*

184 Dìnà dyònsò—dìnà dyònsò ndìnà kaayi? Dìnà dyònsò dya muntu yònsò nedìinyikiibwè Dìnà kaayi? [Disangisha dìdì dyàmba ne: “Yesu.”—Muf.] Dyulu dijimà ndiinyikiibwe ne n'Yesu. Ekeleeziya mujimà mmwinyikiibwe ne n'Yesu. Byònsò mbiinyikiibwe ne n'Yesu, bwalu Dyòdì adi ki Dìnà dimwepele dikaavwàku Nzambi naadi. Yèyè ùdì ùbìkidiibwa ne Yehowah: Yehowah-yilè, Mulambu wùdì Mukalenge mudilongolwele; Yehowah-laafà, Mukalenge udi ukwondopa; Yehowah, dibendela dya Mukalenge, Maanàsè; ne Yehowah, ba-Yehowah bashiilèshiilàngàne. Ùdì ùbìkidiibwa ne Mutooto wà mu Dinda. Ùdì ùbìkidiibwa ne Taatù, Ùdì ùbìkidiibwa ne Mwànà, Ùdì ùbìkidiibwa ne Nyuma Mwímpè. Ùdì ùbìkidiibwa ne Alpha, Ùdì ùbìkidiibwa ne Omega. Ùdì ùbìkidiibwa ne Cibangidilu, Ùdì ùbìkidiibwa ne Ndekeelu. Ùdì ùbìkidiibwa ne Ditamba. Kaa, Ùdì ùbìkidiibwa ne. . . Ùdì ùbìkidiibwa anu mu mishindu yònsò ya myânzù, kadi Ùvwa ne Dìnà dimwepele.

185 Ki cìvwà Maatàayi wàmba ncyòci aci, pàakambàYe ne: “Ndààyaaku nukalongshe bàà mu matunga ònsò, nubàbàtiiza mu Dìnà,” kî mmu mènà to, “mu Dìnà dya Taatù, Mwànà, ne Nyuma Mwímpè.” Taatù kî ndìnà to, Mwànà kî ndìnà to, Nyuma Mwímpè kî ndìnà to. Mmwânzù wà ku Dìnà kampanda. N'Dìnà dya byambiibwà bisatu bya Nzambi umwepele. Dìnà Dyèndè ùvwa Nganyi? Mwanjelo wàkamba ne: “NeuMwinyike Dìnà ne. . .” [Disangisha dìdì dyàmba ne: “Yesu.”—Muf.] “bwalu Yèyè ngwasungila cisàmbà Cyèndè ku mpekaatu wabo.” Ki bwa cinyi bònsò bàakabàtiizangana mushindu awu mu Bible. Mushindu awu ki wùvwà Augustin Munsantu mubatiize Mfumu wa Angleterre, bidimu bitwè—bitwè ku lukama ne makumi ataanu, anyi nkama yibidi paanyima pàà lufu lwa Kilisto, mu Dìnà dya Yesu Kilisto. Eyo.

Kumutu menemene kwa . . . mamfumu, . . . makole, . . . ngulu, . . . makookeshi, ne kwa—kwa dìnà dyònsò dìdì dìbìkidiibwà, kî ng'anu mu cikondo eci to, kadi kabidi mu cilwalwà.

Ne mmutèèke bintu byònsò mwinshi mwa makàsà èndè, ne mumuvwiye bwa kwikalaye mfumu kumutu kwa bintu byònsò too ne kwa ekeleeziya,

Udi mubidi wèndè . . .

186 Mpindyewu, mubidi wànyì wòwò ne bukookeshi pa bintu byònsò, nanku cìdì mubidi wànyì aci's ki cìndì mèmè. Ncya bushuwa anyi? Cyòci aci ki cìndì mèmè, ki cinùdì bamanye ne ncìndì. Ncya bushuwa anyi? Ee, dìbà adi, cyònsò

cìvwà Nzambi aci, Yèyè wàkacipòngolwela mu Yesu, bwalu Yèyè ùvwa kaabujimà kàà Bunzambi mu mushindu wà mubidi. Ncya bushuwa anyi? Ne cyònsò cìvwà Yesu aci, Yèyè wàkacipòngolwela mu Ekeleeziya: “Bintu bìndi Mémè ngenza ebi, nenwènzè peenu bintu byònsò. Nenwènzè too ne binène bitámbe ebi, bwalu Ndi nya ku Taatù.”

Udi mubidi wèndè, kaabujimà kàà yèyè udi uuja byònsò mu byònsò.

¹⁸⁷ Kaa, mushindu mwine wùndì munangepu cyòci aci's wè! Mushindu mwine wùndì munangepu cyòci aci's wè! Dituku adi mvwa mbala mukanda mùvwàbo bafunde bwa lwendu kampana lùmvwà mwenze bwa kuya kayiisha—bwa kuya kayiisha ku Afrike. Ncìvwakù mwanji kuwùbala kwònsò aku to. Mbanganyi bàkaadiku babalè mukanda wà ne, *Mupròfeta Udi Ukumbula Afrike?* Mwòmò amu mvwa munkaci mwa kutangila mwànà mukese wa balume wa beena Inde. Mbanganyi bàkaadiku bamòne fòtò awu?

¹⁸⁸ Mvwa muumvwe mutangadiki kampana, utu usambidila babeedi kùkaadi bidimu bitwe ku dikumi ne bitaanu anyi bipite apu, wàmba ne: “Kacya bàndela ncitukù mwanji kumona cishima cyenzèke to.” Yèyè ne: “Nkààdikù mumone bantu bàmba ne bàvwa bàsaama mitu, bumvwe bìmpè. Nkààdikù mumone bantu bàmba ne munda mùvwa mùbànyènga, bumvwe bìmpè, ne bikwabo byònsò. Kadi bwa cishima, cintu kampana cifùkekù ne cyenzè cintu kampana . . .”

¹⁸⁹ Mémè kudyambidila ne bìvwa bikèngela bwa nsongàalùmè awu kwikalaye mwimane mwaba awu ne mumone cyòci aci. Mukolo wà mwànà wa balume wa beena Inde awu wùvwa bunene *ebu*, wumwe wà ku yòyi. Mukwabo kaayi wùvwa mukolo anu mùdì mukolo wa muntu yònsò wendenda ewu. Kadi, bu nwènù mwa kumona, mulonda wèndè wà balema, cisabaata cyèndè cìvwa cyambùlùke kuulu ntanta wa centimètres mitwe ku makumi asatu ne yisambombo anyi makumi asatu ne mwandamukulu, mushindu ewu. Ùvwa ne citaata cya cyamu mu ntaku mwàci amu. Cisabaata cyèndè aci cìvwa citèekela kumutu kwa tuumilonda tubidi tulepa twimàne. Kubàndayè too ne mwaba wùmvwà mémè mwimane awu, kumubàndishabò mwaba awu. Ùvwa ne mabaya a balema abidi. Kukopolaye cisabaata cya cyamu aci ne kucibyankulaye panshi mushindu ewu. Mémè kutangila mukolo wèndè awu, wùvwa wìpacila bunene *ebu*.

¹⁹⁰ Mpindyewu, bantu abu mbaaMùzùlùmanyi, mbaaMùzùlùmanyi. Nudi bavùlùke mu dyalumingu dishààle pàmvwà munubadile bìvwà bifùndiibwe mu bibejibeji abi anyi? Ndi naabi mémè mwine kaaba aka, bya ku Afrike, babìntùmìne ne mpandanjila wetù udi mwalukile ùfùminakù, Mwaneetu Stricker. Mùdì kaabwalu kafùnda mushindu wùvwà Billy Graham mwalàbùke pa bwalu abu. Menemene. Bòbò kulekela

baaMùzùlùmanyi bàbàsàkila buludi too ne mu mbû. Mbwalu kaayi ebu's? Bampandanjila ki kuumukabo mu budimi bwa bwambi eku's. Kutungunuka ne kushààlamù kùdi ne mushinga kaayi mwaba awu? Bôbò nyawu anu bacimùnyìbwe.

¹⁹¹ Mémè ntu munange Billy Graham, ne ndi ngeela meeji ne yèyè mmulume wa Nzambi mulenga wa dikema. Kadi civwà cikèngelà bwa Billy Graham kwikalaye mumubùndùle naaci, nkwamba ne: “Indila kakese...” bu ne bamwe bàà ku ba-Baptistes bàà maalù muumakane abu bamulekèlekù ùcyènza, ndi ngeela meeji ne nunku mucyènzè. Mémè ndi ngeela meeji ne Billy Graham mmulume wa Nzambi. Kadi bu yèyè anu mwambeku ne: “Indila kakese! Mémè ndi mwambi wa Evànjeeliyò. Wèwè's udi witabuuja Dipungila Dikulukulu, ne wambi ne Yesu kàvwa cingà cintu to anu muntu wetù ewu. Ndi nkwela kadyòmbò bwa kwenza neebe muyiiki wà dikokangana.” Mémè ncitu ngiitabuuja bya dyumusha dya tudyòmbò twa dyabulu abi bwalà, to mukalenge, kadi mvwa mufwànyine kwikala mumwele mémè kadyòmbò, mwambe ne: “Mémè ne wèwè tütwilanganè. Mémè ndi Docteur mu Bunzambi,” Billy Graham ùtu Docteur mu Bunzambi, “lekèlè nkelele mémè kadyòmbò pa cyòci eci, kadi nkujaadikile ne Yesu ùvwa Kilisto. Mpindiyewu, pa bìdi bìtàngilà dyondopa dya kùdi Nzambi, mémè ncitu ne mapà awu to, kadi tudi ne bânà beetu kampanda bàdi naawu. Mpindiyewu, wèwè muswe kubiikidisha bantu abu kuntu kwàka, lekela mbiikilè mémè anu umwe wa kùdibo, Oral Roberts anyi muntu kampanda, muntu kampanda udi ne mudimu wa bwambi munene wùdi cya bushuwa mufwànyine kafika apu.” Bu bayè kwòkù aku, ne dibà adi bamòne civwà mwa kwikala cyenzèke, nenku kwamba ne: “Bwena Kilisto kî ncinùdi nwènù nudyelela meeji aci to.”

¹⁹² Mpindiyewu bantu bônso bàdi bàdyùmva beediibwe màyi ku makàsà bwalu yèyè wàkuumuka cyanàànà e kumushiya. Mu bushuwa bwa bwalu, mpindiyewu, mémè ncitu ngiitabuuja bya dyabulu ùnwèla kadyòmbò abi to. Nkààdikù pàanyì mumwele matà mwìsù mushindu awu, ne mushiyangane nende muyè. Ncya bushuwa. Kadi pàkaadibi bikafika ku ne... Billy nunku's—nunku's mmwenzeku ne Mùzùlùmanyi awu adyùmvwè bu kasoosa kàà lupèlè mushindu ewu. Nunku yèyè's mmwambule Bible awu ne mwangate Yeshààyi 9.6, mwambe ne: “Uvwayè wàmba awu nganyi ne: ‘Bátùlelèdi Mwànà, bàtùpèeshi Mwànà wa balume?’ Muntu ewu ùvwa Nganyi? Uvwayè wàmba Ewu ùvwa nganyi? Ewu Muprofeta ùvwa nganyi? Maasiyà uvwa ne cya kulwa ewu ùvwa nganyi? Ndeejàaku wèwè mwaba wùdiYe muDimweneshile mu Mahomet. ‘Wàkatàpiibwa mputa bwa dishipa dyetu dya mikenji, muzaajiibwe bwa bubi bwetu, dinyooka bwa ditalala dyetu dyàkamata pambidi Pèndè, ku mibùndàbùndà Yèndè twètù twàkondopiibwa.’ Cindeejàaku túng mu Mahomet. Mmunyi mwàkeelàYe lubila ne: ‘Nzambi

Wanyì, Nzambi Wanyì, WàNdekèdì bwa cinyì? Bâtùbulu byanza Byànyì ne makàsà Aànyì, ne bikwabo abi? Ndeejàaku ku diyì dyebe wêwè, ku dipungila dyebe wêwè.” Mona’s, nunku yêyè’s mmutuute Mùzùlùmanyì awu mwendè nende kadyàbàta bya yêyè mufwànyìne kupanga too ne mwaba mwine wùvwàye. S’ncya bushuwa.

¹⁹³ Kadi pàakakèngelàbi bwa cibejibeji aci kukudimunaci ngaakwilù, aci’s ki cyàkatàpà ku mwoyi, cyàkenzà bwa mwoyi wànyì kutupikawu ne disanka. Pààkambàci mwaba awu ne: “Nansha mwàkakèngelàbi bwa Billy kwalabukaye ne kwalukilaye cyanyima amu, mmunyi mùdi baaMuzùlùmanyì abu mwa kwamba ne cìvwa cya mafi,” cyòci ne, “pàvwàbi ne Rév. William Branham ku Durban, mu Afrike wa ku Sud, bishima pa bishima kabiyi dyela mpatà, bukole bwa Nzambi, pààkapònà baaMùzùlùmanyì binunu dikumi musangu wumwe batwè mpala panshi ne balekèlèle myoyi yabo kùdì Yesu Kilisto.” Kakùyì mpatà to. Mbamanye bwalu abu. Biitabi bàà maalù anu mùdiwu mafundiibwe abu mbacimanye. Kanungabidiku to.

¹⁹⁴ Musangu kampanda kwàkalwa muntu kùdì Yesu, kwambaye ne: “Laabi!” S’nudi bamanye ne yêyè awu ùvwa Mùfaalèsà. Kwambaye ne: “Tudi bamanye ne Wêwè udi Mulongeshi mufùmìne kùdì Nzambi. Tudi bacimanye. Tudi bacimanye, bwalu muntu nansha umwe kî mmufwànyìnekù kwenza bintu byùdì Wêwè wenza ebi Nzambi kàyì nende to. Tudi tuumvwa. Tudi bacimanye. Kadi katwena anu mwa kucijikula patooke to, wamonu’s, bwalu twètù bacìjìkùle patooke, ee, s’netwipaciibwe mu ekeleeziya mwetu. Wamonu’s, netujimije kaneemu kàdìbo bàtùpèèsha.” Ki Yesu kwambaYe, kubangaYe kumwambila ne ùvwa ne cya kulediibwa cyakabidi.

¹⁹⁵ Bwa mwànà wa balume Mùzùlùmanyì awu, pàvwàye mwimane mwaba awu apu, ki fòtò wendè nyêyè awu. Cyamu cya fòtò kaciyena mwa kukwata mashimi nansha. S’ki yêyè awu mwimane mwaba awu, mukolo wumwe mwìpidile bikole (ne centimètres mitwe ku makumi asatu ne yisambombo) kùdì mukwabo, mwimanyine pa cisabaata cya cyamu aci. Mémè kumwambila, kwamba ne: “Utu wakula Anglais anyi?”

¹⁹⁶ “To, mukalenge.” Kàvwa mwa kwakula Anglais to. Mwandamunyi nguvwa mwambe ne: “Kàtu wàkula Anglais to.”

“Wêwè udi mushindu awu kùkaadi ntanta bule kaayi?” Mwandamunyi kumwambile,

“Kacya anu ku cileledi.”

“Udikù mwa kunyungisha mukolo awu nansha kakese anyi?”

“To, mukalenge.”

“Udi witabuuja Yesu Kilisto anyi?”

Yêyè kwamba ne: “Mémè ntu Mùzùlùmanyì.”

Mêmè kwamba ne: “Newitabuuje Yesu Kilisto bu Yèyè mwa kukwondopa anyi?”

197 “Nèngitabuuje Yesu Kilisto bu Musungidi wanyì bu Yèyè mwa kungondopa.”

198 “Bu Yèyè mwa kwondopa mukolo awu, mukolo awu kulwawu mùdì mukwabo awu, neuMwitabe anyi?”

“Eyowa.”

199 “Ee, Nzambi, ciWènzà ncinyi?” Eci ki cintu cyàkalondà; nkonko yònsò mimana kwandamuna. Mwaneetu Mike, s’ki njiyà nyòyì ayi. Mêmè kwindila anu kakese cyanààna bwa kumona ciwàYe mwa kwamba. Dya ntàngila kwàka ki mêmè kumona mwànà wa balume awu wènda ùya, wènda wènda, byenze bu uvwa wenda ulonda bimanu mushindu awu. Mêmè kwamba ne: “Mbanganyi bàà kunùdì nwènù baaMùzùlùmanyi aba bààcitàbà? Mwànà wa balume Mùzùlùmanyi nyèyè ewu, mutangilaayi, mwimanyikaayi mwaba awu.” Mêmè ne: “Nwènù bangangabuka, nudikù baswe kumukenketa anyi? Ki yèyè awu mwimane mwaba awu.” Kaa, wèwè’s udi mumanye paùdì mwimanyine dībà adi. Nwamonu’s, udi mumanye paùdì mwimanyine. Muntu nansha umwe...Ki yèyè uvwa mwaba awu awu.

200 Mêmè kwamba ne: “Vwila dya eku eku, mwanàànyì wa balume.” Ki kumwangatabo, ki yèyè ulwàlwa ewu. (“Tùng-tùng, tùng-tùng.”) Mêmè kwamba ne: “Mbyenze anu bu ne mukolo awu mmwìpì ne bule bwa centimètres makumi asatu, anyi makumi anaayi. Wipacila bule *ebu’s*.”

“Eyowa.”

201 Mêmè kwamba ne: “Kadi Yesu Kilisto Mwànà wa Nzambi ùdì mwa kumwondopa. Nwènù baaMùzùlùmanyi aba nenùcitàbùjè ne nenuMwitabe bu Musungidi wa sungasunga anyi?”

202 Kùvwa binunu bya byanza bifìike abi bìvwà byela muulu myaba yònsò mushindu ewu. “Ee, Mukalenge, mpindyewu ki dībà mene.” Mêmè kwamba ne: “Taatu wa mu Dyulu, piikalàbi ne kacya Wèwè ukààdikù mwandamune, ngandàmùnekù mpindyewu, eci mbwa butumbi Bwebe, eci m’Bwebe Wèwè. Ndi ndomba bwa Wòndopèku mwànà wa balume ewu.” Mêmè kumusambidila anu cyanààna mushindu awu.

203 Mêmè kwamba ne: “Kòpolà cisabaata cyebe aci.” Kutangilaye mu mushindu wà pabwàwù, mwandamunyi awu. Mêmè kwamba ne: “Kòpolà cisabaata cyebe aci.” Kusuululaye nshinga wa cisabaata aci. Bwalu nkààvwa mumone cikeena-kumona aci, ciwà mwa kwenzeka. Kukopolaye cilumyana aci. Mmwenze anu ùcyùmusha ne wàsa lwendu mwaba awu mutangile kùndì anyi, mikolo yònsò yibidi yivwa anu mùdì ya bantu bònsò emu, pàvwà yònsò yibidi ayi yènda bu mipyamipya

apu. Mémè kwamba ne: “Udi muswe bwa kwenda utwà kumpala utwà paanyima anyi?”

204 Kubangaye kwela mbila mushindu awu, ùtwa kumpala ùtwa paanyima, kàyikù mumanye cya dyenza to. Pàvwàye wènda wènda mushindu awu apu, kwambaye ne: “Éyì Allah! Allah!”

Mémè ne: “Yesu! Yesu!”

Kaa, kaa, kaa! “Éyì Yesu! Yesu,” dībà adi. “Yesu! Yesu,” nanku awu.

Mémè kwamba ne: “Kùdi nkonko anyì, kùdi nkonko?”

205 Julius Stadskev, mbanganyi bàdi bamumanye? Mwaneetu Stadskev ùvwa mulwe mwaba ewu mu ekeleeziya emu; wáfumu—wáfumu ku diya ku Allemagne. Kwambaye ne: “Anji indila kakese, Mwaneetu Branham, anji indila kakese.” Bwa kulwaye lukasalukasa ne mukwaci wa fòtò. “Ndikù mwa kumukwata fòtò anyi?”

Mémè kwamba ne: “Enza mùdi mumone.”

206 “Lwâku *apa* wenda wenda, imana mwikàle mutèèke cisabaata cyebe aci *apa*.” Kwimanaye mushindu ewu, kukwataye mwànà wa balume awu fòtò mwaba awu, mwikàle ne mikolo yònsò yibidi myololoke anu bu ya bantu bònsò eyi. Ki cisabaata cyende cyakale ne mulonda wà balema awu bìvwà mwaba awu abi, mushindu *ewu*, mushindu *ewu*.

207 Mémè kwamba ne: “Mbanganyi bàà kunùdi nwènù baaMùzùlùmanyi patùdi twakulangana apa bàdi bàbènga Mahomet bu muprofeta, ne bìitabuuja ne Yesu m’Mwànà wa Nzambi, ne bàMwitabuujà bu Musungidi wabò sungasunga?” Byanza binunu dikumi byàkeediibwa muulu. Aleluuyah! Kí mbaswe. . .

208 Bàdi bàteeta kucisokoka, bwalu twètù tudi “bansantu babunguluki bàà mu malaba,” mùdibo bàtùbìikila, nudi numona’s. Nansha nanku, Nzambi Yèyè ùdi anu ùkwàta mudimu. Ùdi munkaci mwa kushikika Ekeleeziya Wendè. Ùdi munkaci mwa kwenza byàbùngi bya bìyìlila ne panshi, kutàmba ne byònsò bitùdiku twètù aba bafwànyine mene kwenza anyi kwelela meeji abi. Yèyè ùdi Nzambi diloolo edi anu mùtùYe kwònsò aku amu.

209 Pa nanku, nwènù balunda bàànyì batekete, lekelaayi nzwàmbilèku cintu kampanda mpindyewu mene. Nwènù bananga bàànyì bàà musinga mukole, nwènù bàdi mu ditunga edi aba, ne bakwabo bàdi mu matunga àdìbo bàtèèleja mikaba yà méyì kwikalàyi dyàmwàmwà dya mbù ne myaba yònsò yinùdi nusanganyiibwa ayi, kanuciinyiku to. Maalu ónsò àdi ènda anu bilenga. Taatù Nzambi, kumpala kwa difuka dya dyulu ne buloba, ùvwa mumanye byònsò bìvwà ne cya kwenzeka abi. Byònsò bidi bikwàta mudimu anu mu byòbì. Wèwè udi muMunange anyi? Lama mwoyi wèbè mululame.

210 Nenku, vùlukààyi ne, mweyelu ewu pàdiwu wùmuka mu mwoyi wà panu ewu, bwenu nwênù bakulumpe anyi bwenu nwênù bansongà, ne nwênù baamaamù, panùdì numona bânà beenu bakese bàà mu maboko, mwânà mukese wa mu diboko wa bakaji wákafwà pàvwàye kayi mwanji kwikala ne matuku mwandamukulu anyi matuku ataanu awu, yèyè neikalè nsongààkàji mulenga pawàmumònà. Kaakù mulume ukààvwa mukòbàbame yònsò, uvwa kàciyi kabidi mwa kumona kùvwàye ùya awu; pawàmumònà, wèwè kaakù mukaji, s'neikalè nsongààlùmè mulenga wa dikema, nsongààlùmè anu mùdì wa wipacila bidimu makumi abidi awu, anu pa bulenga bwine menemene bwa bunsongà apu. Ne yèyè neikalè mushindu awu bwa kashidi. Wèwè udi mwa kumulenga ku cyanza, udi mwa kumulabula ku cyanza. Neumwele maboko kunshingu, kadi kwàkumubiikila “bàyaanyi” to, neùmubiikilè “mwaneetu wa balume.” Kaa, ekelekele! Yèyè's neikalè munene menemene mutàmbe ne “bàyaanyi” mwine awu. Wèwè udi wela meeji ne uvwa mumunange? Ncya bushuwa ne uvwa mumunange. Kadi adi dinanga divwa ndya *phileo*; indila pawàpetà dya *agapao* kadi umone. Indila pààkukwàtà dinanga dilelela dya Nzambi adi, kadi díbà adi umone ne bwalu bùdì cinyi. Edi dya panwapa edi didi anu mùdì diyaala dya kale dya difwima mìshì, kadyena nansha dimpè to, kadyena ne bwa nsongo. Cintu cimwepele cindiku mèmè nhubela bwa nwênù kwenza mpindyewu, ncya ne, nwênù balunda bàànyi—bàànyi—bàànyi . . .

211 Katanci kakese ndambu pashiishe nèngìikalè mwa . . . Nudikù mwa kuswa bwa ngàngatakù nshapita mikwabo yibidi ayi musangu kumpala anyi? Mukalenge . . . Bidi bikèngela bwa mèmè—mèmè kwikishaku ndambu kumpala kwa masangisha a mu Chautauqua awu. Mpindyewu, ncyèna mwa kuyiisha bintu ebi mu masangisha awu to. Mùdì búngì cyanàànà bwa bupidy- . . . miitabuuja mashìlèshìlàngàne búngì cyanàànà. Nudi numona anyi? Ewu yèyè ùdì anu ekeleeziya nkààyendè. Nwamonu anyi? Ncyèna mwa . . . Ndi ne bukenji bwa kuyiisha mwab'ewu cyònsò cindì muswe kuyiisha aci. Ewu n'tabernacle wanyi mèmè, nwamonu's, ne bándì ngambila nwnènù. Kadi, ndi ngiitabuuja ne bantu abu mbasùngìdìibwe. Eyowa's, mukalenge, ndi ngiitabuuja nanku cya bushuwa. Kadi, kaa, mushindu mwine wùdìbi bitàmbe bwìmpè bwa kwenda paùdì mumanye mwine mwaba wùdì wendela's wè. Mushindu mwine, bwa kumanya, anu kumanya cyanàànà cyùdì ciine munkaci mwa kwenza aci, nudi numona's, pamutu pàà kutànkakana, kulenduka. Twikalààyi anu biimane mu Bukènkè, ne twendela mu Bukènkè ne tumanya ne kùyaàya mutàngile nkwèpi. Aci ncilelela. Mukalenge ìkalè neenu.

212 Kadi muntu ne muntu wa kunùdì kaaba aka mpindyewu yèyè kàyi mushikikiibwe bilondèshile mwaba to! Wèwè udi mufwànyine kwikala anu mukaji wa nzubu cyanàànà. Ee, wèwè

udi wamba ne: “Mwaneetu Branham, mèmè ncitukù mwenze kantu nansha kamwe mu nsòmbelu wanyì to. Mèmè nyewu ncìyi muyiishi.” Ee, pàmwäpa Nzambi mmukufikishe panwapa bwa kukoleshakù dîkù dya bânà, mu dîkù dya bânà amu’s mùdi mwa kupatuka dikwabo dîkù dya bânà mwikalà muyiishi watùma misuuka mùliyô mujimà kùdi Kilisto. Bìvwa bìkèngela bwa wêwè kwikala panwapa. Udi panwapa mmu kiipàcilà kampanda. Nuvwakù bamanye nanku anyì?

²¹³ Ee, wêwè udi wamba ne: “Cyôsò cînkaadiku pàanyi mwenze, cìvwa anu, kusekuna bimoto bya buloba ebi. Ne mvwa mpatuka nya, kumpala kwa dîbà mu diloolo amu, ncìyikù mmanyà mwa kuditambakeena bwa kudiisha bânà to. Mvwa ntàngila bânà bakese bàdi bakwàte ne bya luse abu kabàyikù ne bisabaata ku makàsà to. Nsòmba ngaasa mwadi. Ndi mupeteku kashinyi kàà kale kàà nkata yinaayi kàà bàkòka kùdi tubalu aku, bwànyi mèmè ne Maawu kwikala tuyakù mu ekeleeziya.” Kutacishikù meeji to, mwaneetu. Tungunuka wêwè anu ne kuMunanga, Yèyè ùdi neebe ne kiipàcilà kampanda. Shààla wêwè anu mushindu wùdi awu, nda wêwè anu kumpala. Wamonu anyì? Udi mufwànyine kwikala kacya kùyikù muiiisha diyiisha nansha dimwe to, kadi udi mufwànyine kwikala kakwèndè wa tatwèndè wa kampanda wíkala mwa kucyenza.

²¹⁴ Nuvwakù bamanye ne Nzambi wàkabadila (Twánjààyibi kumona tûng mpindyewu, dyèndè ùvwa nganyì mwine awu?) Lewì, ne wàkafuta cyadiikumi pàvwaye mu mivungu ya Abraham, pàkatwilanganà nende Melekisedekè apu? Mbanganyì bàdi bamanye nanku? Nenku twánji tùmônààyibi. Abraham wàkalela Izàkà, Izàkà wàkalela Yakòbò, Yakòbò wàkalela Lewì; bìvwa ntatwèndè, kaakwèndè, kakwèndè wa tatwèndè; pàcìvwaye mu mivungu, mu dimiinu dya kakwèndè wa tatwèndè, Bible wàkamubadila ne yèyè wàkafùta byadiikumi kùdi Melekisedekè. Ekelekele, ekelekele, ekelekele, ekelekele! Mwaneetu! Kaa! Mèmè’s ndi . . .

²¹⁵ Kùvwa nsongààlùmè kampanda—kùvwa nsongààlùmè kampanda wa ba-Anglais uvwa mukudimune mucima diloolo kampanda mu Angletterre mwàmwa, kwambaye ne: “Ndi ne disanka dyàbwîngì! Ndi ne disanka dyàbwîngì!”

²¹⁶ Eyowa’s, ne disanka dyàbwîngì dya kumanya ne aci ncilelela! Nenku dituku kampanda dya butumbi, ncyèna mumanye ne diine dituku adi nedìikalè dîbà kaayi to, kadi bu ne cìvwa ncikeena kumona, ncyèna ngamba ne mvwa kaaba aka to. Vùlukàayi, misangu yònsò kanùpukù bwalu ebu mwoyi to, bàdi ne mikaba ya mèyi bènzè bya mwomumwe. Ní mvwa mu cikeena-kumona, anyì ní mvwa mwambwibwe mu Nyuma, ncyèna mumanye. Kadi cìvwa cya bushuwa anu mùndi mukwate Mwaneetu Neville mushindu *ewu* emu, anu cya bushuwa. Nenku mvwa ntangila ne nyiikila ne bóbò bantu abu. Ki mukàjàanyi wa

kumpala uvwa mwimane wàwa, kààkeela lubila ne “bayaanyi” to, yèyè wàkamba ne, “mwaneetu munanga.”

Mwaba awu kùvwa kwimane nsongààkàjì ùmvwà mpàtuka nende kale wàwa kùkaadi bidimu.

217 Pàmwāpa bamwe bàà ku beena famiye wendè mbasòmbe kaaba aka, Alice Lewis wa mu Utica, nsongààkàjì wa maalu malenga wa dikema, mwena Kilisto wa ùkèmesha. Wàkabwela mu dibaka pashiishe ndambu pàvwàye ne mwoyi, ne wàkapeta mwanende wa mu diboko wa kumpala kadi kufwa pa kulela. Alice Lewis, ngàkabwela mu nzubu wa dimwena bitalu bwa mèmè kumumona. Ncivwa anu mfikilaku kumbelu, mèmè kuumvwa bàmba ne mmufwe. Mèmè kuya kuntwaku, kakùvwa muntu nansha umwe mu cibambalu amu to, mèmè kwamba ne: “Kùdikù muntu mukaji mwab’ewu, Mandamu. . .” Dìna dyèndè ùvwa Emmerke. Ne wàkasèdiibwa kùdì nsongààlùmè kampanda mwena Kilisto wa maalu malenga, ne yèyè nsongààkàjì awu ùvwa mwena Kilisto wa maalu malenga. Mvwa muyààyaàye ne nsongààkàjì awu myaba yònsò, mu myaba ya mishindu mishilèshilàngàne ne bikwabo byònsò. Kadi tucivwa anu bânà’s, bàà bidimu dikumi ne mwandamukulu, dikumi ne citeema, myaba yònsò, mwena Kilisto wa maalu malenga, mèmè ncìyi mumanyeku bùngà bwalu nansha bumwe bwèndè yèyè to anu bwena Kilisto bushùwashùwàlè. Kadi mèmè mvwa ngènzàmpèkààtù. Kadi mvwa mmuseesela. Mèmè kubwela mu. . . Ne bayende ùvwa mwena Kilisto mulediibwe cyakabidi, muntu wa bushuwa. Kadi ncivwa mumanye to; mvwa mumanye ne ùvwa mufwe, mucimwène mu cibejibeji. Kì mèmè kuyakù ne bóbò kungambila. Mèmè kuya kwa Coots aku e kwamba ne: “Nudikù ne Mandamu kampanda dyèndè Emmerke anyi?”

Awu ne: “Billy, yèyè awu ùdi mu cibambalu mwàmwa.”

218 Mèmè kubwelamu ne kwimana ku luseke lwà musheete wà bafwe aku. Mèmè kudyambidila ne: “Alice, mèmè ewu’s nkààdikù mubwelèbwèle mu tùshò twa tutàmbe kwikala twa m̀dimà twa mwinshi mwa buloba, nkààdikù mwendèlèndèle mu njila ya m̀dimà. Mèmè ne wèwè’s tukààdikù bapicile pamwe mu njila ayi ne bendè twenda tupweka ne musulu, kalé wàwa pàvwàbo ne bwàtù bwa manayi, tuvwa tusòmbamù tutèèleja mijiki ya mvunkù. Tubànda tupweka ne tujila, mushindu mwine wùvwà wèwè ewu inàbànza’s wè! Mushindu mwine wùndì ngeela Nzambi twasakidila bwa nsòmbelu webè’s wè. Ikishà, mwaneetu wa bakaji munanga, ikishà mu ditalala dya Nzambi.”

219 Kadi bufuku abu mu cikeena-kumona, ki yèyè ulwàlwa lubilu ewu mutàngile kùndì. Kwambaye ne: “Mwaneetu mubènèshìibwe,” ne kungeelaye maboko kunshingu. Kaa, kaa, mwaneetu wa balume ne mwaneetu wa bakaji, s’ncinshintulule’s. Ncyènàku mwa kwikala kabidi wa mwomumwe awu to. Ncyà bushuwa anu cya menemene! Ncyà

bushuwa anu—anu mûndi mêmè nnutangila emu, anu cya bushuwa cya mushindu awu. Pa nanku, kakwena bwôwà nansha bukese to. Ndi mwa kufwa kumpala kwa diloolo edi kujikadi.

²²⁰ Ndi muswe kukolesha mwanàanyi mukese wa balume udi mundekeelu mwàmwa wàwa, Joseph. Ndi muswe kumumona mu cyambilu, pângiikalà mwa kwangata Bible ewu... pângàafikà dîbà dya mmona Joseph mu cyambilu munkaci mwa kuyiisha bu—bu nsongàalùmè mûle tente ne Nyuma Mwîmpè, mulaaba kùdi Nyuma wa Nzambi pambidi pèndè. Ne ndi mwitabuujje ne yèyè neikalè muprofeta. Dituku dîngàà—dîngàà—dîngààkamumònà bidimu bisambombo kumpala kwa kulediibwaye, wènù's nudi bavùlùke ne ngàkanwàmbila ne yèyè nealwe. Vùlukàayi cîngààkamubîikilà, mwaba awu mene ku luseke lwà cyoshelu aku, nciyi mumanye ciine cîmvwà ngamba aci to, mêmè munkaci mwa kulambula bânà bàà mu maboko, mêmè kwamba ne: “Joseph, wêwè udi muprofeta.”

²²¹ Nenku dituku adi yèyè mwimane mu lubanza, kubwelaye ne kulwaye kûndi, kwambaye ne: “Papa, Yesu ewu ùtu ne cyanza mùdi cyebe aci anyi?”

Ki mêmè kwamba ne: “Ee, eyowa's, mwanàanyi. Bwa cinyi?”

²²² Kwambaye ne: “Mvwa musòmbè pa kàkalù kàanyi, mwindile bwa Sarah” udi mwanaabo wa bakaji mukese awu, “àfumè mu kalaasa.” Musòmbè pambelu apu. Ncitu muswe kumulekela ùpàtuka ùya mu njila to, ùvwa musòmbè mushindu ewu. Nenku kwambaye ne: “Mêmè kutangila muulu, ne,” mwàkambàye, “ndi mwenze anu ntangila muulu anyi, kùvwa cyanza cyaenze mùdi cyebe aci, ciikàle ne luzemba lwà diboko dya muteelu lutòòke diikàle kumutu kwànyi aku.” Ki kwambaye ne: “Kubàndaci muulu.” Yèyè ne: “Civwa ncyanza cya Yesu civwà cibànda muulu aci anyi?” Mêmè kutangila mamwèndè, mamwèndè kutangila. Twètù kuya kwa Mandamu Wood. Padiye ní mpenyi, padiye musòmbèla mwab'ewu. Twètù kumuputakaja ne nkonko, elu lùjika lukwabo lùpingana, ne mu mishindu yònsò mutùvwa mwa kwela amu. Civwa ncikeena-kumona. Úvwa mucimone. Pângiikalàku mwa kumona cikondo ciikalà Joseph mwànà ewu mwimane... Ndi ntekemena ne nêngiikalèku ne mwoyi too ne pângààmumònà ùkaadi muselangane, bu Yesu mwa kunenga.

²²³ Kadi nyewu nkàadi muntu mununu, mvya milembelele ku nshingu kwònsò eku. Ndi mutume... Ndi muswe kutumaku misuuka mikwabo miliyò yibidi anyi yisatu kùdi Kilisto bu byòbì mwa kwenzeka ne mpete mushindu awu. Ki dipangadika dîndi naadi bwa kuyiisha Èvànjeeliyò mu ditumba ne ditumba dyònsò dya buloba. Eyowa's, mukalenge. pa nanku, ndi ngambilamu's, Nzambi, nêngènzè nanku. Pa nanku, bu mêmè mwa kumonaku cikondo aci cilwa's, Mwaneetu Mike.

²²⁴ Ndi mwa kutangila cikondo civwà Maman, Meda, mûndi mmubiikila's, munanga wanyi awu, nwamonu's, yèyè ùdi...

tukàadi twenda tukùlakaja, mmona nsuki yèndè yènda yitòloka mvya, ne mmona mutùdi twenda tuya, twenda tufwatalala.

225 Rebekah, ndi ne kusakidila kwàbùngi bwa Rebekah. Mulongeshi wèndè wa mìjiki ùvwa ùngambila diloolo adi, wàmba ne: “Ekelekele, yèyè mutungunuke naabi nanku, Mwaneetu Branham,” yèyè ne, “mbikole bwa kwamba cyènzàye.” Nwamonu’s, mutungunuke mu mìjiki. Ndi muswe bwa yèyè, ne ndi muswe. . . Ndi muswe Sarah ku cisanji cya orgue, Becky ku pyànò, ndi muswe Joseph mu cyambilu.

226 Pàngiikalà mwa kumonaku aci cyènzeka, ne mèmè ne Maman tubwela twenda tutetuka, mèmè ngendela ku dikombo dyànyì dya kale adi, diloolo kampanda, ngenda mpweka ne njila, ne mwikàlekù mwa kutangila mwàmwa ne kumona mwanàanyì wa balume awu mwimane kwàka mulaabiibwe ne Nyuma Mwimpè, munkaci mwa kuyiisha Evànjeeliyò umwèumwè ewu. Ndi muswe kwangata Mukanda mukulakaji ewu, kwamba ne: “Mwanàanyì, ki Wòwù ewu, ngwèbè wèwè. Ikàla mwimane naaWu, kùdikù cibànga pa Dìyì nansha dimwe to. Shààla wèwè anu naaDi, munanga wanyì. Kwikadiku, kùditàcishikù mu meeji to, udi ubèngangana neebe nansha yèyè mwikàle nganyì, nansha yèyè nganyì ùbèngangana neebe, Nzambi neatwe ku cyebe. Uyiishè wèwè Dìyì dyònsò anu mùdiDì difùndiibweMù amu, nenku Papa neakumone dyàmwàmwà dya musulu.” Ndi muswe ngòlolakù maboko ne ngàmwàngata mu maboko àanyì emu, mukàjàanyì awu, ne kusabuka kuya dyàmwàmwà dya Yadènè.

227 Patwàmjà kafikila ku diine dìbà adi, Nzambi, nshaalèku mu budimi bwa bwambi, ne lulamatu lwònsò! Nshaalèmu! Nansha bindòmbe cinyì, anyì bintu bùngi kaayi, cìndi ngenza, anyì *bikampanda*, *bikansanga* anyì *bikankenga*. Nshaalèku ne lulamatu ne mwambi wa bulelela ku Dìyì dya Nzambi udi ne mwoyi, bwa pààlwà dituku adi ne mèmè musabuke muye dyàmwàmwà, ne mwikàlekù mwa kutangila kwàka ne kwamba ne: “S’ki nwènù abu. Kaa, mulunda wanyì wa mushinga mukole, mwaneetu wa balume wa mushinga mukole, mwaneetu wa bakaji wa mushinga mukole.”

228 Wèwè muyiishi wa kànàkànà, bwela mu budimi bwa bwambi, shààla mu cikùnyì. Nwènù bònsò bayiishi bàà twànàtwànà ne bikwabo, kanùshàadi kacya nwasshìnga mikolo to. Kanwikadi anu kacya nwasòmba kanùyì ne cinùdi nwenza to. Pàtukàayi nùye nùkapetèku musuuka kampanda. Enzàayikù cintu kampanda! Ndàayi, ditwayi mu mudimu. Kwimanyiku to, wèwè muyiishi wa kànàkànà kuntu kwàka. Nzambi akubeneshe.

229 Yèyè ùdi ùmvùlwija pàmvwà bukole abu, ngeela meeji, ne pàmwàpa mushàadilekù ndambu kùdiye. Mvwa ne bidimu anu bu makumi abidi ne bya mu njila nanku awu pàngàakatèkà dibwe dya mu ditumba adi mwaba awu. Ndi mvuluka ne mvwa ne ciibidilu cya kuvwala kazaku kàà bleu ne mupanu mutooke,

nenku mêmè kwimana mwaba awu ne kutèèka dibwe dya mu ditumba adi kùkaadi bidimu bitwe ku makumi asatu ne cimwe. Monaayi anu bukole bwine bûncìvwà abu, mêmè s'ncìvwa anu mwànà mutekete. Mwimane anu mwaba awu, ntèèka dibwe dya mu ditumba adi. Ncìtu mudyeku cibàngà pa Dìyì nansha dimwe to. Ntu muDilame menemene anu bu mûngààkatèèkà dibwe dya mu ditumba adi amu. Mwômù amu bujaadiki bwànyì bùdi bûsanganyiiwbamù, mûngààkabùfùndà pa dibeji dya munda mutupu dya Bible, nenku mêmè kudituula ne kudyela mu dibwe dya mu ditumba adi, ne dïcìdi anu disanganyiiwbamù. Nenku bwikalèku bufùnda pa mabeji a Dìyì dya Cyendelele dya Nzambi mu Dyulu's wè. Ngìikalèku kacya anu ngìmana ne lulamatu too ne ku ndekeelu.

Twìnyikààyi mitu yetu mpindyewu kakese cyanàànà bwa disambila.

²³⁰ Mu dijikija dya diloolo edi, dijikija dya yòyì eyi, nshapita umwepele ewu, cya bwalu kàciyi cijikija mùvwàbi bikèngela to. Bìvwakù bìkèngela nwènù kupeta mukwabu awu, ne mùdiye mutungunuke wènda ùshikika Ekeleeziya pa mwaba Wèndè. Nènnùtwàdìlèbi musangu kumpala, bu Nzambi mwa kwanyisha. Bikèngela ngàngatèku anu ndambu wa diikisha mpindyewu kumpala kwa mêmè kuya mu Chautauqua mwàmwa, ku masangisha makwabo manene, pashiishe ngumuka amu nya ku Oklahoma, ngumuka aku nya ku Klamath Falls, pashiishe ngumuka ku Klamath Falls mpweka mutangile ku Californie, nya ku Yakima, bwa mêmè kwalukila anu too ne ku matuku 15 a ngondo wa mwandamukulu.

²³¹ Kadi tàngilààyi, swàyi nnukonkeku cintu kampanda, bu cintu ne cya kukwenzekela wèwè anyì mêmè kumpala kwa ciine cikondo aci kulwaci, bu mêmè ne cya kusabuka kuya dyàmwàmwà dya musulu ne kubwela mu buloba abu, anyì bu wèwè ne cya kusabuka kuya dyàmwàmwà kubwela mu buloba abu kumpala kwa cikondo aci, udikù umvwa ditwishiibwa diloolo edi ne netutwilangane mwàmwa mu wówù Mwaba awu anyì? Wèwè naadi, ela cyanza muulu, wamba ne: “Ndi ngumvwa ditwishiibwa munda mwa mwoyi wànyì.” Nzambi àkubènèshè. Nzambi akubeneshe. Kwòkù muntu mwaba ewu udi kàyì ùmvwa ditwishiibwa dya ne yèyè nèikalèmu, kadi mwikàlekù muswe bwa kwamba ne: “Ùmvùlùkèku, Mwaneetu Branham, bwa ngàpetakù ditwishiibwa adi,” ela cyanza muulu ne: “Ndi muswe pàànyì kwikalamu.” Nzambi akubeneshe, inàbànzà. Nzambi akubeneshe.

²³² Taatù wetu wa mu Dyulu, nyewu tuKutwadila disangisha edi diloolo edi, cyanza cyònsò, mu kwànyì pàànyì kumanya, cìvwà cyela muulu aci, bònsò pa kuumusha anu muntu umwepele, musuuka wumwe wà mushinga mukole wùdì musòmbe paanyima apa ewu, mwikàle anu ndambu mucyòkàkàne mu kudikonka kwa ne mmufwànyìnekù kusabuka kuya

dyàmwàmwà mu Buloba abu anyi, ní mùdì búngì bukùmbàne bwa dinanga dya Nzambi mu mwoyi wèndè, mu mwoyi wà mukaji wa mushinga mukole awu, bwa ne mmufwànyìnekù kufika mu Buloba abu bu yèyè mwa kufwa diloolo edi, ncifwànyìnekù kukoka musuuka wèndè wà mucyokakane awu ne kuwubweja mu Buloba Bulaya bwa Nzambi amu anyi?

²³³ Taatù udi mu Dyulu, bu mûngimànyì kaaba aka ku cyambilu eci ne muyiishe, ne mukòpàkàne, ne mwele mbila, ne musèngèlèèlàngàne, ne mutwìshìshàngàne, swaku bwa nKulombeku musangu ewu kabidi, Mukalenge, swaku ndombeleku mwaneetu wa bakaji udi paanyima pààpa wàwa; Nzambi, tèèkàkù munda mwa mwoyi wèndè, diloolo edi, dinanga dya Nzambi adi, Nyuma Mwìmpè wa Nzambi awu, ditalala didì dipita cyumvwilu cyònsò adi, bwa wàmònakù mwa kupeta Nyuma Webè, kutwibwa citampi kùdì Nyuma Mwìmpè too ne ku dituku adi. Ndi muswe ngàmumònakù, Mukalenge, patwìkalà bapite cilamba baye dyàmwàmwa. Cyòci ciikàlekù—cyòci ciikàlekù dyànyì pàànyì—cyòci ciikàlekù dyànyì pàànyì dyèsè dya kusabuka kuya dyàmwàmwa, piikalàbi ne cyŪvwà mundeje aci ncilelela, ne bu mèmè mwa kusabuka kuya dyàmwàmwa, ndi muswe ngatwilanganaku nende mwômò amu, ne ngàmumònakù ùlwa lubilu ùnkwàta ku cyanza, wàmba ne: “Mwaneetu wa mushinga mukole, diloolo adi ndivwà Cintu kampana cingambile bwa kwela cyanza muulu, pawàkajikijà kuyiisha pa Mukanda wà Efèsò. Mèmè kwela cyanza muulu, ki cintu kampana kungenzekelaci paanyima pàà cyòci aci. S’ki mèmè ewu. Ndi nsongààkàjì mpindyewu bwa kashidi.” Nzambi ènzèlèku wà mushinga mukole awu cyòci aci.

²³⁴ Aba bèdì byanza muulu ne mbatwibwe citampi kùdì Nyuma Mwìmpè aba, Nyuma wa Nzambi ùdì pambidi pààbò, ne bòbò mbapete Nyuma Mwìmpè, mbatwibwe citampi cya dinanga dya cijila aci munda mwa myoyi yabo. Mushindu mwine wutùdì tuKusakidila bwabo bòbò’s wè.

²³⁵ Ndi mumanye, Taatù, ne mikaba ya mèyì eyi neyiye pa buloba bujimà. Bikòlokolo byàbúngì mbipàyika ku cyambilu eku, mbwena kwamba ne mikaba ya mèyì yidi munkaci mwa kukwaciibwa, yìnyùnguluka lwa paanyima pààpa, Dìyì adi nediye mu matunga mashìilèshìilàngàne pa buloba bujimà, mu nyungulukilu mujimà wa buloba, matunga makumi abidi anyi makumi asatu mashìilàngàne nebaDitèlèjè. Ndi ndomba bwa muntu yònsò watèèleja mukaba wa mèyì ewu, udi kàyi ne ditekemena dya Mwoyi wà Cyendelelele adi, udi kàyi mupete dibatiiza dya Nyuma Mwìmpè awu, swaku bwa Dilwe ne kalolo kònsò ku myoyi yabo. Enzaku nanku, Mukalenge.

²³⁶ Ne swaku bwa ne mèmè, bu mèmè nciyi mwa kubamonaku panwapa to, pàngààsabukà kuya dyàmwàmwa mu Buloba abu, swaku bwa bàalwa lubilu bàngupukila (ne mèmè mbùùpukila, ne bòbò, twelangana mbila muntu ne mukwèndè ne: “Mwaneetu wa

mushinga mukole!”), bàmba ne: “Mvwa muteeleje mukaba wèbè wà mèyi pa Efèsò, mùvwà Nzambi mudyànjile kutulongolola ku Mwoyi wà Cyendeleele, ne nku wôwù mukaba wà mèyi awu kùmvwà mupetele Dîyì dya Nzambi ne mutwibwe citampi kùdi Nyuma Mwîmpè mumbweje mu Bukalenge bwa Nzambi.” Enzaku nanku, Taatù.

²³⁷ Ondopaku bônso bàdi ne mabeedi ne mu ntatu. Dyängàcìlèku Wèwè mwine butumbi bwalu tudi tuKulambula byônso ebi ku didyenzeja dyônso mu Dîna dya Yesu, Mwan’Ebe. Amen.

²³⁸ Kùdikù mwab’ewu muntu udi usaama ne muswe bwa kumutentekelabo byanza bwa kumusambidila anyi? Nudikù mwa kwela byanza muulu anyi? Eyo. Swàyi nulwe mu cimùmà, mpindyewu, ku cyoshelu eku mene, nenku nwimaneku katanci kakese cyanàànà, pàdi Mwaneetu Neville ùlwa ne wendè . . .

²³⁹ Kaa, eci ncimweke bu, kusambidila kwa babeedi, nkumweke anu—anu bu kulwa ku mwaba wùdi mumanye paùdi mwimanyine, menemene. Nzambi mmumanye byônso pa bwalu ebu.

²⁴⁰ Pàndi ngumvwa musambu awu . . . Vùlukàayi ne, nwènu biikàle ne mwoyi pângààyà, nwàngimbilaayikù eci ne: *Itàbùùjà Nàka*. Nwavùlukaayi ne, ncyèna mufwe to, ncyàkwikala kule menemene neenu pângiikalà ncitèeleja apu to. Mémè ncyèna mwa kufwa to; Yesu mmumpèèshe Mwoyi wà Cyendeleele; neambiishe ku lufu mu dituku dya ndekeelu; nènnumònè. Ne wèwè muye, nêngiitabuuje cintu cimwecimwe aci bwebe wèwè. Ndi ngiitabuuja ne netumonangane cyakabidi.

²⁴¹ Ndi mutangile, inàbànzà wa mushinga mukole udi mwimane kaaba aka ne mvyà ewu. Udi mwena Kilisto anyi? Mùle tente ne Nyuma Wendè, mwindile bwa kulwaYe, mwimane anu cyanàànà kaaba aka mwindile bwa Bwâtù kulwabu. Amen. Kaa, mwaneetu wa bakaji . . .



DITÈÈKIIBWA 4 LUA60-0522E
(Adoption 4)

DILONDANGANA DYÀ MALONGESHA PA DITÈÈKIIBWA

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu dilòlò, mu matuku 22 a ngondo mwithànù, cidimu cya 1960, mu Branham Tabernacle mu Jeffersonville, Indiana, U.S.A. Ndyumusha pa mukaba wa méyì ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org